

# *IKUTONDEZEGWA KWA LEZA*

 Katu ciimvwi kwakaindi kaniini buyo mbotu kotamika mitwe yesu ku mupailo.

<sup>2</sup> Mwami wesu Siluzyalo, tuli lumbide ncobeni sunu ku coolwe eci nco tu jisi ca kuli bunganya lwesu antoomwe atala a inyika kakutana Kuboola kwa Mwami. Akube kuti tu lingule myoyo yesu sunu, ku Ijwi Lyako, a kubona ikuti na tuli mu Lusyomo, kutegwa inga twa libambila, kutegwa, oora lya Kulibonya Kwakwe. Kutegwa tube mbuli Lugwalo mbu lwa kaamba kuyooba, "Kukwempwa antoomwe, abaabo boona, a kuswaangana Mwami mu mulengalenga, akuba a Nguwe kwalyoonse."

<sup>3</sup> Twa Ku lumba ku Muuya wa bwini iwa Bunakristo uciliko mu inyika, akati ka bantu, kuti baci Ku syoma a Ijwi Lyako. Aboobo tu lomba zilongezyo Zyako ali ndiswe sunu, kuti Uyo zisansaila ali umwi aumwi wesu ezyo nzyo tu bulide, kutegwa tu ka tilailwe a Ijwi, kutegwa inga twa komena kuba zibelesyo zilabubelesye mu maanza Aako, ku buzuba obu bwamamanino. Nkambo twa lomba eci mu Zina lya Mwami Jesu Kristo, Mweembezi wesu mupati, oyo ngo tu langila kulibonya. Ameni.

Inga mwa kkala.

<sup>4</sup> Elyo Ndi yanda kwaamba kuti Nda langanya kuti ncoolwe eci cipati cifumo cino cakuba kokuno alubo. Elyo twausa kuti tatu jisi busena bukubwene bwa kukkanla. Elyo tuyu sola, sunumasiku, eno kukombela balwazi; sunu, cifumo cino, inga cabu ciyumu aniini.

<sup>5</sup> Elyo—elyo ni Nda teping'a Mulumbe oyu sunu. Nda... I Mwami wabaanga wabeleka a ndime kujatikizya nguwo, oh, mweezi na yobilo yainda, alimwi mulamfu. Elyo Nse jisi ciindi okuya mu miswaangano, nkaambo tu zumizya oko ku maminiti ali makumi otatwe, makumi one aa kuswaangana. Elyo mpawo tu... Nkaambo ka bantu beeleda kuya ku ncito a zintu, Nda kajana kuba kabotu ikuti Nda bamba Milumbe yangu kufwiimpa. Elyo tiiba jisi ciindi okuya ca kuu rekkoda, aboobo Nda kayeeya buyo kuti inga Nda lindila mane Nda sika ku cikombelo okuno elyo mpawo kuu rekkoda kuzwa kokuno. Elyo mulamfu aniini, alimwi Ndi lizi muliimvwi, elyo Ndi—Ndiyo bindaana buyo cakufwambaana mbuli Mbwe konzya. Elyo, lino, tamu koondipenzya ikuti na mucincana zyuuno, na kufumbwa kumbi, eco ciyo—eco ciyooba kabotu ncobeni kuli ndime nkaambo obu mbuzuba busalesale bwakuti tupange marekkodi aya.

<sup>6</sup> Elyo aboobo tu jisi bulunguluzi bupati kuzwa kuli ceeco Mwami ncakacita mu masena akubelekela, pele ambweni tu

yoopa kunji kwa mbubo sunumasiku cindi notu konzya kupa ciindi cinji kuli mbubo, kuba a ciindi cinji ca kupa.

<sup>7</sup> Elyo lino tu syoma kuti Mwami uyo longezya umwi aumwi wanu. Ndi lizi myoyo yanu izwide lutangalo, kukulangila Kuboola kwa Mwami. A wangu awalo, kufwasuuka koonse, ku bona zintu kazicitika mu nzila mbo zibede. A—a nzwango zya cisi, a mbungano mu ciimo moibede, a kubona zitondezyo zya Kuboola Kwakwe, kobilo kunyama a kumuuya, a kuziba kuti ciindi eci ca Kulibonya Kwakwe cili munsi loko, ci zuzya buyo myoyo yesu a lutangalo kuziba kuti tuyu cincwa bumwi bwa mazuba aya. Tuyo cincwa kuzwa mu zilenge ezi obo mbotubede.

<sup>8</sup> Lino, Nda syoma, ikuti na Nda mvwisya, ba jisi zibelesyo zyakukwabana zya matelefooni kubusena kumwi, cakuti oyu Mulumbe wiinka mu Phoenix a ku—a ku masena aindene, kwiinda ku telefooni. Elyo aboobo lino tu syoma kuti ikuti eco cili booboo... Ta ndizi; kwaambwa buyo ceeeo kakutanaba kunjila mukati. Elyo—elyo bantu boonse okuya bali mukubotelwa ncobeni nseba mbotu a—a Bulemu bwa Mwami ali mbabo.

<sup>9</sup> Elyo lino—lino tuyu jula Ijwi lya Mwami. Elyo eco ncotuli waano toonse nkuli botezya tobeni a kupakamana kuli ceeeo nco tu... Ta—ta tubooli okuno alimwi tuli... Taakwe oyo uliko uzi kuti kufumbwa muntu inga wakkala mu kupya oku kuli boobu, a ku muzeeso buyo wa kuba kokuno. Tuli kokuno ku bukanze bomwe, elyo nku, “kweenda munsi loko a Leza.” Nkukoонse nko tu konzya kucita, nkusyoma kuti Mwami Jesu kuteeti ula ndiswe. Alimwi tuli waano ku—ku kweenda munsi loko a Ngewe.

<sup>10</sup> Lino oku kupya nkuyumu aniini kuli ndime. Ndi baanga ndazibila ku kupya kuyumu okuya mu Tucson, oko kuli... I mudumo muluwo okuno lino; kupya kwesu okuya kulapya loko kwiinda kooku, pele nkuyumu. Mudumo wesu muluwo ciindicimwi ngu mbali yomwe yeelene iyamakumi obilo ya peseenti yomwe, ambweni, ciindicimwi mbuli ceeeo, mbuli buyo kutandila kuponena kensi kwa tente lya okisijini. Pele okuno kujisi i—i mume muli nkuko, elyo ku mubamba buyo kubaanga nkulimvwa “kukanywa koonse,” mbuli mbo twa kali ku kwiita. Aboobo nciyumu kuli ndinywe, aboobo Ndi lizi obo, elyo nywebo no bamatumbu bajisi tumvwanda tuniini a ndinywe no bantu baimvwi, bapati a basyoonto, a ku bikkwa antoomwe mbuli mbo mubede. Elyo lino tula—tula ngila kuti Leza uyo mulumbula cabuvubi nkambo kakulyaaba kwanu.

<sup>11</sup> Nda mvwa kuti Mukwesu Roy Borders nkwalii okuno abusena bumwi. Nda muvwa kwaambilizigwa, pele Nda yeeyela ambweni ta konzya kunjila. Yaa. Oyo ngo mweendelezi wa miswaangano.

<sup>12</sup> Aboobo lino akwalo tu yanda kwaambilizya kuti umwi oyo wakali akati kesu waunka kuyooba a Mwami cifumo

cino, mwaalumi, Mukwesu Jackson uzwa ku Sturgis, Michigan. Taakwe uzi obo mbwaunka na cintu kujatikizya nkuko. Wa kali kucita buyo kabotu, elyo wa buyo... Ndi yeeya kuti bamujana buyo kafwide, na cintucimwi. Tii—Tii nda jana bupanduluzi buzwide bwa nkuko. Elyo tuli lumbide kuli Leza kuti Mukwesu Jackson wakali Munakristo. Nse ka mubona kwa myaka minji, pele waka kkala akati kesu alimwi ngumwi wesu. Leza pumuzya buntu bwakwe bwantanze! Kwiinka mbuli booboo, tu syoma kuti ambweni cali cintucimwi, kuti cali ciindi cakwe kuti aunke. I Mwami taka tucenjezya kuli nkuko, na walo kuli nkuko, wa unka buyo. Eyo njenzila mbo kwabede. Elyo Ndi yanda kutumina mukaintu wakwe cakufwambaana mbuli Mbwe konzya, a kumwaambila kuusa kwesu. Elyo toonse tu yanda kupa kulumba kuli Leza ku buumi bwake bwa Bunakristo bwantanze, aceeco ncaali kwaamba a nyika awa, alimwi kapati kuli ndiswe okuno mu mbunga eyi yamubusena.

<sup>13</sup> Lino sunumasiku, Nda ambilizya kuti kuyooba kukombela balwazi sunumasiku, alimwi Njo kanana kunji kujatikizya balwazi sunumasiku.

<sup>14</sup> Pele ku ciindi eci, atu njile moonya mu Ijwi lino, nkaambo kulaatide a kupya. Tuyo inka cigaminina nkoonya ku Ijwi. Ndi yanda kubala kuzwa ku zibela zyobilo zya Lugwalo cifumo cino, lulamfu maningi, kutegwa lundipe ntalisyo niini ali ceeco Nce yanda kwaamba.

<sup>15</sup> Elyo, lino, Ndi lombozya kuti bayo jata teepu, Mukwesu Sothmann a mbabo, kakutanaba kwiisambala, ikuti na cilakonzeka, Ndi—Ndi yanda kuswiilila kuli njiyo ka tutana... kaitana unka kubuleya.

<sup>16</sup> Lino mu... Ndi yanda kubala kuzwa muli ba Filipi, cipati 2, 1 kusikaku 8; a Bakorinto Babili 3, kutilikila a 6, a kubala mu cipati 4 ca Bakorinto Babili, ku ntalisyo buyo. Lino mu ba Filipi, cipati 2, Ndiyo bala lutaanzi.

Kakutanaba kubala, atu kombe.

<sup>17</sup> Mwami Jesu, Ijwi Lyako Mbwini. Elyo omu mu oora licitya mapenzi ndyo tupona, cisi kulwana cisi, malwazi ajaya, mizunzumo yanyika mu masena manji, myoyo ya bantu ilawizuka, kuyoowa, tula bona bulemba aa bwaanda. Lino, omu mucitikilwa mwakunyama, kutegwa nyika yoonse icibone eci. Pele lino kuli mucitikilwa mwa kumuuya, akwalo, alimwi tula bona zicitika zipati, alimwi tu yanda kukanana nzizyo sunu.

<sup>18</sup> Longezya Ijwi Lyako ku moyo wesu. Tu lizi kuti kunyina muntu mu Julu nanka mu nyika weeleta kubweza Bbuku eli, kunamatula Zinamatizyo, nanka kulanga ali Ndilyo, akwalo. Pele kwakali Omwe wakalibonya, Mwanaambelele wakajaigwa, wakazwide malowa, oyo wakaboola a kubweza Bbuku, nkabelia wakalikweelela a kukonzya ku Li jula. O Mwanaambelele wa Leza, kojula Ijwi Lyako ku myoyo yesu sunu, ku luumbulizyo.

Tuli balanda Bako. Kolekelela zibi zyesu, Mwami. Elyo kufumbwacintu eci ciyo kasya Ijwi kweenda a nguzu zipati a koongelezya sunu ku maumi esu, kocigusya, Mwami, kufumbwa cisinkila, kutegwa tube akuzwidilila kuzwide ku zilongezyo zyoonse zyaka syomezegwa kuli ndiswe kwiinda ku Ijwi Lyako. Twa cilomba mu Zina lya Jesu. Ameni.

<sup>19</sup> Ba Filipi 2:

*Ikuti na kuli lugwasyo luli loonse muli Kristo, ikuti na lutontozyo luli loonse lwa luyandisyo, ikuti na lusuwaanano luli loonse lwa Muuya, ikuti na buuya buli boonse bwa luse,*

*Amuzulizye lutangalo lwangu, kutegwa mube mizeezo iikozyenye, mukuba a luyandisyo lukozyenye, kuba mu kuzuminana kukozyenye, kwa—kwa muzeezo omwe.*

*Kutabi cintu cicitwa kwiinda mu nzwango na mukulisumpula; pele muku libombya kwa muzeezo akube kuti umwi alanganye i umwi kabotu kwiinda lwabo.*

*Aumwi muntu ata langi ku zintu zyakwe zini, pele muntu uli oonse akwalo ku zintu zya bamwi.*

*Amulekele oyu tuyeyo ube muli ndinywe, oyo akwalo wakali muli Kristo Jesu:*

*Oyo, mukuba mu ciimo ca Leza, takayeyea kuti ncivuumuko kweelana a Leza:*

*Pele takali pangila mpuwo mwini, nkabela wakali bwezela ciimo ca muzike, alimwi wakabambwa mu cinkozya ca bantu:*

*Elyo mu kujanwa mu bupange bwa muntu, wa kalibombya mwini, akuba sikuzumina ku lufu, alwalo lufu lwaku ciingano.*

<sup>20</sup> Lino ikuti na tuyos jula lino ku Bakorinto Bibili, cipati 3, tuyos talika a kampango 6, elyo ku cibala kusika ku ka 18, elyo kuselemuka ku cibeela ca cipati 4.

*Oyo akwalo wa tubamba kuba bakutausi beeleta iba cizuminano cipyta; kutali ba ilungwalo, pele ba muuya: nkambo lungwalo lulajaya, pele muuya nguupa buumi.*

*Pele ikuti na milimo ya lufu, yakalembwa a ayengwiidwe mu mabwe, yakali yabulemu, cakuti bana ba Israyeli teeba kakonzya kuzilikizya kubona kubusyu bwa Musa ku bulemu bwa ciwa cakwe; obo bulemu bwa keelede kwiindilila:*

*Mbobuti buli mulimo wa muuya mbou takakonzyi kwiinda kuba wabulemu?*

*Nkambo ikuti na mulimo uupa milandu ngwabulemu, nkunji loko mboucita mulimo wa bululami kwiindilila mu bulemu.*

*Nkambo acalo eco caka bambwa kuba cabulemu tacikwe bulemu mu makani aceeci, kwiinda ku twaambo twa bulemu obo bwiinda kubota.*

*Nkambo ikuti na eco ceede kulaoba caba cabulemu, nkunji kwiinda ca... eco cibedelela kuti nca bulemu.*

*Mukubona mpawo kuti tu jisi bulangizi buli boobu, twe elede kapati... bukanazi bwaantangalala, tubelesya bukanazi bupati bwaantangalala.*

*Elyo kutali mbuli Musa, oyo wa kabikka cisitilizyo kubusyu bwakwe, kuti bana ba Israyeli bata konzyi kudunamina kulanga ku mamanino aceeco caka lesegwa:*

*Pele mizeezo yabo yaka ofwaazigwa: nkambo kusikila ku buzuba obu nkocicili cisitilizyo nciconya kacitagwisidwe mu kubala kwa cizuminano cakale; eco cisitilizyo cila lobesegwa muli Kristo.*

*Pele akwalo kusikila ku buzuba obu, cindi Musa nabalwa, cisitilizyo cili atala lya myoyo yabo.*

*Nekubaboo cindi caa ku nyonewa ku Mwami, cisitilizyo ciyo gusigwa.*

*Lino Mwami ngo Muuya oyo: elyo oko kuli Muuya wa Mwami... kuli bulubusi.*

*Pele swebo toonse, a masyu mavumbulule mbuli mu ciboniboni tulabonya bulemu bwa Mwami, twa cinca kuba mu cinkozya nciconya kuzwa ku bulemu kuyaku bulemu, akwalo mbuli kwiinda ku Muuya wa Mwami.*

*Nkokuti mukubona kuti tu jisi ncito eyi, mbuli mbo twa katambula luse, ta tulengaali pe;*

*Pele tuli sowede zintu zisisidwe a zita syomeki, kutali kweendela mu bupyungi a kulanganya ijwi lya Leza calveeno; pele kwiinda ku luyubunuko lwa bwini kulipa imulandu tobени ku manjezeezya aa muntu aumwi kumeso aa Leza.*

*Pele ikuti na makanimabotu esu alisisidwe, alo alisisidwe kuli mbabo balo basweekede:*

<sup>21</sup> Akube kuti Mwami ayungizye zilongezyo Zyakwe ku kubala kwa Ijwi Lyakwe!

<sup>22</sup> Lino, ciiyo cangu cifumo cino, Ndi syoma kuti Leza uyo yubununa eci. Elyo ciindi aciindi, ikuti na nywebo nomubweza mateepu a kuswilila, elyo Nda langila a kusyoma kuti—kuti mwakaba akumvwisya kwa kumuuya kwa ceeco Leza ncali kusola kumvwisya Mbungano kakutakwe ku caamba mpoonya

awo. Mwabona? Calo ncintu, ciindicimwi, twe elede kwaamba zintu munzila eyo kutegwa canyongola, kutegwa caleta bamwi kuzwa, bamwi kwiinka, a bamwi ku—ku—kuyeeya. Pele eco cila citwa cabukanze. Ceelede ku citwa munzila eyo.

<sup>23</sup> Mpawo inga caba kuti bamwi bayo wamba, “Waamba kuti Leza inga wa cita cintu mbuli ceeeo cakukanza?” Wa kacita ncobeni. Ula cicita.

<sup>24</sup> Wa kaamba bumwi buzuba, cindi Na kajisi bali zyuulu baka Mu bungilide, Wa kati, “Mwa talya Mubili wa Mwana wa Leza, na Mwana wa muntu, a kunywa Bulowa Bwakwe, tamukwe Buumi muli ndinwe.”

<sup>25</sup> Ino musyobonzi kaambo nko tuyeeya kuti dokotela wabusilisi na narsi, na kufumbwa muntu mubotu mupampu ncanga wa yeeya kujatikizya kaambo mbuli kaako, ku Muntu oyo wa kajisi mulimo mbuli Ngwa kajisi? Nkaambonzi, ncanga waamba kuti, “Amulye mubili? Obo mbusindyabantu! Kunywa bulowa bwa muntunsi? Ngu sikunyonka bulowa bwabantu! Mu majwi amwi, Utu yanda kuba basindyabantu a basikunyonka bulowa bwabantu.” Elyo bbunga lyoonse lyakeenda kuzwa kuli Nguwe.

<sup>26</sup> Elyo kwakali kabunga ka bakutausi kakali a Nguwe, ibakali makumi ali ciloba, abo baka salidwe. Elyo Wa kavuuluka kuli mbabo, elyo Wa kati, “Ino moyo yeeya nzi cindi mwa kubona Mwana wa muntu kaya kujulu oko Nkwa kazwa?” Lino, Ta ka pandulula eco. Ta kapandulula *nzila*; Paulo waka cita eci nikwaainda ciindi. Wa ka Ca amba buyo. Mwabona? Elyo mpawo cindi eci, Wa kati, “Ino moyo amba nzi,” ku bakutausi aba, “cindi mwa kubona Mwana wa muntu kaya kujulu oko Nkwa kazwida?”

<sup>27</sup> Taakwe kuzumbauzya bantu abo ba kati, “Lino, kwakaindi kaniini buyo. Oh, tula lya a Nguwe. Tula zela nswi a Nguwe. Tula ona a Nguwe. Tu—tu lizi oko Nkwa kazyalilwa. Twa ka bona kalo omo Mwa—Mwa kali kulyuumba. Elyo mbobuti oyu Muntu... Oyu mwaambo muyumu.”

<sup>28</sup> Elyo Bbaibbele lya kati, “Tiiba kacili kweenda a Nguwe.” Ba ka Musiya.

<sup>29</sup> Mpawo Wa kasyala abali kkumi ababili. Wa kasalide bali kkumi ababili, elyo umwi wabo wakali dyabulosi, Mba kaamba. Aboobo Wa kavuulukila kuli mbabo.

Elyo taakwe umwi waka konzya kupandulula eco Nea kaamba. “Mbobuti mboba yoolya Mubili Wakwe a kunywa Bulowa Bwakwe? Alimwi mbobuti Mbwa kaboola ansi, kakuli Wa kazyalilwa mpoonya awa aa nyika?” Mwabona? Tiiba ka Ci mvwisya.

Elyo mpawo Wa kavuulukila ku baapostolo, elyo Wa kati, “Sa muyanda kwiinka a nywebo?”

<sup>30</sup> Elyo ndendilyo Muapostolo Petro nakaamba kaambo ako kapati, "Mwami, tula unka kulini?" Mwabona? "Nkambo tuli kkutilide. Tuli Kuzyi kasimpe, elyo Yebo olikke, ujisi Ijwi lya Buumi lya oora eli." Mwabona? "Alimwi tuli kkutilide kuli ceeco." Mwabona, tiiba kakonzya ku Ci pandulula. Ba . . .

Tamu konzyi kupandulula lusyomo. Ncintucimwi eco nco syoma, alimwi cili tonkomene kabotu cakuti taakwe cintu ciyo tola busena bwaco.

Nkokuti, ba kalizi kuti Ijwi eelyo lya kalembelwa bukkalo obo obo mobakali kuponamo, bukkalo bwa Bumesiya, kuti Wa keeleta busena obo kabotu. Elyo ino niba kacita nzi kujokela muli ngao mambungano ali kabotu, atontola omo moba kazwa? Kati, "Nkokuli nko tunga twaunka?" Mwabona? "Tuli lamidwe mubuzule kuti Ujisi Ijwi lya Buumi." Mwabona? Elyo tiiba—tiiba ka konzya ku Li pandulula, pele baka Lisyoma. Mwabona?

<sup>31</sup> Elyo Jesu wakaamba boobo kucesya mbunga Yakwe, mwabona, kusikila Wa kabikka nkamu antoomwe. Elyo kuzwa ku bantu abo boonse, balo, bali kkumi aumwi babo mboba kamvwisya ncobeni Obo Mbwa kabede. Ba kalizi kuti Wa kali Leza, alimwi Leza alikke. Lino, i . . .

<sup>32</sup> Ciiyo cangu cifumo cino nku yubununa, na, kutondezya Leza oyo.

<sup>33</sup> Leza lyoonse, mu bukkalo boonse, kayuba kunze lya cisitilizyo, makkalo oonse, pele Wa kali Leza ciindi coonse. Mwabona? Pele Wa kazumanana kulisia Lwakwe kuzwa ku inyika, alimwi ulaliyubununa Lwakwe ku Basale Bakwe, mbuli baapostolo ku buzuba obo. Lino, oyo wakali Leza kakanana muli Kristo.

<sup>34</sup> Lino, muntu lyoonse, bwakali bulenge bwa muntu, wa kayandaula (cakunyama) Leza oyo. Wa kali kuyanda lyoonse ku Mu bona. Muntu wakapanga zilenge ezyo zili mbuli Nguwe. Ba yeeya i . . . Bama India bakali kukomba zuba. Elyo—elyo tula jana, mu Africa, ziimo zyandeene zya banyama, azimwi zimbi. Elyo kutala . . . zisamu zilamfu zijiisi ziiminizyo a zifwanikiso mu Alaska, a—a ziimo zyandeene ezyo nzo bayeeya kuti Leza mwabede. Mbuli Paulo mbwa kakanana okuya ku Atemi ciindi eco, ku mulundu wa Marsi, a kubaambilila kuti bakali basimalweza kujatikizya Leza oyu utazizilwe, kuti, ba kalizi kuti Wa kaliko pele nekuba tiiba ka Mu zyi pe.

<sup>35</sup> Elyo aboobo tula jana akwalo kaindi kule mbuli kuli Jobu. Jobu wakalizi kuti kwakali Leza. Wa kalizi. Elyo takukwe i—i bantunsi, mukuyeeya kwabo kukkwene, pele abo bazi kuti kweelede kuba Cintucimwi kubusena bumwi. Elyo, lino, Jobu wakali kuyanda kwaambaula kuli Nguwe.

Elyo Ndi yanda kuti mubone ciimo Leza eco nca kasala kwaambawida mumo kuli Jobu. Leza wakali vumbilidwe cindi Na kaambaula kuli Jobu. Wa kali vumbilidwe mu kambizi,

kaseluka mu kambizi. Mula syoma kuti Leza uciboola mu kambizi kuti inga waboola awo mpo mubona? [Mbunga yaamba, “Ameni.”—Mul.]

<sup>36</sup> Kuli basyoonto bakkedo awa, imweelwe, abo bakali atoomwe a ndiswe buzuba bumwi cindi Na kaboola mu kambizi. Katwaambila buzuba kabutana, Mukwesu Banks Wood a mbabo, cindi Na kati, “Kobweza Mwaala oyu, koufusa mujulu mu muuwo, a kwaamba, ‘MBUBOOBU MBWAAMBA I MWAMI! Uyo cibona ndyoonya awo.’” Elyo Nda kabweza mwaala, mujulu atala lya cilundu, kaufusila mujulu mu muuwo, elyo i...mubwini, kuboola ansi, kwaka talika kambizi, mwabona, kunyonka kwa nkako.

<sup>37</sup> We elede kucita cintucimwi ku citya cintucimwi ku citabela. Jesu wa kabweza kabeela ka cinkwa a ku kakomona, mpawo akuvuzya kuzwa ku kabeela ako ka cinkwa. Wa kabweza meenda, kaatilila mu jaaki. Eliya wakabweza munyo, a kuubikka mu cinkuli; katyola kasamu, kakafusila aa meenda. Neintucimwi ca kwiiminizya.

Elyo kubweza mwaala oyu a kuufusila mujulu mu muuwo, a kuboola ansi kwakatalisyva kambizi.

<sup>38</sup> I buzuba bwa katobela, baa, kwakali mukutausi antoomwe a ndiswe mu lweendo lwa kuvwima. Wa kaimvvi munsi, elyo wa kati kuli ndime, “Sena Mwami ulavozya zilengaano mbuli boobu, Mukwesu Branham?”

<sup>39</sup> Nda kati, “Iyi, pele kanjikanji Ndi boola kokuno kuzolyookezya.” Elyo mpawo buyo cilengaano cakaboola.

<sup>40</sup> Elyo Mukwesu Borders, Ndi yeeya kuti ulaanze lino, wa antoomwe. Mukwesu Banks Wood, Ndi yeeya, elyo, oh, basyoonto bali kutala okuya, lusele na kkumi. Elyo Mukwesu Banks Wood kulangilila ceeci. Mpoonya aa cilundu, mpoonya oonse awo, mbubonya, kutandila cisela ca maile lyomwe oko Baangelo bali ciloba nkuba kalibonya, eco Nee kazwida okuno a kuunkila okuya, abo bakajokela a kwaamba i... kujatikizya Zinamatizyo zili Ciloba. Kutandila buyo cisela ca maile kuzwa kooko.

<sup>41</sup> Elyo mpawo buzuba bwakatobela, cindi eci nicakali kucitika, baa, i...Nda kati ku mukwesu, oyu mukwesu, Nda kati, “Ino ndipenzi nzi lyako, ujisi cikoolo mu liso lyako. I bamadokotela basola kwa myaka minji kucilesya nkabela taba konzyi ku cicita. Ba amba kuti uyo...ciyoolya liso lyako do.” Elyo Nda kati, “Pele utapengani, Mwami Jesu wazwidilizya lusyomo lwako.” Elyo wa kalosya buyo ntobolo yakwe. Elyo Nda kati, “Ba nyoko,” mbubonya mbo bakabede buyo a cintu calubide kuli mbabo.

Elyo wa kati, “Obo mbwini.”

<sup>42</sup> Mukwesu Roy Roberson kuzwa ku mbungano okuno, nkwalili uliimvwi, Nda yeeyela nyoonse muli muzi. Kuziba kuti wa kali siluzibo, a kuziba eco cakali kuyo tola busena, Nda kabikka janza lyangu aa kkuko lyakwe; Nda kati, "Mukwesu Roberson, ko cenjela, langilila, cintucimwi cilaafwi kucitika."

<sup>43</sup> Nda kajokela kooko Nkwe keelede kwiimina, elyo kuzwa mu muuwo kwa kaboola kambizi, kuselemuka kwiinda mu kkuti damfu, kuzwa aatala, ako kakali kapati loko kusikila kakazapaula myaala, mainchi ali lusele na kkumi mukati, kuzwa atala lya cilundu, akwa waala kwa mayaadi ali myaanda yobilo kubusena mukati. A kukamba ziindi zyotatwe mbuli boobo, nkabela Jwi lyakazwa kuli nkako. Mwabona?

<sup>44</sup> Elyo boonse babo kabaimvwi okuya. Mukwesu Banks, nkwalili lino, kasika kutala a kuti, "Sa nceeco ncoka ndaambila jilo?"

Nda kati, "Iiyi, munene, nce ncico."

Wa kati, "Lino, ino Lya amba nzi?"

<sup>45</sup> Nda kati, "Lino, eco nci cangu buyo kuziba, Mukwesu Banks, wabona, nkaambo cakali... Inga cayoosya bantu."

<sup>46</sup> Pele Lya kayaambele, caka citika buyo aniini... kweenda kutozya kunyika. Aniini, nikwakainda mazuba masyoonto Lya kauma mu lwizi, elyo mwakabona cakacitika kuzunguluka Fairbanks. Cakali citondezyo ca lubeta. Lino tu jana kuti-kuti Leza uci... Nywebo mwabona, nicaka bikka bantu mukulibiliika. Elyo aboobo mpawo ba ka... Eco cakeelede kucitika, mwabona. Ceelede buyo kucitika. Zintu ezyo zyeelede kucitika zyeelede kucitika, kufumbwa. Mwabona, ciyo citika, kufumbwa.

<sup>47</sup> Musa ciindi comwe wakayanda kubona Leza, elyo Leza waka mwaambila kwiima aa mwaala. Elyo, aa mwaala, Musa wakaima nkabela wakabona Leza kainda kumbali, elyo sule Lyakwe lyakali kulibonya mbuli sule lya muntu. Leza wakali mu kambizi, alimwi Leza... kuciindi Musa nakaimvwi aa mwaala.

<sup>48</sup> Nda yeeyela nyoonse mwakabona cifoto okuya buzuba bumwi, twa kaima munsi lya mwaala nguwenya. Elyo ngooyu Mumuni oyo, Angelo wa Mwami, mpoonya awo mpo Lya kakambila. Nke imvwi... Cili mpoonya aa bboodi lya zyakuzibya kubuleya okuya lino, alubo.

<sup>49</sup> Amubone, Jehova wa Cizuminano Cakale ngu Jesu wa Cizuminano Cipy. Mwabona? Ngu Leza nguwenya, kuncica buyo ciimo Cakwe.

<sup>50</sup> Lino, umwi wa kati buzuba bumwi, i—i—i mukutausi wa Baptisti okuya mu Tucson, "Mbobuti mbo konzya kwaamba kuti—kuti Jesu a Leza inga waba Muntu nguwenya?"

<sup>51</sup> Nda kati, "Ee, ncuuba loko ikuti na wagusya buyo kuyeeya kwako kwini, a bwaambe bwa Bbaibbele lya ncico.

Balo Ncilenge comwe. Leza Muuya; Jesu mubili omo Mwa kavumbilidwe. Mwabona?" Nda kati, "Mbuli mu ng'anda yangu. Ku mukaintu wangu, Ndili mulumi wakwe. Alimwi Ndi jisi mwanamusimbi muniini, Rebekah, Ndime wisi. Alimwi Ndi jisi muzukulu mulombe, elyo zina lyakwe ngu Paul, Ndili basyaanyinakulu. Ndi mulumi, taata, asyaanene. Elyo mukaintu wangu ta jisi kutaminina ali ndime mbuli taata na syaanene; ujisi kutaminina ali ndime mbuli mulumi kwamana. Elyo mwanamusimbi wangu ta jisi kutaminina ali ndime mbuli mulumi na syaanene; walo mwana wangu. Mwabona? Pele nekubaboobo boonse aba bantu botatwe muntu nguwenya. Mwabona? Oyo ngu Leza; Taata, Mwana, a Muuya Uusalala, nkutaminina buyo kwa mabanze." Leza nguwenya, nguwenya Leza.

<sup>52</sup> Leza wakali cinca Mwini, lacinca ciimo Cakwe. Ikuti mwabona awa mu ba Filipi, Wa kati, "Kutali kuyeeya ncivuumuko, pele kabweza *ciimo* ca muntu."

<sup>53</sup> Lino, bbala lyaci Griki awo lya *ciimo* eco, Nda kali kulilanga koonse buzuba boonse jilo, kusola kuyeeya obo mbolya kabede, Nda jana, kuboola a bbala eli lya *en morphé*. Lya kasipelwa kuteeti e-n m-o-r-p-h-e. Kulanga muci Griki, kujana obo *en morphé* mbolya kabede... Inga ndalyaamba buteellede, pele kaambo Nceli sipla, cindi na teepu yalekelwa kubuleya, bantu bayo, bayiide kuzisale bayo, ziba eco Nce—Nce amba kuli ndilyo. Walo, cindi *en morphé*, eco caamba kuti Wa kalicinca Mwini. Wa, Wa kaboola aansi. Lino, bbala lyaci Griki okuya lyambla, kuti, "Cintucimwi eco catakali kukonzya kubonwa, kakuli nkocili, elyo mpawo cacincwa nkabela liso lilakonzya kucijata." Mwabona?

<sup>54</sup> Mbuli Eliya mbwa kabede, ku Dotani. Mwabona, i—i muzike taka konzya kubona Baangelo boonse abo bakazungulukide okuya, elyo Leza wakacinka buyo; kutali kuti wakaleta Baangelo ansi, pele Wa kacinca kubona kwa muzike. Elyo kwakali malundu aazwide Baangelo, a mulilo, mabbiza aa mulilo, a nkalaki zya mulilo, koonse kuzunguluka musinsimi Wakwe. Mwabona, balo, Wa kacinca kubona. I—i cintu nkocili kale.

<sup>55</sup> Aboobo, eco Nce sola kwaamba, kuti Leza oyo wakaliko lyoonse nkiali. I cintu biyo Nca kacita cindi Na kaba muntu, Wa kacinca cizwato Cakwe. Mwabona? Wa—Wa, oyu *en morphé*, Wa—Wa kalicinca Mwini kuya kuli obo Mbwa kabede kuli obo Mbwa bede, na cizwato Cakwe, musobano umbi.

<sup>56</sup> Mbuli mu cisobano cipati. Mbuli Mbweli kukanana cifumo cino, kubaanga nkuziba ali oyu Shakespeare. Calo nciindi cilamfu. Pele cindi Shakespeare naka lemba i—i cisobano, i... ca King James waku England, cindi na... syakacite wa Macbeth. Mwabona, Shakespeare takali kusyoma mu balozi; pele mu cisobano, nkambo mwaami wakali kusyoma mu balozi, aboobo

wa kacita kusanganya balozi. Mwabona? Elyo lino, kutegwa kucitwe ceeci, bala cinca misamino.

<sup>57</sup> Becky okuno, mu *Carmen*, ba kacisobana eco mu i—mu i cikolo oko nkwa kazwa ku manizya mbali ya lwiiyo mwiki zisyoonto zyainda. Lino, ambweni muntu omwe wakasobana zibeeala zyotatwe na zyone. Kutegwa kucitwe eco, wa—wa kacinca cizwato cakwe. Zimwiziindi ula boneka, ngu syakacite *oyu*; elyo ciindi citobela ula boneka, ngu syakacite umbi. Pele kwalo muntu nguwenya ciindi coonse.

<sup>58</sup> Elyo oyo ngu Leza. Wa kalicinca Mwini kuzwa—kuzwa ku Musumpululu wa Mulilo, kuba Muntu. Mpawo kalicinca Lwakwe kuzwa obo, kujokela mu Muuya alubo, kutegwa A kkale mu muntu. Leza kacitauka mu muntu obo Mbwa kabede ncobeni. Jesu Kristo, wakali Leza kacitauka mu Muntu, mu i Muntu. Mu i Muntu, obo mbobubo Mbwa kabede. Wa kacinca kuzwa ku Musumpululu wa Mulilo, elyo mpawo wakanjila; cakali cisilitizyo mu nkanda, eco cakasisa Leza kuzwa kuli Israyeli. Musa wa kabona bubambe bwa mubili Wakwe, pele ncobeni Wa kali sisidwe ciindi coonse kunze lya Musumpululu wa Mulilo, oyo wakali Logosi wakayutuka kuzwa kuli Leza.

<sup>59</sup> Lino tula jana awa, lino kuzwa lya Pentekoste, Leza tali mukucitauka *mu* muntu, na kucita...lino Uli mukucitauka *kwiinda* mu muntu. Mwabona? Wa kali kucitauka *mu* Muntu kaindi, Jesu. Lino Uli mukucitauka *kwiinda* mu muntu oyo Ngwa salila bukanze obu. Leza, mu ciimo ca muntu, Wa kalicinca Mwini kuzwa ku ciimo ca—ca i...ca Leza, ku ciimo ca muntu.

<sup>60</sup> Wa kaboola mu mazina otatwe, mazina otatwe aa mwana. Wa kaboola mu Mwana...zina lya Mwana wa—wa muntu, Mwana wa Davida, a Mwana wa Leza; mazina otatwe aa mwana.

<sup>61</sup> Lino, Wa kaboola lutaanzi mu Mwana wa Da...Mwana wa muntu, nkaambo Wa kali Musinsimi. Lino, Jehova Mwini wakaita Ezekieli a basinsimi, “Mwana wa muntu, ncinzi nco bona?” Jesu taakwe nakalyaamba Mwini mbuli Mwana wa Leza; Wa kalyaamba Mwini mbuli Mwana wa muntu, nkaambo i—i Magwalo taakonzyi kususigwa.

Taku konzyi kuba cintu cisusigwa mu Magwalo. Ijwi lyoonse lyeelede kuba boobo. Eyo nje nzila Mbwe cisyoma. Eyo nje nzila mbo Lye elede kuba, kutali kuti nkaambo Nda cisyoma, nkaambo Ndi Ijwi lya Leza.

<sup>62</sup> Lino ikuti mwalanga ku matalikilo, Ijwi lyomwe, peeji litaanzi mu Bbaibbele, muli Matalikilo 1, tu jana kuti yoonse... Malwazi oonse, buusu boonse, kuciswa mitwe koonse, a zintuzyonse ezyo zyakasola kucitika ku bantunsi, zya kaboola nkaambo ka muntu *omwe* watakasyoma Ijwi *lyomwe*, kacitya zyoonse ezi. Oko nkutalika kwa Bbaibbele. Mu mamanino aa Bbaibbele, Ci'yubunuzyo 22, Leza nguwenya wa katı,

“Kufumbwa oyo uyogusya Ijwi lyomwe kuzwa kuli Leeli, na kuyungizya bbala kuli Ndilyo.” Mwabona, lyeelede kuba Ijwi ku Ijwi, nzila buyo mbo Li bede.

<sup>63</sup> Aboobo, nkokuti, elyo kubweza buyo kantu kaniini mbuli Mbe yo . . . muntuumwi lyoonse ula ndisampaula kujatikizya banakazi kugela masusu abo. Lino, kuli ndime, kufumbwa biyo kuti ka cita boobo, Nse kwe ndaba obo cabusalali mbwa cita a kunji oko nkwazi, walo ucilubide. Usama zibbudula a zisan ezi mbuli zeezyo; Nse kwe ndaba eco ncacita, obo kunji mbwakonzya kwimba, obo kunji mbwakonzya kukambauka kabotu, kufumbwa nca konzya kucita, musyobo nzi wa buumi mbwa pona, licili ndilyonya Ijwi lyomwe lityolwa. Mwabona? Mwabona, lyeelede kuba Ijwi lyoonse. Kutali muzila wamabala; i Ijwi, Ijwi lyomwe! Aboobo, Bbaibbele talikwe bupanduluzi kumuntu omwe. Lyeelede kuba Ijwi ku Ijwi, inzila Mbo lilemedwe. Twe elede kuli syoma Eelyo.

<sup>64</sup> Elyo kutali buyo ku Li syoma, pele kupona Ndilyo. Ikuti na tatu poni Ndilyo, nkokuti tatu Li syomi; twa amba buyo kuti tula cita. Mbuli Mbwe . . . Kulanganya kujokela kuli ceeco Nce wamba, basikwiya abo tiiba kakonzya ku Li pandulula, pele baka Li syoma, nekuba, alimwi bakacita kulyaambilila kwabo a kupona kuli nkuko. Cindi boonse babo niba keenda kazwa kuli Ndilyo, ba ka kkala a Ndilyo! Ba ka Li syoma! Eyo njenzila mbo tu cita. Eyo njenzila mbo mweelede ku cicita. Kunyina makani eco muntuumwi umbi nca cita, tula Li syoma elyo mpawo tula Li bikka mu micito. Ikuti na tamu ciciti, nkokuti tamu Li syomi.

<sup>65</sup> Lino amubone lino mbuli Mbwa kaboola, Wa kaboola mbuli Mwana wa muntu, nkaambo Lugwalo Lusalala lwakati Uyo cita, “Leza uyo babusizya Musinsimi.” Aboobo Na takaboola kuliita Mwini mbuli Mwana wa Leza, nkaambo tee bwakali bubanze obo. Wa kali Mwana wa muntu kasinsima, kuzulizya, a kuyubununa kuli mbabo zintu zyoonse ezyo zyaka citwa, a kukozyanisigwa obo Mbwa kabede. Mpawo Wa kali aa nyika mbuli Mwana wa muntu.

<sup>66</sup> Amulange ulya mwanakazi muna Sirofonika mbwaka Mu zuzila, a kwaamba, “Yebo Mwana wa Davida, ko ndifwida luse!” Taakwe nakanusya mutwe Wakwe. Ta ka jisi kutaminina ali Nguwe mbuli Mwana wa Davida. Waa kali Munamasi.

Mboonya buyo mwana wangu musimbi mbwa tajisi kutaminina ali ndime mbuli mulumi; na, mukaintu wangu, mbuli mwanamusimbi. Nekubaboo, walo mwana wangu musimbi a mukaintu wangu, mwana wangu musimbi mu Makanimabotu. Pele, kwaansi, ta jisi nguzu zya kundiita kuti i—i taata. Mwabona?

Lino amubone, oyu mwanakazi Munamasi ta ka jisi kutaminina ali Nguwe mbuli Mwana wa Davida. Pele Batimeyu

moofu wa kacita, mwabona, wa kali mu Juda. Lino, Wa kaboola mbuli Mwana wa muntu.

<sup>67</sup> Mwe elede kuziba mabala aya a zintu ezi. Amulange kuli Hattie Wright eco ciindi, kucindi ca Kukwelwa Kwatatu. Mula ciyeeya. Ku zintuzyonse, ulya mwanakazi wakaamba cintu cili kabotu. Mwe elede kwaamba elyo bbala lili kabotu, cintu cili kabotu kuli Leza.

<sup>68</sup> Amubone lino, Wa kaboola lutaanzi mbuli Musinsimi, elyo ba ka Mu bambula. Bakwe Beni ba ka Mu bambula. Wa kaboola mbuli Mwana wa muntu.

<sup>69</sup> Mpawo Muuya Uusalala niwa kaboola, Wa kali Mwana wa Leza. Leza Muuya. Wa kali Muuya Uusalala, Mwana wa Leza. Wa kapona kwiinda mu makkalo aa mbungano mbuli Mwana wa Leza.

<sup>70</sup> Lino, mu Mileniamu, Uyo oba Mwana wa Davida, kakkede a Cuuno cabwami wisi Wakwe, Davida. Walo Mwana wa Davida, lino.

<sup>71</sup> Elyo, amwiibaluke, akati ka Mwana wa Leza . . . Mu bukkalo bwa mbungano ibwa Laodikeya, ba Mu bikka anze. Elyo muli Luka, Wa kati Uyo yubununwa alubo mbuli Mwana wa muntu, Musinsimi, kuzulizya kumwi kwa ndulo. Mwabona? I Magwalo ala swaanganya cakulondoka antoomwe. Mwana wa muntu, Mwana wa Leza, Mwana wa Davida. Ino cakali cinzi? Ngu Leza nguwenya ciindi coonse, kucinca buyo ciimo Cakwe, *en morphe*. Uci cinca buyo. Ncisobano cipati kuli Nguwe. Uli muku cikutaula.

<sup>72</sup> Wa kaboola mbuli Mwana wa muntu, Musinsimi. Kacita mbubonya. Alakwe mwanakazi ulya muniini mu cibi cakwe coonse, okuya ku mukalo, waa ka Mu ziba. Waa kati, "Tu lizi Mesiya ulaboola, oyo utegwa Kristo, eco Ncayo cita." Mwabona, waa kaziba nkaambo waa kali Mbuto yakakanzwa. Mpawo waa . . .

Oko, bamwi babo tiiba ka Li ziba. Taakwe nciba kajisi cakuziba aco. Ba kali mu cibi, ku kutilika.

<sup>73</sup> Nkambo, nkambo micito Yakwe, Ula cinca ciimo Cakwe. Mpawo Wa kaboola kali ciimo ca Mwana wa muntu.

Nkambo bukkalo bwa basilubambululo, Wesley, Luther, a boonse mucindi cakatobela, mpawo tu jana kuti bakaangwa loko, buyo mbuli bana Israyeli mboba kacita, kusikila cindi Ali bonya ku mazuba aamamanino, mu bukkalo bwa Pentekoste, mbuli Muuya Uusalala, ba ka Ukaka. Ba ka cita cintu neiconya Israyeli nca kacita.

Elyo ino Ucita nzi lino? Kujokela mbuli Mwana wa muntu. Elyo mpawo, kuzwa kooko, Mwana wa Davida. Sa mwabona obo mbo tuli munsi? Mwana wa muntu, Mwana wa Davida, Mwana wa Leza. Wa yubununwa mu mazuba aamamanino mbuli

Mwana wa muntu, kweendelana a Malaki 4, zyoonse zimwi zya zisinsime zjatikizya oora eli. Takucikwe limbi kubeleka aa mbungano Ama na ku...Ba Mu bikka aanze; busena bwanze, kakonkomona aa mulyango. Mbuto zimwi zyakakanza mozili omuya, mozicili. We elede kusika kuli nzizyo.

<sup>74</sup> Elyo Leza, mu muntu, waka lisukumuna Mwini. Joeli 2:28, tu jana kuti, Wa kati, "Ndiyo tila, mu mazuba aamamanino, Muuya Wangu." Lino, ikuti na mwalandisya bbala awo, bbala lyaci Griki. Inga ndaba aceeci buteede, pele limwi Nde konzya kujana...

<sup>75</sup> Mwe elede kulangisya mabala. I Cikuwa ziindizimwi caamba bupanduluzi bobilo. Mburonya buyo mbuli bbala ndyo twaamba, "kaleza." "Leza wa kalenga majulu a nyika," Matalikilo 1. Pele lino, mu Bbaibbele, Lyu kati, "Ku matalikilo Elohimu." Lino, Elohimu, Chikuwa ciita kuti "kaleza," pele tii cakali mbubo ncobeni...*Elohimu*...Kufumbwa cintu cilakonzya kuba kaleza, ku bbala *kaleza*; mulakonzya kupanga cibumbwa kaleza; mula konzya kupanga piyaano eyo kaleza; mulakonzya kupanga cili coonse kaleza.

<sup>76</sup> Pele tacili booboo mu bbala *Elohimu*; Lyumba kuti, "Oyo uliponena." Mwabona? Eyo piyaano taikonzyi kuliponena ini, taakwe cintucimbi cikonzya kuliponena cini. Aboobo, bbala *Elohimu*, lyumba, "Oyo wakaliwo lyoonse." *Leza* ulakonzya kupandulula cintu cili coonse. Mwabona lwandaano mu bbala? [Mbunga yaamba, "Ameni."—Mul.]

<sup>77</sup> Lino, cindi ni Lyu kaamba awa kuti Wa *kalisukumuna* Mwini, na *kutila* koonse, lino, inga twa yeeya mbuli boobu, kuti Wa "kaluka," bbala lyu Chikuwa lyu *kusukumuna*, na *kutila* koonse kuzwa kuli Nguwe, mwabona, cintucimwi cakazwa kuli Nguwe eco cakaandeene kuli Nguwe. Pele bbala *kenosi*, muci Griki, ta lyambi kuti Wa "kaluka," na bumwi...Janza Lyakwe lyakazwa, na liso Lyakwe lyakazwa, muntu umbi.

<sup>78</sup> Nko kuti, Wa kali cinca Mwini, Wa "kalitila Mwini mukati," (Ameni!), mu cizwato cimbi, mu ciimo cimbi. Kutali muntu umbi wakazwa muli Nguwe, wiitwa kuti Muuya Uusalala, pele Wa kali Nguwe Mwini. Sa mwacimvwa? [Mbunga yaamba, "Ameni."—Mul.] Walo Mwini wakalitila Mwini mu bantu. "Kristo muli ndinywe!" Obo mbocili cibotu, obo mbocili cibotu, kuyeyea, Leza kulitila Mwini mu muntunsi, mu musyomi. "Kutila koonse!" Ca kali cibeela ca cisobano Cakwe, ku cita booboo.

Leza, buzule boonse, Buleza boonse camubili bwakali mu Muntu oyu, Jesu Kristo. Wa kali Leza, a Leza alikke. Kutali muntu watatu na muntu wabili, na muntu mutaanzi; pele i Muntu, Leza kavumbilidwe mu mubili wamuntu.

<sup>79</sup> Timoteo Mutaanzi 3:16, "Kakutakwe lukazyo makani aasisidwe mapati a buleza; nkambo L-e-z-a, Elohimu," mupati

L-e-z-a, mu Bbaibbele. Kwaamba kaindi, kufumbwamuntu. Lyaamba ku, mu bwaambe butaanzi, Lya kati, “Elohimu.” “Ku matalikilo, Elohimu.” Mwabona? “Elyo, Elohimu, kakutakwe lukazyo makani aasisidwe mapati aa Elohimu; nkambo Elohimu wakaba mu mubili wabantunsi! I Jehova mupati oyo wa kavumba mulengalenga oonse, ciindi, a koonse, wakaba muntu. Twa ka Mu jatauka, Elohimu. “Ku matalikilo, Elohimu. Elyo Elohimu wakaba mu mubili wabantu, waka kkala akati kesu.”

<sup>80</sup> Ninzi? Eyi ni nzila Yakwe, zibeela zya cisobano. Eyo njenzila Mbwa kacikutauka, nzila Yakwe yakuli yubununa Mwini kuli ndiswe mbuli muntu umwi wandeene. Tuli bafwika, alimwi Ulizi obo. Elyo tu mywisya buyo mbuli bafwika. Tu zyi buyo mbuli bafwika. Tu zyi buyo mbuli magano esu mbwayo tulekela kuziba, elyo cimwi cancico twe elede ku syoma kwiinda ku lusyomo. Twe elede kwaamba kuti kuli Leza; naa tula Mu bona, na pe, tula cisyoma, kuli koonse. Mwabona? Naa nkokuli na pe, tula cisyoma nkaambo Leza wakaamba booboo.

<sup>81</sup> Mboli Abrahamu, takali kukonzya kubona mwana oyo, taakwe zitondezyo, taakwe kumita kwa—kwa Sarah, taakwe akwalo kwiinka kumweezi na kufumbwacintu, pele nekuba Leza wakaamba booboo. Bulangizi boonse, alyalo zyalilo lyakwe—lyakwe lyakali fwide, a buumi bwakwe muli nguwe bwakali manide, elyo i—i kukunka kwa buumi bwakwe kwakali yuminide, a buumi bwakwe—bwakwe bwakali yumide muli nguwe. “Elyo nekubabobo tako zungaana aa cisomezyo ca Leza kwiinda mu kutasyoma, pele kali muyumu, kupa kulumbaizya, mukuziba kuti Leza wakali kukonzya ku cita kufumbwacintu Nca kaamba kuti Uyo cita.”

Njeeyo nzila mbo tweede kusyoma Ijwi eelyo sunu. Mbobuti mbo ciyooba? Ta ndizi. Leza wakaamba kuti ciyooba mu nzila eyo, nkokuti eco cacibamba.

<sup>82</sup> Nguni Muntu oyu mupati utabonwi? Nguni Oyu Abrahamu ngwa kabona mu zilengaano? Nkoonya ku mamanino, nekuba, Wa kayubululwa mu mubili, mwana katana boola. Leza Mwini wakaboola kuli Abrahamu mu ciimo ca muntu, ku ciindi camamanino. Kuyubululwa! Wa ka Mu bona mu Mumuni muniini ciindi cimwi; wa ka Mu bona mu zilengaano; wa kamvwaa Jwi Lyakwe; ziayubunuzyo zinji. Pele kakutana buyo mwana waka syomezegwa, wa ka Mu bona mu ciimo ca muntu, a kwaambaula kuli Nguwe, a ku Mu sanina nyama a cakunywa. Mwabona? Amubone, Leza Mwini kavumbilidwe mu mubili wabantunsi.

<sup>83</sup> Eci ncibeela ca nzila Yakwe. Eyi njenzila Nja kaliyubulula Mwini kuli ndiswe, ulayubulula Ijwi Litamani, Leza, Jehova waba mubili. Mboli mu Musalali Johane 1, “Ku matalikilo kwakali Ijwi, alimwi Ijwi lyakali antoomwe a Leza, alimwi i . . .

Ku matalikilo kwakali Elohimu, alimwi Elohimu wakali . . . kaba Ijwi, alimwi Ijwi wakali Elohimu. Elyo Ijwi lyakaba Elohimu.” Mwabona? Ncintu nciconya, kuvungulula buyo.

<sup>84</sup> Mbuli bube, mwabona, buli muli Leza. Ii bube muyeeyo wako. Leza ku matalikilo, Uutamani, Ta akali Leza akwalo. Wa kali Uutamani. Ta akali Leza akwalo; *Leza* walo “ncintu cikombwa,” na cintucimwi. Mwabona? Aboobo Ta akali booboo akwalo. Wa kali Elohimu, Uutamani. Pele muli Nguwe kwakali miyeeyo. Wa kali kuyanda kuba cintu. Elyo Wa kacita nzi? Mpawo Wa kaamba Ijwi, nkabela Ijwi lyakaba cintu. Eco nce cifoto coonse, kuzwa ku Matalikilo kusikaku Ciybunuzyo. Taakwe cilubide. Ngu Elohimu kali bamba kuba cintu kutegwa Ako nzye ku gumwa, kwaampwa. Elyo mu Mileniamu, ngooyo Elohimu kakkede aa Cuuno cabwami, mwabona, eco cili kabottu, a balelwa Bakwe boonse kaba Mu zungulukide, abo Mba kakanza kuzwa kumalengelo aa nyika.

<sup>85</sup> Mbuli muntu uyaka zilila na kupanga zilila, nkcombe. Mulangu aumwi weelede kulila bwaandeene kuli umwi oyo. I ziayaso nzyoonya, pele butale bunji boobu, lubulo lunji boobu, mukuba munji boobu, kuubamba kupa “kulila.”

<sup>86</sup> Eyo njenzila Leza mbwa kacita. Wa kasanganya cee ci kuli ceci ya, kuli cee ci kuli ceci ya, kuli cee ci kuli ceci ya, kusikila Wa kajana nciconya eco Nca kali kuyanda. Mbo mbubo Mbwa kaboola ansi. Leza wakalitondezya Mwini mu Musumpululu wa Mulilo muciindi cakatobela kwiinda mu basinsimi, mpawo mu Mwana wa Leza, omo, Wa kali Leza. Mwabona, ngu Leza nguwenya kayutuka mbubonya, kuzwaku bulondosi kuyaku bulondosi, kuzwaku bulemu kuyaku bulemu. Eyo nje nzila Mbungano mbo yeenda.

<sup>87</sup> Amubone, kwiinda mu makkalo, nzila njiyonya, kwiinda ku basinsimi Bakwe, Wa kalyubulula Mwini. Balo tiiba kali basinsimi ncobeni, ba kali tuleza. Wa kaamba booboo. Nkambo, eco nciba kaamba lyakali Ijwi lya Leza. Ba kali mibili omo Leza mwaka livumbila mo. Ba kali tuleza. Jesu wa kati, Mwini, kati, “Mboluti mbomu konzya ku Ndipa mulandu cindi Nda amba kuti Ndili Mwana wa Leza, kakuli mulao wanu wini waamba kuti abo Ijwi lya Mwami nkolya kasikila bakali tuleza?” Mwabona?

<sup>88</sup> Aboobo wakali Leza waka bumbwa mu muntu uutegwa musinsimi. Mwabona? Elyo Ijwi lya Mwami lya kasika ku muntu oyu, aboobo takali musinsimi; musinsimi wakali cisitilizyo, pele Ijwi wakali Leza. I ijwi lya muntu tali kalilemeki mbuli boobu. Mwabona eco Nce pandulula? Tali konzyi kulilemeka mbuli booboo. Pele kunzila imwi kale wakali Leza. Mwabona, Wa kali Ijwi lya Leza mu ciimo ca muntu, wiipta kuti “muntu.”

Amubone, Ta kacinca bulenge Bwakwe, nciiimo Cakwe buyo. Bahebrayo 13:8, kati, “Ngu mbobuca nguwenya, sunu, amuya

myaaka." Aboobo Ta kacinca bulenge Bwakwe cindi Na kaboola. Walo Musinsimi ulya lyoonse, koonse muciindi cakatobela mu bukkalo, cintu nciconya: Ijwi, Ijwi, Ijwi, Ijwi. Mwabona? Ta konzyi ku cinca bulenge Bwakwe, pele Wa kacinca ciimo Cakwe. Bahebrayo 13:8, kati, "Ngu mbobuca nguwenya, sunu, amuya myaaka." Wa kacinca cizwato Cakwe buyo.

<sup>89</sup> Mbali Mbwe kacinca kuzwa ku mulumi, cindi mwana wangu nakazyalwa, mpawo Ndime taata. Cindi muzukulu wangu azyalwa, Ndime syaanene. Mwabona? Pele, Nse cinci; oyo ucili—cili ndime. Mwabona? (Elyo oyo ngo Leza.) Nkuti buyo Nda kacinca cangu... Mwabona, ku cinca buyo ciimo cako. Mwabona?

Amubone. Elyo bulenge bula kucincila aansi kuzwa musankwa mukubusyi kuya kukukomena waakatikati, ku mudaala. Elyo nceeco we, nywebo mwabona, mu cinca buyo ciimo canu.

<sup>90</sup> Lino, inga tiimwa konzya kwaamba mulombwana muniini wiimvwi awa, myaka ili kkumi acisambomwe yakukomena, kwaamba kuti wali syaanene. Ta konzyi kuba. Ciimo cakwe ceelede ku cincwa. Myaka misyoonto ila cicinca, mpawo uba syaanene. Sa mwabona Nce pandulula?

<sup>91</sup> Pele Muntu nguwenya ciindi coonse, Muntu nguwenya, Leza ciindi coonse. Mu nzila eyi Ula liyubulula Mwini ku bantu Bakwe, mu kucita boobu. Amubone, kwiinda mu bukkalo bwa Musumpululu wa Mulilo, Wa kali yubununa Mwini ku bantu Bakwe. Mu bukkalo bwa—bwa Jesu, Wa kalyubununa Mwini ku bantu Bakwe. Mu bukkalo bwa Muuya Uusalala, mbuli Mwana wa Leza. Mwana wa Davida... Ula liyubununa Mwini mu ciyanza eco ku bantu Bakwe, ku bamba bantu ku Mu ziba. Uli vumbilidwe kunze lya cintucimwi, amubone, mu nzila njiyonya, na bulenge mbubonya, ciindiaciindi.

<sup>92</sup> Leza kavumbilidwe muli Jesu, ku cita mulimo wa lununuko aa ciingano. Leza takali kukonzya kufwa, kali Muuya. Ngu Utamani. Pele Wa kacita kusama cizwato a kucitaula cibeela ca lufu. Wa kafwa, pele Ta kakonzya ku cicita mu ciimo Cakwe ca Leza. Wa kacita mu ciimo ca Mwana, mbuli Mwana wa muntu, aa nyika. Mwabona? Wa kacita kuba ciimo ca Mwana. Mpawo cindi Na kajokela ku Pentekoste, Wa kali Mwana wa Leza alubo. Sa mwabona Nce pandulula? Sa mwaumvwa muzeezo? Wa kali...

<sup>93</sup> Wa kacita kuboola mu mibili wabuntunsi, ku... alimwi kunyina muntu, taakwe kunyomenena kwa nkewela. Nkaambo eco cilatondezya alubo kaambo kesu ka lunyungu lwa nzoka, mwabona, "nkewela," nkewela cakumaninina. Kutali maapele; nkewela! Mbo mbubo. Eyo ya keelede kuba. Amubone awa, mwabona, ku muntu uli oonse mubotu... Amulange ku basinsimi abo kaindi okuya, pele Wa kacita kuba kwiindilila

ku musinsimi. Mwabona? Kutegwa kucitwe booboo, Wa kacita kuboola ku kuzyalwa kwa nakalindu, kutondezya kuti kuzyalwa kwa nakalindu kwa katondezya... Wa kacita kuba kuzyalwa kwa nakalindu, kuti agusye lutuko, Sikugusya zikola. Mwabona eco Nce wamba? Aboobo, kwakeelede kuba nkewela. Wa katondezya mu kuboola Kwakwe Mwini; Tabooli kwiinda munkwela, pele kwiinda ku kuzyalwa kwa nakalindu. Elyo Wa kacinca cizwato Cakwe kuzwa kuli Jehova kuya kuli Jesu, kutegwa abweze mulimo wa lununuko mu cisobano omo Mwakali ku citila, muli Leza a ciingano.

<sup>94</sup> Bama Griki bakali kuyanda ku Mu bona. Mu Musalali Johane 12:20, bunji bwanu mwaka ndimvwa kukambauka ali yeeyo kwaamba kuti, “Banene, tu yanda kubona Jesu.” Sa mwakaziba obo?

<sup>95</sup> Lino, bama Griki bakali yiide kapati mubumwi, bakali bantu balemu. Alimwi baka jisi i—baka jisi i—i kusukamina kupati kwa Leza, mbuli Paulo mbwa kakambauka kuli mbabo aa cilundu ca Marsi. Elyo ba kali, ba—ba kasololela—ba kasololela inyika muli sayaansi a—a lwiiyo, ba kali bantu balemu. Pele ba kali kukomba a kusyoma mu zyaano zyabuyo a zimwi, mabbuku aa kulemba kudulowing’ a kupenta, azya kulemba kudulowing’ a kupenta zigambya a zimwi zimbi.

<sup>96</sup> Pele ba—ba—ba kopanya makani a Muntu oyu Wa kali kukonzya kuponya balwazi alimwi kukonzya kwaamba zintu ezyo zyakacili kuza, cakululama. Elyo ba kakopanisiga, aboobo ba kaboola kuzo Mu bona. Lino, amulangisye lino, muta impyi eci. Mwabona? Elyo ba kaboola a kuti kuli Filipo, oyo wakali waku Betisida, “Munene, tu yanda kubona Jesu.” Elyo Filipo a sikwiya umwi ba kamuleta kuli Jesu, kubona Jesu.

<sup>97</sup> Lino amubone mabala ngaonya ayo Jesu ngaka lungulula alimwi kuli mbabo, nkambo ba kaboola kubona Obo Mbwa kabede, nkabela tiiba ka Mu bona. Ba kabona ciimo, pele Wa kali mu tempele Lyakwe. Leza wakali mu tempele Lyakwe, kavumbilidwe mu mibili wabuntunsi. Amubone majwi Nga kaamba, “I nseke ya whiiti yatawida mu bulongo, mwabona, a kufwa, inokkede ilikke.” Mwabona? “I oora lyasika, kuyocitika linolino kuti Mwana wa muntu uyo sumpulwa, mwabona, alimwi We elede kuzwa mu nyika eyi. Elyo lyatasika oora eli, tamu kakonzyi ku Ci bona.” Mwabona?

<sup>98</sup> Awa, nkaambonzi tiiba kakonzya kubona Jesu? Wa kali mucizwato. Leza wakali mucizwato. Bama Griki bakali kuyanda Leza, elyo mpaawa Wa kaliko, pele tiiba kakonzya ku Mu bona nkambo ka cisitilizyo. Elyo nce cintu nciconya asunu, taba konzyi ku Mu bona nkaambo ka cisitilizyo. Cili ku busyu bwabo. Aba bama Griki bakali mucizwato, na Jesu wakali mucizwato kuba Griki aba.

<sup>99</sup> Amubone, Wa kati kuli mbabo, “I nseke eyi ya whiiti yatawida mu bulongo, inokkede ilikke.”

<sup>100</sup> Tiiba, tiiba kakonzya kumvisya mbocakabede, kaambo nciba takali kukonzya ku Mu bona. Ngooyo wakaliimvwi muntu. Ba kaboola kubona Leza, elyo ba kabona muntu. Mwabona? Tiiba kakonzya kubona Leza nkaambo Leza wakali vumbilidwe kuli mbabo. Lino amubambe eco mu mizeezo yanu, Leza wakali vumbilidwe mu muntu. Ba kali kukonzya kwaamba, “Taakwe muntu ukonzya kucita zintu ezi citakuti waba Leza. Taakwe muntu ukonzya ku cicita, elyo obo awa muntu kaimvwi elyo akwalo milimo ya Leza ili muku yubululwa kwiinda muli Nguwe!” Mwabona, tiiba kali kukonzya kumvvisya kuti Leza wakali vumbilidwe.

<sup>101</sup> Uli vumbilidwe mu muntu, mbuli lyoonse Mbwa kavumbilidwe. Pele, Wa kalivumbilidwe kuli mbabo, Wa kali mu tempele Lyakwe lya buntunsi. Leza wakali mu tempele lya buntunsi. Lino, amucenjele ncobeni, lino Ngu mbobuca nguwenya, sunu, amuya myaaka. Mwabona? Leza kavumbilidwe, kalisia Mwini ku inyika, kavumbilidwe mu muntunsi. Mwabona? Ngooyu wakali Leza! Abo ba Griki kabaamba, “Tu yanda ku Mu bona.”

<sup>102</sup> Elyo Jesu wa kati, “Inseke ya whiiti yeelede kuloka a kufwa.” Mwe elede kufwa kuzwa ku mizeezo yanu yoonse. Mwe elede kuzwa ku miyeeyo yanu ini.

Mbuli basikwiya abo mbobakabede, tiiba kakonzya kupandulula makani a kulya mubili Wakwe a—a kunywa Bulowa Bwakwe, pele, mwabona, ba ka cita kufwa ku zintu ezyo. Ba kali fwide ku Mulawo, ba kali fwide kuli Kristo. Tacikwe makani na ncinzi, na nkuzundwa kunji buti kwakali kulibonya kuti Nkwa kajisi, ba kacili ku Ci syoma kuli koonse. Mwabona? Ba kali kukonzya kubona mu Muntu oyo; Muntu oyo ulya, kanywa, kazela nswi, kaona, zintuzyonse zimbi, kazyalilwa waano aa nyika, a kweenda ambabo, kaambaula ambabo, kasama zisani mbuli bamwi babo, pele oyo wakali Leza.

<sup>103</sup> Aboobo ba Griki tiiba kakonzya ku Mu bona, nkaambo Wa kalisiaidwe kuli mbabo, mu muntunsi. Amubone Ijwi Lyakwe kuli mbabo, “Inseke eyi ya whiiti yalokela mu bulongo.”

<sup>104</sup> Leza kavumbilidwe mu ciimo ca muntu, kalisia Mwini ku kubonekela kwabo. Ba kali kukonzya buyo kubona muntu. Pele abo Bakakanzwa bakabona Leza. Umwi wa kabona muntu, umwi wa kabona Leza. Mwabona? Elyo wakali Leza kavumbilidwe mu muntunsi, kupanga bobilo babo kululama, pele lusyomo lwako muli ceeeo ncota boni. Ula cisyoma, kufumbwa. Leza kavumbilidwe mu muntunsi. Wa kali mu mubili oyo, alimwi oyo mubili cakali cisitilizyo Cakwe. I cisitilizyo cakazapulwa, mwabona, kutegwa Leza inga wayubululwa.

<sup>105</sup> Mu Cizuminano Cakale, Leza wakali sisidwe cindi Na kali aa cuuno Cakwe ca luse; aa cuuno ca luse, kwiinda ku cisitilizyo. Mu Cizuminano Cakale, Leza wakali mu tempele Lyakwe. Pele bantu bakali kunjila a kukomba mbuli boobu, pele, amuyeeye, kwakali cisitilizyo (ameni) eco cakassisa Leza. Ba kalizi kuti Leza wakalimo. Tiiba kali kukonzya ku Mu bona. Oyo Musumpululu wa Mulilo tiwa kalibonya limbi okuya. Sa mwamvwisya? Taakwe ciindi comwe mu Lugwalo, kuzwa ciindi ulya Musumpululu wa Mulilo niwa kanjila kunze ly a cisitilizyo eco, elyo Wa kasola kulibonya alubo, kusikila Wa zwa kuli Jesu Kristo. Leza wakali vumbilidwe!

<sup>106</sup> Cindi Na kaima aa nyika, Wa kati, “Ndi zwa kuli Leza alimwi Ndi inka kuli Leza.”

<sup>107</sup> Mpawo Paulo, (nikwakainda lufu, kuzikkwa, a bubuke Bwakwe), mu lweendo Iwakwe kuyaku Damasiko, ngooyo ulya Musumpululu wa Mulilo alubo wakaba. Ino Wa kalinzi? Kazwida kunze ly a cisitilizyo! Bulemu kuli Leza!

<sup>108</sup> Wa kali mukati kunze ly a cisitilizyo. Lino Wa kali kunze lyanzi? Cisitilizyo ca cikutu. Mwabona, “zikutu zyabagutu,” kunze ly a cisitilizyo. Elyo cindi cisitilizyo eco nica kazapulwa ku buzuba bwa kubambulwa, cisitilizyo omo Mwa kavungaidwe ca kazapulwa ku buzuba bwa kubambulwa, cuuno caluse coonse cakaboolaa mukulibonya.

<sup>109</sup> Lino, ba Juda tiiba kakonzya kumvwisya obo Leza mbwakali kukonzya kuba a luse ku bantu basizibi, babbi akununka mbuli mbo tubede. Pele tiiba kali kukonzya Oyo Wa kali kupa luse, nkaambo Wa kali yubide. Wa kali kunze ly cuuno ca luse, ca mukati, a zikutu zyabagutu kazilengelela ansi, kazi Mu vumbide. Kaindi . . .

<sup>110</sup> Kaindi, ikuti na kufumbwa muntu waunka kunze ly a cisitilizyo eco, lwakali lufu lwa mpoonya awo. Ameni. Oh, tuyu bweza ciyo awa kwakaindi kaniini, mwabona, ikuti na mula konzya—mula konzya ku Ci tambula. Kweenda kunze ly zikutu ezyo . . . Alakwe mwana wa mupaizi waka sola kucicita ciindi cimwi, elyo wa kafwa. “Muta unki kunze ly a cisitilizyo eco.” Muntu oyo wakaunka kunze . . . Nkaambonzi? Ti kwakalinaba lununuko, muli ceeco. Lwa kaliko mubumwi. Lwakaliko biyo mubumwi. Alimwi kufumbwa cintu *camubumwi* tacinaba cintu cini, mwabona, cili buyo mubumwi. Lwa kali lununuko . . . Cibi cakavumbwa, kutali kugusigwa . . . kulekelelwa, mubwini, kutali kulekelelwa. *Kulekelelwa* nku “nkusiya a kuleka.” Elyo aboobo bulowa bwa mbelele a bwa mpongo tii bwakali kukonzya kucita eco, aboobo Jehova wakali sisidwe kunze ly a cisitilizyo. Lino, kaindi kunze ly a cisitilizyo eci oko Nkwa kasisidwe, kunjila omo, muntu wakali kufwa, ku sola kunjila muli Mbubo.

<sup>111</sup> Pele kuzwa Pentekoste, kuzwa ku Kubambulwa, cindi cisitilizyo eco nica kazapulwa ikuzwa atala kusika aansi, ku

nzyalani eyo... Jesu wakali Leza oyo, kavumbilidwe. Elyo Na kafwa aa Kalivali, Leza waka tuma mulilo a kalabo, aku kwapula cisitilizyo eco ikuzwa atala kusika aansi, kutegwa cuuno ca luse coonse cibe mukulibonya kwaantangalala. Pele bakali ofweede loko ku Ci bona. Mbuli Musa mbwa kaamba awa, nekubakuti, na... Paulo wa kati, kubala zya Musa, "Cindi Musa nabalwa, nekuba, eco cisitilizyo cicili a moyo wabo." Oh, mukwesu, mucizi, ncencico eco ba Juda nciba kacita cindi cisitilizyo nica kazapulwa a kuleta Leza mukulibonya kwaantangalala, kalengelela aa ciingano. Wa kali mukulibonya kwaantangalala, pele tiiba kali kukonzya ku Ci bona.

<sup>112</sup> Sa inga cakonzeka kuti Bamasi bacita cintu nciconya? O Leza! Kakuli bali jisi makkalo aa mbungano, aa Mwana wa Leza; pele cindi lino cisitilizyo ca tubungwe otu a zintu, eci cisitilizyo ca kansiyansiya nco tu jisi kuzwaciindi ca Pentekoste, kakuli tunsiyansiya twa mbungano twaazapulwa, zintu ezyo bantu nziba kaamba, "Mazuba a maleele akamana, a zintu ezi," nkabela Leza wagusya cisitilizyo kuzwa kuli Ndilyo, a ku Li leta mukulibonya kwaantangalala, nkabela bali libambilide ku Li bambula alubo, mbubonya buyo ncobeni.

<sup>113</sup> I Leza watondezegwa, kulibonya kwaantangalala, ba keelede ku Mu bona kaimvwi okuya. Nekubaboobo Wa kali zibilidwe loko, Wa kali muntu buyo. Tiiba kali kukonzya ku Ci bona. Mwabona, mpaawo kwakaimvwi muntu. "Ee," ba kati, "oyu mulombwana, ino Wa kazwa ku cikolo nzi?" Pele, amuyeeye, cindi elyo sumo nilya kayasa mubili Wakwe, oyo Muuya waka Mu siya, tempele... zijailo zya zituuzyo zyakapindamunwa, a lulabi lwakaswipukila ansi kwiinda mu tempele a kuzapula cisitilizyo. Ino cakali cinzi? Mpaawo kwakali Leza wabo kalengelela a Kalivari, nkabela ba kali ofweede loko ku cibona.

<sup>114</sup> Ka Mu leta mu kulibonya kwaatuba buu, elyo nekuba taba Ci boni! Ba kaofwaazigwa. Leza, kavumbilidwe mu mubili wa muntunsi!

<sup>115</sup> Nywebo amuyeeye, Wa kajokela mpawo kuli Paulo nikwakamana boobo, a kuli Petro mu ntolongo, mbuli Musumpululu wa Mulilo. Sa mulayeyea obo? [Mbunga yaamba, "Ameni."—Mul.]

<sup>116</sup> Pele mu mazuba aakumamanino We elede kubweeda alubo, pele Musumpululu wa Mulilo weelede kubweeda alubo kuyubulula Mwana wa muntu, mwabona, ku tondezya Ijwi, i Mumuni. I tunsiyansiya, twa, tuyo mwaigwa. Taakwe cintu ciyo Li nyonganya; ciyo citwa, kulikoonse. Leza uzapawida ansi tubungwe a tunsiyansiya.

Ino Muuya uli buti Ngwa yocitya awe? Mbuli Mbwa kacita mu busena butaanzi. Amulange eco Nca kacita mu mazuba akwa Eliya, mu mazuba a Johane. "Muta yeeyi

kwaamba mu myoyo lwanu kuti ‘muli jisi Abrahamu kuba taata,’ nkaambo Leza ulakonzya ku mabwe aya kubusya bana ba Abrahamu.” Mwabona? Muta yeeyi kuteeti, “Nkaambo, Ndi zulilwa *oku* alimwi Ndi zulilwa *okuya*.” Mwabona? Leza kazapula cisitilizyo, mwabona, ku tondezya kuti Obo Mbwa bede. Mwabona, amulangilile cisitilizyo cindi nocizapulwa awa lino, tula jana lino.

<sup>117</sup> Lino, alimwi ciindi cimwi, ikuti na muntu wa keenda kwiinda mu cisitilizyo eco, lwakali lufu lwa mpoonya awo. Lino ndufu kutainda muli Ndilyo! Ameni. Ikuti tamu konzyi kumwaya cisitilizyo eco ca kansiyansiya, kudonkola kwiinda mu bwaanda obo bwa kabungwe, ku bona Leza mu nguzu Zyakwe, lwalo ndufu. Lumwi oko nilwakali lufu kunjila, lino ndufu kuba anze. I Cuuno ca Luse coonse cilikkede mukulibonya kwaantangalala, kufumbwamuntu inga wa Ci bona, cisitilizyo cazapulwa. Bulemu kuli Leza! I cuuno ca luse coonse caboola mukulibonya kwaantangalala.

<sup>118</sup> Obo Leza mbwa konzya kuba a luse kuli basizibi basofweede mbuli ndiswe, cindi Na akalisisa Mwini, akali maseseke. Elyo lino Cili mukulibonya kwaantangalala, na mukulibonya kumaninide, kuyubununwa kwiinda ku Ijwi Lyakwe. Ndi Ijwi lyoonse, cakuzumanana, oyo ngu Leza. Ndi Ijwi eelyo licijula. Ikuti na bantu abo niba kaziba Ijwi lya Leza buzuba obo cindi Jesu nakafwa, nibakabona Cuuno ca Luse, niba kabona kuti Obo Mbwa kabede.

<sup>119</sup> “Ino mpawo Wa kalini? Nkaambonzi cisitilizyo nci cakazapulwa?” Amuyeeye, lwakali lufu kunjila muli Ncico. Taakwe muntu wakali kukonzya ku Ci bona. Musa waka Ci bona mu ciimo, Kakali kambizi...lya kali i—i sule lya Muntu. Ee, Nceeci we, sule liswekabulowa, nguwenya Muntu oyo! Ca kali Ci nzi? Leza wakali kuyanda kubatondezya Cuuno ca Luse. Leza wakali kuyanda kubatondezya Obo Mbwa kabede. Aboobo cisitilizyo mu tempele, kuzwa ku janza lya Leza, atala, cakazapulwa kuzwa aatala kusika aansi, a kutondezya Leza mukulibonya kwaantangalala. Wa kali Jesu Kristo kalengelela a ciingano, Cuuno ca Luse. Elyo ca kali cinzi? I bantu bakali ofweede loko ku Ci bona.

<sup>120</sup> Lino caloololwa alubo, tunsiyansiya twabo! Obo, mpawo, aa Buzuba bwa Pentekoste, i Ijwi lyakasika alimwi lyakali mu ciimo ca “Mwana wa Leza.” Elyo baka talika kulibamba kabunga ku Nicaea, Rome. Elyo, cintu citaanzi, ba kaunka ku Methodisti, Baptisti, Presbyteria, ba Pentekoste, abamwi bambi. Nkansiyansiya ka bbunga kusikila muntu tazi awo mpaimvwi.

Pele, bulemu kuli Leza, Wa kasyomezya mu mazuba aakumamanino eco Ncayo cita. Uyo tondezya Ijwi Lyakwe mukulibonya kwaantangalala, kujulwa kumbele lyesu alubo, mwabona, ku Li jula.

<sup>121</sup> Ikuti niba kaziba biyo Ijwi, niba kaziba Obo Jesu mbwa kabede. Ikuti muntu nakaziba biyo Ijwi lya Leza, inga nakaziba oora ndyo tuponamo a ceeco cicitika. Ba kaka buyo kuswiilila ku Ijwi eelyo. Tunsiyansiya twabo! Ncinzi cakacitya ba Juda abo kubona ceeco? Inzi? Kwakali kuboneka mbuli kuti ba kali kukonzya kubona kwini, nkaambo cintu cakazapulwa kujula. Ca kazapulwa kujula ku bukanze.

<sup>122</sup> Ino ndwanzi lubukulusyo lucitika lino? Mbobuti mbo lukonzya kuzwidilila? Mbobuti mbo lukonzya kulongezegwa? Nse kwe ndaba nkunji buti kulikozyanisya nko lujisi, na cintu cimbi cili coonse, eco taci... Cindi Musa nakazwa, kwakali bbunga pati lyabantu basiyenesiyene ba kaunka awe. Pele ino cicitilwa nzi? Ngu Jehova Mwini kagusya cisitilizyo kuli Leza, ku tondezya lwaandaano akati ka ciluleme a cilubide. Uuli ngu, Methodisti, Baptisti, Presbyteria, na nguni ululeme? Ijwi lya Leza lili luleme! “Akube kuti ijwi lya muntu lyoonse libe lya bubeji, nkabela Lyangu libe Bwini.” Leza tayandi sikupandulula. Ula licitila bupanduluzi Bwakwe Mwini. Ula Li yubulula, a kuli...kupa bupanduluzi. Leza kalitondezya Mwini. Oh, ma! Eeni akati kesu, tula bona janza Lyakwe pati kalyaamba zintu ezi, kucita zintu ezi.

<sup>123</sup> Jisi cintucimwi ali ceeco sunumasiku, mwabona, ca boobo mbo kulangililwa janza lya Leza, eco nco Li cita, obo mbo Li livungulula lini. Mwabona?

<sup>124</sup> Elyo bantu balati, “Oh, Obo mbufubafuba. Oko nkwiindilizya oko. Taakwe cintu kuli Ceeco. Obo mbufubafuba. Oyo ngu Beezebule. Oyo ngu dyabulosi. Oko nkusonda. Eco nceeci.” Mwabona, cintu nciconya nciba kaamba kujatikizya Nguwe.

<sup>125</sup> O mbungano, elyo ikuti na teepu eyi yaunka, tamu konzyi kubona, no bakutausi ba Makanimabotu, awo mpo tupona? Sa tamu konzyi kubona oora ndyo tuponamo? Leza, kali tondezya Mwini, kakkede ambali... Amulange, Wa kabweza cisitilizyo camu tempele aku cizapula mu tubeelabeela, kutegwa babone Leza mukulibonya kwaantangalala, elyo ba kaliofweede loko ku Ci bona. Elyo Wa cita cintu nciconya sunu, kubikka Ijwi Lyakwe nkoonya kunembo, eco Nca kasyomezya. Cisyomezyo acimwi mu Ijwi, cili bikkidwe nkoonya kunembo yesu, mukulibonya kwaantangalala!

<sup>126</sup> Sa mulizi eco mbungano ya Bamasi ncoicita? I cintu nciconya mbungano yaba Juda nciya kacita, kofwaala loko ku Ci bona. Kwa mana. Cinooli mu myoyo yabo mbubonya buyo mbo cakabede mu buzuba obo.

<sup>127</sup> Amubone, lufu, kuzwa kuli Ndilyo lino. Mwe elede kwiinka muli Ndilyo kwiinda mu cisitilizyo eci, na pe tamu kakonzyi. Obo Leza mbwa konzya kuba fwida luse, pele amuyeeye mbo cakabede, kuti Leza uli mukuyubulula cakali kunze lya

cisitilizyo eco. Amulangilile eco cakali kunze lya cisitilizyo, i Ijwi! Ino cakavumba nzi? I Ijwi! Ly a kali cinzi? Lili mu bwaato. Ly a kali Ijwi eelyo cisitilizyo eco nci lyakasisa. Mwabona? Alimwi Jesu wakali Ijwi eelyo, alimwi Walo ndi Ijwi eelyo, nkabela cisitilizyo ca mubili Wakwe caka Li sisa.

<sup>128</sup> Elyo sunu cisitilizyo ca kansiyansiya cisisa Ijwi alubo, kwaamba, "Tacili boobo." Pele Lili boobo! Leza ulimuku Li peda bumboni, kandindima maningi Mwini kumweka mbuli zuba, kumbele lya muntu aumwi, elyo bala kakilwa ku Li bona. Leza, kotu fwida luse.

<sup>129</sup> Mu cikozyanyo, Musa kazwa mu Busyu bwa Leza, a Ijwi lya Leza lya bukkalo obo. Lino amulangilile, lino tuli muli Kulonga 19. Muta ciimpyi eci lino. Kulonga 19, Musa kazwa mu Busyu bwa Leza, na 20 a 21, 19:20 a 21. Musa kazwa mu Busyu bwa Leza. Wa kali mu Ijwi. I Ijwi lyakalembwa. Elyo walo, mu Busyu bwa Leza, a Ijwi, wa kajisi Ijwi lya bukkalo obo. Kuli Ijwi lya bukkalo abukkalo. Elyo Musa kaboola, kubusyu bwakwe kabumweka loko! Mwabona? I Ijwi lyakali muli nguwe, kali libambilide kuyubululwa, kuvozya ku bantu.

<sup>130</sup> I Ijwi lini, Leza waka Li lemba, alimwi Ly a kali antoomwe a Musa. Amubone, Ly a kali antoomwe a Musa alimwi kali bambilide kuyubululwa. Wa kali Ijwi kuli mbabo, wa kali Ijwi lipona, lyakasisidwe. Kalivumbilila mwini, Musa wakacita kubikka cisitilizyo kubusyu bwakwe mwini. Nkaambonzi? Wa kali Ijwi eelyo. Amen. Kusikila Ijwi eelyo lyaka yubununwa, Musa wakacita kulivumbilila mwini. Amen!

Sa mwa Li bona? Kufumbwa oko Ijwi nkolibede, Lili vumbilidwe.

<sup>131</sup> Musa waka jisi Ijwi. Lino amuyeeye, Ijwi nilyakamana kuyubululwa, Musa wakali Musa alubo. Mwabona? Pele Ijwi kuciindi nilya kacili muli nguwe kutegwa livozegwe, wa kali Leza; ee, takacili Musa limbi pe. Wa kajisi Ijwi lya Mwami lya bukkalo obo. Taakwe cintu cakali kukonzya ku muguma mane eco nica kamana; kajisi Ijwi eelyo a nguwe. Aboobo, nkokuti, cindi nakasika, bantu bakanyona mitwe yabo; tiiba kakonzya kumvwisya. Ba kali cincidwe. Wa kali mulombwana wandeene. Wa kaboola a Ijwi eelyo. "Elyo wa kabikka cisitilizyo," Bbaibbele lya kati, "kubusyu bwakwe," nkambo wa kajisi Ijwi. Elyo wakali Ijwi kuli mbabo.

<sup>132</sup> Lino amulange, ikuti na Musa... O mukwesu, awa kuyooba tusi. Pele ikuti na Musa... Mboli Paulo mbwa kaamba mu Bakorinto Babili, cipati 3. Ikuti Musa naka vumba kubusyu bwakwe a cikozyanyo eco ca Bulemu ali nguwe... mwabona, nkambo obo bwakali bulemu bwakunyama, oyo wakali mulao wakunyama. Alimwi ikuti Musa, mukuziba kuti oyo mulao wakeelede kuloba, pele Bulemu bwakali bupati cakuti bwaka ofwaazya bantu, aboobo bakacita kubikka cisitilizyo kubusyu

bwakwe, ino Li yoinda buti kuba? Bantu bakaofwaala kumuuya! Uh huh. Obo bulemu bwakali kweelede kuyoyabaala, pele Bulemu obu tabu kayabaali. Mwabona? Musa waka jisi milao yakunyama, kupa mulandu, taakwe luzyalo, taakwecintu; waka mupa buyo mulandu. Pele Oyu ngo tu kanana kujatikizya... Oko tiikwa kajisi kujatilwa, oyo wakali ku kwaambila buyo obo mbomwa kabede. Oyu umupa mapolelo.

<sup>133</sup> Elyo cindi Ijwi eelyo lya tondezegwa, oh, ma, ino mbusyu nzi mbo Li yooba? Lye elede kuyo vumbiliwa. Lyeelede kuvumbililwa. Lino amubone. Aboobo Muuya uli vumbilidwe mu tempele lya buntunsi, mwabona, Walo kukanana majwi aakunyama antoomwe a cisitilizyo cakunyama.

<sup>134</sup> Lino, Paulo kakanana awa lino, alimwi mu kuyeeya oku—oku, Ijwi lya Muuya, “Tuli bakutausi, kutali ba ilugwalo, mulao; pele bakutausi beeleta ba Muuya,” kuti Muuya ubweza ilugwalo a ku Lu yubulula.

<sup>135</sup> Oyo wakali mulao buyo, wakeelede kuunka akuulanga, kwaamba, “Uta citi mamambe. Uta bbi. Uta beji. Uta citi *eci, eco, na cimbi.*” Mwabona? Wa keelede kulanga ali yooyo.

<sup>136</sup> Pele oyu Muuya uboola aa Ijwi lyaka syomezegwa lya bukkalo *buno*, a kulileta a kuyubulula, kutali zilembelo zya mabwe obilo, pele Busyu bwa Leza uupona. Kutali muyeeyo wabuyo umwi ngwa kapanga, na Houdini, mancenjela; pele cisyomezyo nciconya ca Leza kuyubununwa a kuyubululwa nkoonya kumbele lyesu. Ino musyobo nzi wa cisitilizyo uyooba kunze? Elyo ku—ku kwaangulula ceeco...

<sup>137</sup> Mwabona, eco cakali cipati loko kusikila bantu abalo ba kati, ba kaamba kuti cindi niba kabona Jehova kaseluka mu Musumpululu wa Mulilo oyu, a kutalika kuzungaanya nyika, a—a zintu Nzya kacita, a mulundu wakasuka mulilo. Elyo akwalo kufumbwa muntuumwi wakasola kwiinka ku mulundu oyo, wakaloba. Cakali cipati loko kusikila Musa awalo wakayoowa kuzunzuma. Mpawo, ikuti ciindi eco Wa kazungaanya biyo mulundu, cino ciindi Uyo zungaanya majulu a nyika.

<sup>138</sup> Ino kujatikizya Bulemu Obu? Ikuti na obo bwakali vumbilidwe acisitilizyo cakunyama, eci nciconya...vumbilidwe a cisitilizyo ca kumuuya. Aboobo muta soli kulanga kuli cakunyama; njila mu Muuya a kubona waawo mpobede, bona oora ndyo tupona mo.

<sup>139</sup> Sa Ci bamba kuyeeya kubotu kuli ndinywe? Mwabona, Ncisitilizyo ca kumuuya eco cili a bantu, kwaamba, “Ndili muna Methodisti. Ndili kabotu mbubonya mbuli muntu uli oonse. Ndili muna Baptisti. Alimwi Ndili muna Pentekoste.” Sa mwa cimwwisy, cintu eco ncisitilizyo ca kansiyansiya? Ci sisa Leza kuzwa kuli ndinywe. Ezyo nze zintu zimukasya kubotelwa zyoonse...

Oh, yebo wati, “Nda ongolola a kusotoka mujulu aansi.”

<sup>140</sup> Wa kati, “Lyoonse Ijwi!” Eva wakasyoma Ijwi lyoonse pele lyomwe. Mwabona? Ndi Ijwi lya Leza lizwide, cisyomezyo ca oora eli ciyubululwa. Mwabona?

<sup>141</sup> Amubone lino mbuli mbo tu zumanana. Jisi kunji awa kwa kukanana, pele Ndi jisi kutandila mapeeji ali makumi obilo, pele ca . . . ca—ca bulembu, pele Nse—Nse kakanani ncobeni ali nzizyo zyoonse. Mwabona, Ndiyo bindaana.

<sup>142</sup> Uli vumbilidwe a cisitilizyo cakunyama katana amba Ijwi ku bantu. Lino, Leza wali vumbilila Mwini, mbuli Mbwa kasyomezya, mu mubili wabuntunsi. Leza! Sa mwa Ci mvwa? [Mbunga yaamba, “Ameni.”—Mul.] Leza wali vumbilila Mwini mu mubili wabuntunsi, a kubikka cisitilizyo ca kumuuya ali mbabo, (kwaamba, “Ee, Ndili *obu* alimwi Ndili *obo*”), kutegwa akanane ku bantu. Cindi cisitilizyo eco, cili ncisitilizyo ca kansiyansiya, cazapulwa, mpawo i . . . eco nco baamba, “Baa, mazuba aa maleele akamana.”

<sup>143</sup> Ii mulombwana wakati kuli ndime buzuba bumwi, i—i mukambausi muniini muna Baptisti okuya, kaboola kuli ndime, Mukwesu Green, elyo wa kati, “Mukwesu Branham, nceeci cintu comwe Nce jisi kulwana nduwe.” Wa kati, “Usola kubamba bantu . . .” Kwakali kunselelo mu Ramada Inn, cindi nitwa kajisi muswaangano kunselelo okuya. Kati, “Usola kubamba kusyoma mu bukkalo bwa buapostolo, ku pona sunu mbuli mboba kabede mu bukkalo bwa buapostolo.” Kati, “I bukkalo bwa buapostolo bwakamana a baapostolo.”

Nda kati, “Bwa kacita?”

“Inzya.”

Nda kati, “Nguni wakali mukanazi wankamu mu bukkalo bwa buapostolo?”

Wa kati, “I baapostolo bali kkumi mubabili mu ng’anda yamujulu.”

<sup>144</sup> Nda kati, “Nkokuti Paulo takaliko.” Nda kati, “I mukanazi wankamu wakali Petro. Elyo Petro wa kati, aa Buzuba bwa Pentekoste, cindi niba kabona zyoonse ezi kazicitika, a Muuya Uusalala kaubeleka, wa kati, ‘I cisyomezyo cili kuli ndinywe, a ku bana banu, abaabo bali kulaale, abaabo boonse Mwami Leza wesu mba sola kwiita.’ Ikuti na Uci ita, nkokuti Cintu nciconya nkocili awa. Ndelili bukkalo bwa buapostolo nibwa kamana? I bukkalo bwa buapostolo bula mana cindi Leza amana kwiita.” Taakwe cintu nca kaamba pele kabweza buyo ngowani yakwe a kweenda kuzwa.

<sup>145</sup> Citola Ijwi ku cicita. Ndi Ijwi. Jesu wakaambila Saatani, “Kuli lemedbedwe.” Mwabona? Nce ncico, “Kuli lemedbedwe.”

<sup>146</sup> Nda kati, “Petro wakaamba kutu tabu kamani. Mbuli boonse abo Mwami mba kaita, eci Cilongezyo cakali cabu. Lino yebo waamba kuti, ‘Wa kaleka.’ Lili?”

“Taakwe bubi bwacitwa?”

Nda kati, “Peepe, munene, kwiina nokuceya. Ko zumanana.” Uh huh. Mpoonya awo. Mwabona?

<sup>147</sup> Petro wakaamba kuti cakali ca bantuboonse abo Leza mbayo itila, kuyo tambula Cilongezyo ncoonya ca buapostolo. Elyo ndi—elyo ndi Ijwi lya Mwami. Mwabona?

<sup>148</sup> Lino cisitilizyo cakunyama. Leza, Ijwi, kavumbilidwe mu mibili wabuntunsi. Ca kali cinzi? Leza wakali vumbilidwe muli Musa. Leza wakali muli Musa, kavumbilidwe, a Busyu bwa Leza bwakali muli nguwe. Wa kali londokede loko a Ijwi eelyo lyakali muli nguwe mbuli booboo, kusikila wakacita kuvumbilila busyu bwakwe. Alimwi wakali musinsimi waka simpikizigwa oyo waka vungulula Ijwi a ku baambila, “Uta citi! Uta! Alimwi ta citi!” Mwabona?

<sup>149</sup> Kupa Ijwi Lyakwe ku nzyalani eyo, Wa kalivumba Mwini mu muntunsi, na pe Ijwi nilyaka ofwaazy a abalo baitidwe. Mwabona? Abalo bantu bakali kokuya, tiiba kakonzya kwiima kubona ceeco. Mu—mu Kulonga tu jana kuti, ba kati, “Akube kuti Musa akanane, kutali Leza.” Sa mwabona kaambo Musumpululu wa Mulilo nco utalibonyi kanjikanji? Mwabona?

<sup>150</sup> Leza wa kati, “Ndi—Ndi—Ndiyo cita eco. Ndiyo babusizya Musinsimi.” Amen! “Ndiyo babusizya omwe.” Elyo Wa kaboola mbubonya buyo. “Ndiyo busya, alimwi Uyo ba, kuba Ijwi.”

<sup>151</sup> Wa kati, “Ikuti na bayanda kubona kuti Ijwi lili buti...” Kati, “Lino, Musa, Nda kalibonya kuli nduwe kutala oko, citeo ciyaka mulilo.” Kati, “Ndiyo seluka a kuyasya cilundu a mulilo.” Kati, “Bayo bona kuti wa kaamba bwini. Ndiyo libonya awa mu i—mu i nzila njiyonya iiyaka. Ndiyo libonya awa a ku tondezya bantu, Ndiyo simpikizya mulimo wako.” Eco Nea kaambilila Musa awa, majwi manji loko.

<sup>152</sup> Amubone, Wa kati, “Lino Ndiyo—Ndiyo kulemya kumbele lya bantu.” Kati, “Lino, wa kabaambilila kuti Nda kakuswaana okuya mu citeo ciyaka mulilo; lino Ndiyo seluka, Mulilo nguwenya, alimwi Ndiyo lekela bantu kubona kuti toka beja kujatikizya Nguwe.” Ula konzya Ku tondezya kwiinda kunzila yasayaansi, akwalo, ikuti na ula yanda. Mwabona? “Ndiyo seluka mpoonya awo a ku balekela kuziba.”

<sup>153</sup> Elyo cindi Na katalika ku zunzuma, cindi Jehova naka talika ku zunzuma, bantu ba kati, “Peepe! Peepe! Peepe! Uta lekeli Jehova kukanana; tuyu—tuyo fwa.”

<sup>154</sup> Mwabona, Wa keelede ku vumbililwa, aboobo Leza wakali vumbilila Mwini muli Musa a kupa Musa Ijwi. Elyo Musa kaboola kунselelo a kukanana Ijwi lya Mwami, mu cisitilizyo kubusu bwakwe. Mbubo na? Jehova kavumbilidwe mu ciimo ca musinsimi, nkaambo cakumaninina nica... Elyo Leza wa kati Ta kakonzya kukanana limbi kuli mbabo mbuli booboo.

Wa kali kukonzya buyo kukanana kuli mbabo kwiinda ku musinsimi. Nje nzila ilikke Nja kalino konzya kukanana kuli mbabo kuzwida waawo. Nje nzila ilikke Nja yokanana lyoonse. Mbo mbubo. Taakwe nzila imbi. Ta beji pe.

<sup>155</sup> Amubone, Musa alikke nguwa kajisi Ijwi. Lino, tii kwakali i—i nkamu ya kaselemuka, tii kwakali ba Farisi buyo, na ba Saduki, na tii kwakali i—i kakamu kamwi kabukombi kandeene na mukowa. Wa kali Musa! Wa kabweza muntu omwe. Ta konzyi kubweza mizeezo yobilo na yotatwe yandeene. Walo ubweza muntu omwe. Musa wakajisi Ijwi, alimwi Musa alikke. Joshua alakwe taka Li jisi. Taakwe muntu umbi waka Li jisi. Ameni! Joshua wakali i—i silutwe mupati; Joshua wakali mulailizi wampi; Joshua wakali musyomi, Munakristo. Pele Musa wakali musinsimi! I Ijwi tali konzyi kuboola kuli Joshua; Lye elede kuboola kuli Musa. Wa kali musinsimi mupati wa oora. Amubone, Ijwi tilya kaboola kuli Joshua kusikila Musa nakaunka. Peepe, munene. Leza ubeleka a omwe aaciindi comwe. Leza ngumwi. Mwabona? Lino, Musa alikke nguwa ka jisi Ijwi, kutali nkamu.

<sup>156</sup> Amulange, Leza waka cenjezya muntu oonse kutasola kutobelwa Musa mu cisitilizyo eco; basikukkopela. Mwabona? Mwanakazi, mwaalumi, mupaizi, kufumbwa obo mbwa kabede, obo mbwakali munaleza, obo mbwali mwaalumi, na nkunji buti kulemekwa, na mbupati buti mboba kabede; Wa kacenjezya, "Alekwe Musa aboole alikke! Elyo ikuti kufumbwa muntu, naba munyama, waciguma, weelede kujaigwa mpoonya awo." Muta indilili cisitilizyo eco. Eco cisitilizyo cizulilwa ku muntu omwe. Oyo Mulumbe ngumwi. Mwabona? Mu tempele, muntu omwe ngu wakali kunjila lomwe a mwaaka, kananikidwe a wakali bambide kunjila; kutali kuleta Ijwi, pele kutuula bulowa. Akwalo kweenda kunjila omuya ku Ci indilila, omwe buyo. Muntu umwi umbi wakafwa. Mwabona?

<sup>157</sup> Ba lafwa kumuuya lino. Eci ncisitilizyo ca kumuuya. Mwabona? Eco cakali cisitilizyo cakunyama. Eci ncisitilizyo ca kumuuya. Mwabona? Ba la zumanana kweenda nkoonya kunze mukati omuya, ula konzya kubaambila. "Oh, Ndi lizi! Ndi lizi eco, pele Ndi . . ."

Nda kati, "Ko zumanana, cili kabotu, cikanana buyo . . ." Mula yeeya, cipenzyo camamanino mu Egepita lwakali lufu, kakutana kulonga. I cipenzyo camamanino aa nyika ndufu lwa kumuuya, kakutana kulonga. Mpawo bayo umpilwa mitunta yabo a kujokela kuvwu, elyo baluleme bayo enda atala aa itwe lyabo. Pele cintu camamanino ndufu lwa kumuuya, kukaka Ijwi.

<sup>158</sup> Lino amubone, Leza wakacenjezya muntu oonse kutsola kutobelwa Musa mu cisitilizyo ca Mulilo. Musa wakeeela kuvumbilwa, wakeeela kuzwa omuya. Musa waka njila kali Musa, kanjila mu Musumpulu wa Mulilo oyu; elyo

cindi nakajokela, wa kali vumbilidwe. Nkambo, wa kanjila Omuya, kuzwa ku tunsiyansiya twakwe, tunsiyansiya twa baalu. Wa *kabona* i Musumpululu wa Mulilo, pele linounjila *mu* Musumpululu wa Mulilo. Mwabona? Amen! Elyo ula yutuka, kavumbilidwe. Ijwi lya Leza mu muntu, kalivumbilidwe! Ngooyu waboola okuya kali mukuzwa, oh, ma, Nda konzya ku cibona. Kacenjezya kuteeti taakwe muntu umbi wa ku cisola, taakwe muntu ukonzya kukkopela Ceeco. Ncibotu tociti. Mwabona? Alakwe mupaizi na muntu uusalala, kufumbwa mbwa kabede, kadino, bishopo, kufumbwacintu cimbi, kusola kunjila mu cisitilizyo eco, wakafwa. Leza waka bacenjezya. Tatukabi a kukkopela.

<sup>159</sup> Ijwi Lyakwe liyubununwa kuli omwe. Lyoonse mbo kwakabede, musinsimi kali kuboola a Ijwi lya Mwami, bukkalo abukkalo, ciindi acimwi, muciindi cakatobela mu Lugwalo. I Ijwi liboola kuli omwe. Mu bukkalo boonse, mbubonya, akwalo mu makkalo aa mbungano, kuzwa ku butaanzi mboonya kusikila kuli bwamamanino. Bamwi bali jisi masena abo, mbo mbubo, amubone, pele amutantamuke ku Musumpululu wa Mulilo oyo. Mwabona? Ino nciyo nco twiiya awa! Mwabona, bantubonse bayanda kuba Musa, alimwi bantubonse . . .

<sup>160</sup> Sa mulayeeya eco Datani abamwi nciba kaamba okuya? Ba kati, "Lino, Musa, lindila awa aniini! Uli sumpula lwako maningi, mwabona. Lino, kuli bantu bambi awa abo Leza mba kaita."

<sup>161</sup> Obo mbwini. Balo, umwi aumwi, bakali kutobela kabotu kufumbwa kuti ba kazwidilila, pele cindi umwi nakasola kuboola kumbele a kubweza busena bwa Leza obo Mbwa kapa Musa, oyo wakakanzwa a kusalilwa mulimo oyo, kasola ku bubweza, mulilo waka seluka a kujula nyika a kubamena moonya muli njijo cigaminina. Mwabona? Mwabona? Amu cenjele. Mwabona? Koba buyo Munakristo, munaleza mubotu wa Leza, uusyoma Ijwi. Mwabona? Tantamuka ku Musumpululu oyo. Ino nciyo!

<sup>162</sup> Leza wakalibonya lutaanzi kuli Musa mu citeo ciyaka mulilo, Leza wakali vumbilidwe mu Musumpululu wa Mulilo. Lino amuswiilile kabotu lino kwa kaindi kaniini. Leza, lutaanzi nakasika kuli Musa, Wa kali vumbilidwe. Leza wakali mu Musumpululu wa Mulilo, kasisidwe kusule mu citeo, mwabona; mbuli kunze lya zikutu, mwabona, kusule kwiinda ku cuuno ca luse ku cipaililo. Mwabona? Wa kali vumbilidwe. Uli vumbilidwe lyoonse. Elyo cindi Na kasika kuli Musa, Wa kali mu Musumpululu wa Mulilo, kavumbilidwe mu Musumpululu wa Mulilo. Pele awa, kumbele lya bantu, Leza waka musimpikizya kwiinda ku Musumpululu wa Mulilo nguwenya. Mwabona? Musa wa kati . . .

<sup>163</sup> Lino amulangilile. Sa mula bala? [Mbunga yaamba, “Ameni.”—Mul.] Sa mula lekela mizeeo yanu kutenteleka kupola? Sa mula konzya? Konzya...“Oyo ujisi matwi, alekwe amvwe.” Mwabona?

<sup>164</sup> Cindi Leza nakalibonya kuli Musa, mwakali mu Musumpululu wa Mulilo, cindi Na kamwiita ku mulimo wakwe. Elyo Musa waka boola a kwaambila bantu kujatikizya nkuko. Tiiba kakusyoma, nekubaboobo wa kacita maleele a zintu. Pele, ciindi eci, Wa kalibonya, kabotu munzila yasayaansi a kusimpikizya mulimo wa Musa kuba Leza nguwenya oyo wakakanana kuli nguwe, nkambo Wa kalibonya mu ciimo ca Musumpululu wa Mulilo a kubamba cilundu kuyaka mulilo. Elyo Wa kaboola kuli Musa mu citeo, wakakanana kuli nguwe. Yaa.

<sup>165</sup> Kulibonya kwa Leza kutaanzi, kuli Musa, mu citeo ciyaka mulilo, cisitilizyo. Kumbele ly a bantu, Leza wakavumbilila alubo a kusimpikizya Musa, kwiinda ku cisitilizyo, kwiinda ku kulivumba Mwini a Mulilo nguwenya, Musumpululu wa Mulilo nguwenya wakaseluka. Kuzwa—kuzwa waawo...Kuzwa kuli mbabo, aboobo bakali kukonzya buyo kumvwa Ijwi ly Leza. Sa mwacimvwa? Ijwi buyo, ba kamvwa Jwi Lyakwe. Nkambo, Musa wakali, kuli mbabo, Ijwi lipona. Musa! Mwabona, Leza wakatondezya Ijwi eelyo kapati kwiinda kuli Musa! Mwabona, Musa wa kati...Leza wa kati kuli Musa, “Koya kumusanza okuya. Ndi yooba a nduwe. Ngu...Taakwe cintu ciyo ima kumbele lyako. NDIME UULIKO LYONSE.”

<sup>166</sup> Musa wakaboola kumusanza, a kwaamba, “Ambweni tamu konzyi ku cisyoma eci, ndiza, pele Leza wakalibonya kuli Ndime mu Musumpululu wa Mulilo alimwi Wa ka ndaambilia zintu ezi.”

<sup>167</sup> “Oh, tu jisi misyobo yoonse ya zintu ezi mbuli zicitika.” Farao wa kati, “Baa!” Mweembezi Farao wa kati, “Ee, ujisi bupyungi bwa mabibo butakwe ankobuya. Baa, Ndi jisi basimabibo okuno abo bakonzya kusandula nzoka...i kasako—i kasako kuba nzoka. Amuboole kuno, basimabibo.” Elyo baka boola awo a kucita cintu nciconya.

<sup>168</sup> Musa wakalizi. Taakwe caka mupenzya. Mbanji buti basukukkopela mboba ka jisi, tii cakabamba lwandaano noluceya. Musa wakaima buyo nji. I cintu citaanzi nywebo mulizi, ba kakwakwalika koonse kwakaindi kaniini, elyo, cigaminina, muzoka wa Musa wakamena buyo zimwi zyabo. Mwabona? Nkaambonzi? Mboli baapostolo abo, tiiba kakonzya ku Ci pandulula. Musa takazi obo Leza mbwakali noyo cicita, pele Wa kali kuyo cicita.

<sup>169</sup> Amwiibaluke, Wa kati Jambresi a Janesi bayo bweedela mu mazuba aakumamanino, mwabona, basukukkopela. “Elyo kuyocenga Basale mbabonya nicali kukonzeka,” Matayo 24:24. Mwabona? Mbubonya ncobeni zintu nzyoonya, kucita musyobo nguonya wa maleele a zintuzyonse. Amulangilile Ijwi eelyo!

Amulangilile Ijwi eelyo! I muntu waamba kuti ulacita maleele kakuli uciyanda kusyoma mu Baleza botatwe, elyo kuli misyobo yoonse eyi; amuzwe ku musyobo oyo. Tu lizi kuti cili—kuti cililubide, mwabona, taakwe cintu mbuli ceeco. Mwabona? I Ijwi, Ijwi lyoonse, Ijwi lyoonse eelyo lizwa ku mulomo wa Leza! Matalikilo, Ijwi lyomwe! Okuno, kati, “Muta gusyi na kuyungizya ijwi lyomwe.” Mwabona, Lyeelede kuba Ijwi ndilyonya. Mwabona?

<sup>170</sup> Amubone, bantu baka bona cintucimwi eco cakacitika. Musa wakali vumbilidwe mbuli i... Wa kali musinsimi, alimwi Leza wakasimpikizya Ijwi Lyakwe lino, kaunka kumusanza okuya. Elyo wa kabona zitondezyo a zigambyo. Elyo mpawo, yaa, bantu aba bakali pambula beni, mbungano. Mwabona, *mbungano* caamba “baitidwe kuzwa.” Mwabona? Nibakamana kwiitwa kuzwa mu inyika a kuba bantu, mwabona, mpawo Leza wakalekela kulizibya Mwini kuti Wa kali Musumpululu wa Mulilo oyo. Wa katondezya mulumbe wa Musa. Mwabona? Wa kali Musumpululu wa Mulilo. Ambweni nibaka fotola cifoto ca Nguwo, Nda yeeyela, ikuti niba kali jisi makkamela, nkaambo coonse cakali aa Mulilo. Pele ba—ba katondezya eco, Leza katondezya kuti Mulumbe wakali luleme. Mulumbe wakali afwi, zintuzyonse mbo zyakabede, ba kali kuyolonzegwa mpawo. Kavumbilila musinsimi Wakwe ku bantu aba bakulonga.

<sup>171</sup> I bantu, bakayeeya, kubona cintucimwi cakacitika kuli nguwe. Lino wakala andeene lino kuzwa kuli ba Israyeli bamwi. Wa kala andeene, mulumbe wakwe wakala andeene, wa kala andeene kuzwa ku bapaizi, wa kala andeene kuzwa ku cintu cili coonse. Mwabona, wa kali muntu wandeene. I bantu bakabona cintucimwi cakacitika. Leza wakali vumbilila Mwini mu musinsimi Wakwe, ku kanana Majwi Aakwe kuli mbabo. Nce ncico Nca kacita. Musa wakali Ijwi eelyo lyakali kupona ku bantu, kavumbilidwe ku Musumpululu wa Mulilo, kukanana eco cakeelede kuvumbwa kunembo kunze lya zikutu zyabagtu. Mwabona?

<sup>172</sup> I Ijwi lyakeelede kuzwa kuli Musa, lutaanzi. Mwabona? Musa wa kajisi Ijwi. Aka lembwa a Leza, taakwe muntu wakali kukonzya Kwa apandulula, Musa wakeelede Kwa apandulula, lutaanzi. Nkekaambo nca kavumba kubusyu bwakwe, nkaambo wa... Sa mwa Ci bona? [Mbunga yaamba, “Ameni.”—Mul.] Mwabona?

*Ndeeli* Mbo libede. [Mukwesu Branham wabweza Bbaibbele lyakwe—Mul.] Tula konzya ku Li bweza, ku Li bamba, a zintuzyonse zimbi awo, pele Lye elede kuyubununwa. Kutegwa kuyubununwe, Musa wakacita kuba Leza ku bantu.

Nywebo mwati, “Obo mbufubafuba.”

<sup>173</sup> Baa, Wa kaambila, akwalo kaambila Musa, Mwini, “Uyo oba Leza, elyo Aaroni uyo oba musinsimi wako! ...?...” Mwabona?

Aboobo ngooyo Wa kaboola, mwabona, Wa kalili vumbilide Mwini, nkaambo Leza lyoonse uli kunze lya cisitilizyo. Oh, ma! Sa mwa Ci bona? [Mbunga yaamba, "Ameni." —Mul.] Leza ulisisidwe kubuleya.

<sup>174</sup> Kati, "Taata, Nda Ku lumba, Wa Li sisa kuzwa ku basongo a basimaanu, a ku Li yubununa ku bavwanda, kuli baabo bayanda kwiiya." Mwabona?

<sup>175</sup> Leza kasisidwe kunze lya cisitilizyo. Musa kavumba kubusyu bwakwe. Musa wakali Ijwi lyaka vumbilidwe kaindi. I bantu bakabona Musumpululu wa Mulilo oyo, kati, "Lino twa kkutila." Mwabona? "Lekela Musa akanane." Mwabona? "Talekeli Leza kukanana, kwataba obo tula fwa." Musa wakeenda moonya mu Musumpululu wa Mulilo oyo. Mwabona?

<sup>176</sup> Elyo kati lino, Wa kati, "Lino Nse—Nse kakanani limbi kuli mbabo mbuli boobu. Ndiyo bapa musinsimi." Mwabona? Elyo eyo njenzila lyoonse Mbwa kacicita. Mwabona? Kati, "Lino balekele kuya kutala." Pele oyu musinsimi weelete kuba a Ijwi eli. Ikuti kavumbilidwe a kansiyansiya, Leza taakwe naka mutuma. Ikuti uvumbilidwe a Ijwi, Leza uyo Li simpikizya. Leza ulapandulula Ijwi Lyakwe Mwini. Musa waka Aamba; Leza waka Apa ndulula. Ameni.

<sup>177</sup> Musa wa kati, "I Mwami mbwa kaamba obo!" Elyo Mwami wakacita eco buyo Nca kaamba. Eco caka Li bamba kululama.

<sup>178</sup> Lino Wa kati, "Lino, Musa, yebo wamvvisya. I bantu balavvisya lino. Wabona, Nda kutondezya, Nda kusimpikizya." Leza wakali vumbilila Mwini mu musinsimi oyu, kuti akanane Ijwi Lyakwe ku bantu. Musa wakali Leza uupona kuli mbabo, Ijwi lya Leza lipona lyaka yubululwa. Nkekaambo kubusyu bwakwe kuli vumbilidwe. Mwabona?

<sup>179</sup> Elyo sa mulizi kuti cintu nciconya mu Munakristo wini ulivumbilidwe sunu, ku batasyomi? Bala babona banakazi bajisi masusu malamfu a zintu, kwaamba nca... "Amulange siciliisy oyo wakale." Banakazi baloosa masusu abo kusule, kwaamba, "Jisi taya liponcede, taya lyaambali kutala kuya." Mwabona, Kuli vumbilidwe koonse. Bali ofweede. "Oh," ba lati, "Ndi jisi Ph.D, L..." Nse kwe ndaba eco nco jisi, ucili utakwe luziboo ku Ijwi. Mbo mbubo ncobeni. "Oh, eco, eco ncintucimwi biyo ciini. Nda..." Amubweze ziiyo ziniini lutaanzi.

<sup>180</sup> Ino kujatikizya bantu abo baamba kuti bali vumbilidwe mu Busyu bwa Leza, a kukambauka kansiyansiya kamwi ka mbungano? Oh, luse, akaka! Abo bayungizya a kugusya, a zintuzyonse zimbi, kwiinda ku kunjizya iziiyo zyabo zini a miyeeyo yabo ini, elyo kutali Ijwi lya Leza, mwabona, musyobo nzi wa cisitilizyo? Eco cijisi cisitilizyo cabupaizi. Leza wa kacizapula cisitilizyo eco kujuka cakumanininina!

<sup>181</sup> Ba kati, "Taakwe cintu cili boobo mbuli basinsimi. Taakwe cintu cili boobo, mu mazuba aya aakumamanino,

mbuli baapostolo a basinsimi. Taakwe cintu cili boobo mbuli kuponesegwa kwa Buleza. Taakwe cintu cili boobo mbuli balunguluzi, limbi. Taakwe cintu cili boobo mbuli Marko 16 ilimu kuzulizigwa. Bukkalo bwa buapostolo bwa kamana.” Ba ka Li vumbilila kuzwa ku bantu. Pele Leza wakeenda kuzwa ncobeni a Muuya Wakwe Uusalala wa Mulilo, a kuzapula cintu eco kuzwa atala kusika ans-... [Kabeela katakwecintu a teepu—Mul.] Leza wa kazapula cisitilizyo.

<sup>182</sup> Musa wakali cisitilizyo, Ijwi lya Leza lipona kali vumbilidwe kunze lya mubili wabuntunsi. I Musumpululu wa Mulilo wakali muli Musa, mubwini, kaukanana ceeco cakeelede kuyo vumbililwa kwakwiinda ciindi kunze lya zikutu, nywebo mwabona.

<sup>183</sup> Lino, cakuti, Ijwi, Ijwi lya kaletwa, mpawo Ly a kalemwa, mpawo Ly kabikkwa kunze alimwi lici vumbilidwe, nkambo Leza lyoonse wakali mu Ijwi eelyo. Amen! Walo ndi Ijwi, lyoonse. Wa kali mu Ijwi eelyo. Nkekaambo Ijwi eelyo lyakacita ku vumbililwa.

<sup>184</sup> Oh, mukwesu, mucizi, sa uli muku Ci jata? [Mbunga yaamba, “Ameni.”—Mul.] Amulange! Sa tamuboni? Ly a kali vumbilidwe kwiinda mu makkalo aya, kweendelana kuli ceeco Leza nca kaamba, alimwi Liyo julwa mu mazuba aakumamanino, ezyo Zinamatizyo zili Ciloba ziyo tondezegwa, alimwi Cintu cimaninide ciyo boola mukulibonya ku bantu, eco cakacitika kuzwa kumatalikilo. I oora lya Mulumbe wa angelo waciloba, makani onse aasisidwe aa Leza aelede kuzibwa muli Eliya oyo, eli oora lyamamanino; obo Kristo mbwa tandwa mu mbungano Yakwe, Mwana wa Leza; obo Mbwa yubununwa mbuli Mwana wa muntu alubo; obo Mbungano eyo mboiyo bikkwa mu ncililano, a zintuzyonse zya buzuba bwamamanino, kunyina kayanza, kunyina kabungwe, cakumaninina buyo Ijwi lipona mu mugame. “Ndiyo bweza omwe, a kusiya omwe. Ndiyo bweza *oyu*, a kusiya *oyu* umwi.” Mwabona? Kuli buyo... Takukwe tutambo, kunyina tubungwe, kunyina zyaanzyo na cintu; walo moyo a Leza, alimwi Walo alikke. Mwabona?

<sup>185</sup> Amubone, kali vumbilidwe mu mubili wabuntunsi. Musa a Ijwi eelyo, kali kanana eco cakali kweelede kuyo bikkwa kunze lya zikutu zyabagutu kwakwiinda ciindi. Kutegwa... Mbubonya Kristo Musa wesu. Kristo ngu Musa wesu. Wa kali Leza kavumbilidwe mu mubili wabuntunsi, kavumbilidwe mu buntu, mu mubili. Mbo mbubo. Alimwi Ngu mbobuca nguwenya, sunu, amuya myaaka. Wa kali vumbilidwe a zikutu zyabagutu. Wa kali vumbilidwe. Elyo ciindi eci Wa kali vumbilidwe mu Muntu. Mwabona? Lino amubone, “mbobuca nguwenya, sunu, amuya myaaka,” kasyomezya Ijwi Lyakwe ku bukkalo *obu*. Ucili Kristo, Ijwi lya kasyomezegwa ku bukkalo *obu*, kali vumbilidwe mu mubili wabuntunsi. I Ijwi ngu Leza.

<sup>186</sup> I bunanike muntu. I bbala *Kristo* lyaamba kuti “umwi unanikidwe,” mwabona, “umwi unanikidwe.” Nkokuti, Musa wakali Kristo mu mazuba akwe, wa kali umwi unanikidwe. Jeremiyा wakali Kristo mu mazuba akwe, a cibela ca Ijwi lya buzuba obo.

<sup>187</sup> Pele cindi Jesu nakasika, Wa kaboola mbuli Munununi Umwi Unanikidwe; elyo oko kwakali kobilo Musa a koonse kwakali muli Musa, a Ijwi lyoonse, a Buleza boonse camubili bwakali muli Nguwe. Nkekaambo cisilitizyo coonse camu tempele ca kazapuka, elyo cuuno ca luse ca kaboola mu kulibonya kulondokede, Wa kali Umwi unanikidwe.

<sup>188</sup> Amubone lino, i cisilitizyo mu mibili wabuntunsi, i Ijwi lya kasyomezegwa ku bukkalo obu lyeelede ku vumbililwa alyalo. Amubone. Mamembala aa mbungano ayandisya cibi a basizibi taba konzyi ku Li bona nkaambo ka cisilitizyo cabuntunsi.

<sup>189</sup> Nkekaambo nciba takali kukonzya ku Mu bona. “Baa, Walo muntu. Ino Wa kazwa kuli? Ino ncitupa nzi ca luswaanano Nca jisi? Ino Uzu lilwa ku mbungano nzi?” Ndi yanda ku kanana ali ceeco sunumasiku, “Ino Uzu lilwa ku mbungano nzi?” Mwabona? Elyo aboobo, amubone, lino, “Ino Uzu lilwa ku mbungano nzi, ni—ni nkamu nzi? Ino ncikolo nzi Nca kajisi? Ino nkokuli Nkwa kajana lwiyo Lwakwe? Ee, oyu Muntu wakazyalwa, kweendelana ku kansiyansiya, na kweendelana ku i—i kaano ka Nguwe koonse kuno, oyu Muntu wakazyalwa kunze lya lukwatano lusalala. Baa, Walo, kasimpe, Ngwa dyabulosi. Mwabona, Ngwa—Ngwa dyabulosi. Wa kazyalwa kunze lya lukwatano lusalala, a Josefa wa kamukwatila buyo kumuvuna kuzwa ku kuumwa mabwe, nkaambo waa kali simamambi. Elyo oyo Muntu sa uboola koonse aku twaambila eco bapaizi caku cita?”

<sup>190</sup> Elyo mpaawo kwa kaimvwi Leza awo, kayubununa Ijwi eelyo, kalila, “Leza Wangu, nkaambonzi Yebo wa Ndi siya?” Inyimbo nzyoonya nziba kali kwiimba mu tempele, Davida nzya kabapangila myaka yakainda, kujatikizya kuli Kristo. “Oonse mafuwa Angu ba Ndi dunamina. Ba kayasa maanza Angu a matende Angu.” Elyo mpaawo baka liimvwi awo, kabaimba obo, a Muntu nguonya kafwa a ciingano. Elyo cindi nibakamana alimwi i....

<sup>191</sup> Cindi Na kafwa, Leza wa Julu wakaseluka, mbuli Mbwa kacita aa Cilundu ca Sinai, a Mulilo Uusalala, a kuumpa cisilitizyo eco camu tempele kuzwa atala kusika aansi, kucizapula kwanzaana. Elyo ino ncinzi ncibakali kuno cita? Kulanga nkoonya okuya aanze lya mpulungwido ya tempele, aa Kalivari, elyo mpaawo kwakali Leza mu kulibonya kwaantangalala, i Cituuzyo.

<sup>192</sup> Pele taba Ci boni akwalo, asunu. Leza mu buzuba obu bwamamanino wa zapula oto tunsiyansiya kuzwa, a ku leta Ijwi

lya bukkalo obu ncobeni mu kulibonya kwaantangalala, elyo nekubaboobo taba Li boni. Ta ba Li zyi buyo. Nci—nci tete loko. Mwabona, nci tete loko biyo. Cili kule loko kuzwa ku zintu zya inyika.

<sup>193</sup> Nda kakambauka buzuba bumwi ku kubungana kumwi, a, “Kuba noti.” Bumwi bwa mazuba aya Ndi yanda kuyo kanana ali ceeco, “Kuba noti.” Tuli noti toonse zya muntuumwi, aboobo—aboobo Ndi yooba imwi ya Kristo. Paulo wa kati walo “kali kulangwa mbuli mufubafuba.” Kasimpe, mweelede kuba. Mwabona, citola noti kujatanya zintu antoomwe. Mwabona? Mbo mbubo.

<sup>194</sup> Aboobo amubone cisitilizyo, i mubili wabuntunsi. Peepe, lino, bantu bayandisya cibi tiiba kakonzya kubona ceeco. Abo bantu bakombi batunsiyansiya, tiiba kakonzya ku bona ceeco, nkaambo Wa kali muntu. Nkaambonzi? Oyo mubili wabuntunsi wakasisa Leza.

<sup>195</sup> Lino, ikuti na Wa kali Musumpululu wa Mulilo Mupati wakaseluka, mwabona, Musumpululu wa Mulilo mupati wakaseluka a ku tondezya kuti obo Mbo wa kabede, kuteeti Wa kali oyu Musumpululu wa Mulilo mupati, niba kausyoma oyo; ikuti Jehova na kaunka koonse.

Pele mwabona eco Nca kacita, kutegwa A konzye kweenguluka bantu boonse, basongo a basimaanu, Wa kaliyubununa biyo Mwini mbuli Mbwa kasyomezya Musa, mwabona, “Njo kanana kuli mbabo kwiinda ku Musinsimi.” Elyo Wa kali Mwana wa muntu, Musinsimi. Elyo bamwi babo baka Ci ziba, kutandila peseenti yakabeela komwe keelene kamumwaanda omwe ka mwaanda omwe mu inyika, baka Ci syoma; bamwi babo teeba kacita. Pele, Mbwa kabede, mbubonya biyo.

<sup>196</sup> Pele ngooyo Leza Singuzu wakaliimvwi mu kulibonya kumaninide, Cuuno ca Luse! Wa kafwa cindi bana Bakwe Beni kabaamba...Bana Bakwe Beni awo, kabaamba, “Ta tuka Mu tambuli! Amu Mu tande!” A Swidwe mate.

<sup>197</sup> I cikozyanyo, kaindi loko, cindi Davida nakali kuzwa mu tempele, mwaami waakakwa. Kaselemuka kagwagwa, elyo mulombwana, muniini uolemene kayavula kumbele, teeба ka mu botelwa, wa kamwiita kuti “sikuupaupa wakale” na cintucimwi, kaswidwa mate nkoonya ku busyu bwakwe. Elyo mulindizi oyo wakasomona panga, kati, “Nse kalekeli mutwe oyo wa mubwa kuucili aali nguwe; nkabela kaswida mate ku mwaami wangu?”

<sup>198</sup> Davida kati, “Ko muleka alikke, Leza wamwaambila ceeco.” Davida antela taakazi eco ncakali kwaamba. Katanta cilundu, kacebuka, kalila.

<sup>199</sup> Myaka ya myaanda ili lusele kuzwa awo, Mwana wa Davida wakali kutanta cilundu nciconya, kalanga koonse, koomokela

Jerusalemu, Mwaami waakakwa. Elyo baka swida mate mu busyu Bwakwe.

<sup>200</sup> Sa tamuboni? Ncintu nciconya. Mwabona Ijwi eelyo kali zumanana kuyaansi, kuzumanana kutobela kuyaansi sunu? Lyoonse waakakwa kuli banabunji, mwabona, nkabela waka syomwa ku basyoonto.

<sup>201</sup> Lino, mwabona, teeba kakonzya ku Ci syoma. Ba Griki abo, teeba kakonzya ku Mu bona, Wa kali mu tempele Lyakwe lyabuntunsi. “Baa,” ba kati, “zina lya muntu oyu ngu Jesu; Walo uzwa ku Nazareta.”

<sup>202</sup> Lino, baka jisi buyo zina lyomwe okuya mu mazuba ayo. Mbuli, “John, Jim,” ba kati, “John uzwa ku Jeffersonville, Jim uzwa ku New Albany,” na cintucimwi mbuli ceeco, nywebo mwabona.

<sup>203</sup> Wa kati, “Oyu ngu Jesu uzwa ku Nazareta. Cila syomwa kanji kuti Banyina bakamisigwa kuli silumamba.” Mwabona? Elyo mpawo mbo mbubo mboba kasyoma. Masimpe! Elyo kwaamba kuti ba kati, lino, “Elyo oyu ngu Jesu waku Nazareta.” Nywebo mwabona? “Ino Nguni?” Mwabona, tiiba kakonzya ku Mu mvwisya.

<sup>204</sup> Pele, baa, Ijwi eeli lya buzuba obo, cindi Na kali kukambauka, kati, “Amulingule Magwalo. Muli Ngawo muyeeya kuti mujisi Buumi Butamani, alimwi nge Ngawo alungulula Mebo Mbwe bede. Ikuti na tamu konzyi ku Ndi syoma; amu Ndi lube, mbuli cisitilizyo, amusyome Ijwi eelyo liboola. Bobilo mbumboni,” Wa kati, “Ndila kanana nkabela Taata ula Nda ambilila.” Ameni. Mbo mbubo.

<sup>205</sup> Ndila kanana Ijwi lya buzuba buno, nkabela Taata ula Li tonkomeka. Lino mbumboni kuli ndinyewe na? [Mbunga yaamba, “Ameni.”—Mul.] Mbo cibede, mwabona. Mbo mbubo mbo ceelede kuzulizigwa.

<sup>206</sup> Amubone mu Bakorinto Babili lino, i...mu Bakorinto Babili, cipati 3, kampango 6, tempele lya kale lyakayakilila Leza kunze lya zikutu zyakale, kuzwa kuba Juda. Cindi cisitilizyo cakale nicaka delulwa, nekubaboobo ba Juda...bakali ofweede kuli Nguwe kuti Wa kalini, alimwi Oyo Mbwa yooba. Elyo mpawo Pentekoste yakayubununa Oyo Leza wabwini a muumi mbwa kabede, cindi cisitilizyo eco nicaka zapulwa mu bubili, a Leza, kuzwa aatala. Nkaambonzi cisitilizyo eco nco cakacitila boobo? Nkaambonzi caka cicita?

<sup>207</sup> Nkaambonzi kwakaboola Mulumbe uli boobu sunu kuzocita eco Nco wacita? Nkaambonzi Wa kaboola? Nkaambonzi?

<sup>208</sup> Kwakali muntu umwi wakali kuyanda ku ndiita, buzuba bumwi okuno kutali ciindi cilamfu cainda, kali kuyanda kukazyanya a ndime kujatikizya i—i bukkalo bwa mbungano, kuteeti, “Leza wakali mu mbungano Yakwe iisalala,” a zintu

mbuli zeezyo. Elyo Nda kajana kuti wakali mukambausi mwanakazi, nkabela Nda kaluba buyo kujatikizya nkuko. Mwabona, ikuti nakali mwaalumi umwi eco nicaka lulama, nicakaba caandeene. Pele, aboobo, pele ino cigwasyanzu kuya kulaale okuya mu cisi cimbi, kakuli Nde elede kusiya muswaangano okuno kucicita, nywebo mwabona? Aboobo Nda kaba leka buyo balikke. I boofu basololela boofu, boonse bayo—bayo wida mu cilindi.

<sup>209</sup> Aboobo, aboobo lino mu bukkalo obu, cindi cisitilizyo cakale catunsiyansiya a catubungwe nica zapulwa, kuzwaku Ijwi lya Leza, aboobo Lila konzya kuyubululwa! Sa mwabona Nce amba? I kansiyansiya kati, “Zintu ezyo zyoonse zyakamana.” A Li mvugwe kapati aniini. “I zintu zyakamana.” Pele, mu buzuba obu bwamamanino, nkuti cisitilizyo catunsiyansiya cazapaulwa kobilo, nkabela ngooyo uliimvvi Musumpululu wa Mulilo. Mwabona? Walo Ngooyu we, kayubulula Ijwi lya buzuba buno. I cisitilizyo cazapaulwa.

Lino, banyaika, nekubaboobo taba Li syomi pe. Takukwe makani kucintu, taba Li boni pe. Taba Li boni pe. Tee lyaka tuminwa mbabo.

<sup>210</sup> Amuyeeye, Mwana wa Leza taka yubununwa ku Sodoma; bakali batumwa bobile. Mbo mbubo.

<sup>211</sup> Pele, eci, Leza Mwini mu mubili wabuntunsi waka yubununwa kuli Abrahamu, Musale. Elyo amulange eco Nca kacita kuti Ali yubunune. Elyo lino Abrahamu wakalizi, cindi Na kaziba eco cakali mu miyeyeo ya Sarah kunze Lyakwe, wa kati, ka Mwiita kuti, “Elohimu! Mulanda wako...”

<sup>212</sup> Amubone lino, aboobo inga ca yubululwa. I Ijwi lya kajisi cisitilizyo kuli Ndilyo myaka eyi yoonse, ku bantu, “Tali konzyi kucitwa.”

<sup>213</sup> Mula yeeya na nkambauko Nje kakambauka kuseeni cindi Ne kazwa kuno ciindi citaanzi, kujatikizya Goliati a Davida? Nda kati, “Amulange sikuzundikizya okuya, kaamba kuteeti ‘mazuba aa maleele akamana.’”

Amulangilile mateepu mbwaya buselemuka, amulangilile imwi aimwi, nzila mbo Ly aboola antangalala a antangalala maningi; ikuti na muli jisi matwi akumvwisy, mwabona, meso akubonya.

Ncinzi? Nda kati, “Njeeeyo iliimvvi inyika eyo mpati yabupaizi, kayaamba mu bukkalo obu bwasayansi, kuteeti tacikonzyi kucitwa.” Pele Nda kati, “Leza...” Mu Mumuni oyo, Ka utana kusolwa kufotolwa, pele lomwe; kwina niwa kafotolwa kaindi. Kwakali kunselelo lya mulonga okuya; kwina neba kafotola cifoto ca Nguwo. Mwabona? Nda kati, “Wa ka ndaambila kuti inga ciyo citwa; kuti inga Uyo ita nkabela ciyo fumpa masi.”

<sup>214</sup> Elyo akwalo ku Mwiyyi Davis, kati, “Yebo, a lwiiyo lwabwaambe bwamabala a cikolo, kainda mu giledi seveni, uyo kombela bami a basimalelo, nkabela uyo talisya lubukulusyo olo luyo fumpa masi?”

Nda kati, “Obo Mbwa kaamba.”

<sup>215</sup> Elyo caka citwa. Mwabona, caka citwa. Eco nceecintu ca ncico, mbocibede, Ta yandi bupanduluzi. Wa kacicita. Mwabona, Wa kacipandulula kale, eco cilalipandulula cini, mwabona, kwiita Basale Bakwe, mwabona, kuzwa—kuzwa ku bantu baziimo zyandeene. Lino ca yubululwa.

<sup>216</sup> Nda kati Davida wakayutuka awo, mulombwana, muniini, maningi ukotede loko utaboteleyzi kajisi musana wakwe udiimene, nkwilipo mu janza lyakwe. Elyo, baa, Saulo waka mulanga, mutwe wa nkamu ya bakutausi, kati, “Baa, yebo, to kaisigwa akwalo pe!” Wa kati, “Atu bone na inga Nda kupa Ph.D. na cimwi.” Ka musamika cilwanyo, ci... Wa kajana kuti tii cakeelela muntu wa Leza.

<sup>217</sup> Kati, “Ko ndisamununa cintu eco.” Kati, “Ta ndizi cintu kujatikizya ceeco.” Kati, “Kondi leka njinke mu nzila eyo Nje zyi, Nje ka lwanya mulavu, eyo Nje kalwanya masekese.” Wa kali musyobo wamuntu wamusokwe. Wa kati, “Kondi leka njinke mu nzila eyi.”

<sup>218</sup> Elyo Goliati oyu wakale wa kati, “Sa mundi tumina mubwa waku ndilwana?” Kati, “Njo kudyunga kumpela lya sumo lyangu a kulengeleya mutunta wako kutala okuya a kulekela bayuni kuulya.”

<sup>219</sup> Davida wa kati, “Wa ndiswaana mbuli mu Filisiti, a cilwanyo a sumo, nkabela Njo kuswaana mu Zina lya Mwami Leza wa Israyeli.” Amulangilile musinsimi, Davida, wa kati, “Sunu Njo kosola mutwe wako kuzwa ku makuko ako.” Amen! Oh, ma! Wa kalizi nca kajisi, Oyo ngwakali kusyoma, alimwi wakali lamidwe kumaninina kuti Wa kali kukonzya kubamba eco nca kaaba kuli Nguwe. Mwabona? Aboobo caka citika nekuba.

<sup>220</sup> I kaambyo kakale, “I mazuba aa maleele akamana,” malambo amwailwa ansi! Jehova uciimvwi mu kulibonya kumaninide, kayubulula Ijwi Lyakwe, Umwi watondezegwa. Mbo mbubo. Amubone.

<sup>221</sup> I mbungano ya Bamasi ayalo yakofwaazigwa ku cisitilizyo, nica kamana kuzapulwa a kutondezya kwa Leza, cisitilizyo cabupaizi. Buti? Ku kusisa Ijwi mu muntunsi alubo. Mbo mbubo ncobeni eco Israyeli nciya kakacilwa kubona. Ikuti nakali Angelo umwi na cintucimwi, Israyeli naka Ci syoma. Pele mukuba kuti tee cakakonzya kuba Angelo, caka cita kuba muntu. Amen!

Leza takonzyi kutyola Ijwi Lyakwe. Mu mazuba aakumamanino ceelede kuba cintu nciconya alubo. Mwabona?

Ncinzi cakoofwaazya Israyeli? Uulya Muntu. "Yebo uli Muntu ulyeezekwa Lwako kuba Leza." Ako nkekaambo nkebaka Mu jaila, alimwi, sunu, nkaambo Mulumbe wasika kwiinda mu muntu a kutali Baangelo. Mwabona? Leza takonzyi kucinca nzila Yakwe, kucinca Ijwi Lyakwe. Wa kati Ta kacinca. Mwabona? Amubone, kasyomezya! Elyo Bamasi balo ofweede mbubonya sunu mbuli Israyeli mbo yakabede, nkaambo (nzi?) cisitilizyo. Leza wakalisisa mu muntunsi, wakoofwazya Israyeli.

Amubone, kwa kaofwaazya umwi lyoonse. Umwi, Ci yoofwaazya; umbi, Ci yoyubununa Bwini. Ci yojala meso abamwi, a kujula meso a bambi.

<sup>222</sup> Amulange, Jesu wakaima a kuti, "Ee, zina lyako ngu—ngu—ngu Saimoni, alimwi zina lya uso lyakali Jonasi."

Wa kati, "Mwami Leza!" Mwabona? Filipo . . .

Wa kati, "Mbobuti Mbo ziba?"

Wa kati, "Bona mu Israyeli, muli nguwe takukwe luuni!"

Elyo wa kati, "Rabi, ndelili Ni wakandiziba?"

<sup>223</sup> Wa kati, "Filipo katana kwiita, cindi nooli kunsi lya cisamu, Nda kubona."

<sup>224</sup> Wa kati, "Rabi, Uli Mwana wa Leza. Uli Mwaami wa Israyeli."

<sup>225</sup> Ee, mbaabo bakaliimvwi awo, kati, "Ngu Beezebule." Mwabona? Ino Ca kacitaanz? Kajula meso abamwi, kaofwaazya bambi. Ncinzi bapaizi nco bakaamba? "Baa, Mulombwana oyo ngu Beezebule!"

<sup>226</sup> I mukaintu muniini wa kati, "Ndi lizi Mesiya ulaboola, oyo uutegwa Muntu Munanike. Mwabona, Muntu Munanike uyo boola. Tee twa kajisi basinsimi . . . Yebo weelede kuba musinsimi. Pele Muntu Munanike uyo boola. Tula Mu langila. Aya mazuba aakumamanino kuli Bamasi . . . na kuba Juda." Kat, "Obu mbuzuba bwamamanino." Mwabona, Musamaria a mu Juda bakali kulangila Mesiya. Mwabona? Kat, "Eci nce ciindi Cakwe kuti alibonye. Tu lizi, cindi Walo asika, Uyo cita zintu ezi. Uyo twaambila zintu ezi."

Jesu wa kati, "Nde Ndime."

Meso akwe akajuka; basilikali, bapaizi bakofwaazigwa.

<sup>227</sup> Mbo mbubo Makanimabotu mbwacita lyoonse. Ala jula meso a bamwi, alayubununa Bwini kuli bamwi, kumwi Ala ofwaazya bamwi; ajisi bupandululi bobilo. Bamwi inga babweza Mwana oyo a ku Mu tonkomeka kulanga, nkabela nkofwaala; bambi inga ba Mu bweza a kuzwa kweenda a Nguwe. Cila andeene.

<sup>228</sup> Mbili mbo cakacitwa mu makkalo oonse, Buleza bwakasiswa mu mubili wabuntunsi. Amubone, Wa kacita. I basinsimi bakali Buleza, bwakasisidwe. Ba kali Ijwi lya Leza

(sa mbombubo?) kasiswa mu mubili wabuntunsi. Aboobo, teeba kamu ziba Musa wesu akwalo, mwabona, Jesu.

<sup>229</sup> Amubone wakasiswa kunze lya zikutu zyakale zyabagutu mu tempele lyakale, lyakali Ijwi, lyakali Ijwi lyaka yubululwa aa matafule aa mabwe.

<sup>230</sup> Lino, Ndiyo sola kutantamuka kutandila maminiti ali makumi obile lino, ikuti Nda konzya, kucibamba cisela kwiinda aa leveni. Amubone, ikuti na mwalanga, Nda vununa mapeegi amwi awa, nywebo mwabona, kutantamuka ku...aboobo inga Nda yaamuka ku kukosola i...kucibamba kuba cilamfu loko. Ndi lizyi mumvvide kupya, kukatala.

<sup>231</sup> Kunze lya tempele lyakale, mu cisitilizyo, ncinzi cakali kusule kunze okuya? Wakali Jehova na? Ncinzi cakasisidwe kusule okuya? Ncinzi cisitilizyo nco cakali kusisa? Oh, aleluya! Ncinzi cisitilizyo nco cakali kusisa? Ca kali kusisa Ijwi. I cisitilizyo, zikutu zyakale zyabagutu, zyakali sisidwe, ka sisa Ijwi ku meso abo, aakunyama. Kunze okuya, akwalo, kwakali zinkwa zyamabonwabonwa. Kunze okuya, akwalo, kwakali Bulemu bwa Shekina. Pele Bwa kali sisidwe koonse kuli mbabo. Bwa kali sisidwe boonse. Boonse Bulemu bwa Leza bwakali nkoonya kunze lya cikutu eco cakale camugutu, mbo mbubo, boonse bwakasiswa ku liso lyakunyama.

<sup>232</sup> Mbo bubede sunu, akwalo. Bwalo bwiitwa kuti “cikama ca babumbulusi basalala, basikwiindilizya,” pele teeba kazyi eco cakasisidwe kunze okuya. Eco ncencico nco batazyi. Mwabona?

<sup>233</sup> Mpawo cindi Leza, mu luse, kazapula cisitilizyo kuli mbabo kuti babone, ba kavungidwe maningi mu tunsiyansiya twabo ba...caka cili sisidwe kuli mbabo, nekuba ku buzuba buno.

<sup>234</sup> M bubonya lino! I Bulemu, Nguzu zya Muuya Uusalala, Bulemu bwa Shekina obo buvunikila musyomi, lino Nda amba musyomi wini, obo bucitya milimo ya Leza a lusyomo kuboola muli nguwe, kusyoma Ijwi lya Leza, lyoonse eelyo lisisidwe ku meso abo. Ba lati, “Zyalo zintu zyakamana.” Nywebo mwabona, ba cipona kunze lya cisitilizyo.

Tamu cili kunze lya cisitilizyo eco, Nobana baniini, Leza waboola mu kulibonya kumaninide kuli ndinywe.

<sup>235</sup> I buzuba bumwi, Mukwesu Fred Sothmann, Mukwesu Tom Simpson...Nse zyi na wasola kusika okuno na pe. Besu bakubwene bakali kutala ku mbungano ya Baptisti, nkabela mukutausi wa kaamba cintucimwi cakali kulimvwisywa kabotu kapati. Toonse swoebu twa kati, “Ameni!” Bantubonse mu mbungano ba kalandabika nsingo zyabo a kucebuka. Mwabona? Mwabona? Twa kajana cikwa eco cakazwa kunze lya Shekina okuya, nywebo mulizi, nkabela twa kabotelwa kucijana. Twa kati, mu kwaamba kumwi, “Twaku Lumba, Mwami!” Mwabona? Elyo, cindi niba kacita, balombwana abo bakali vumbidwe kapati cakuti baka ciseka buyo. Teeba kazyi obo Mbo

cakabede koonse. Mwabona? Ba civumbilidwe. Aboobo, kuli bamwi mukati a bamwi aanze. Elyo aboobo... Pele Leza uli mu kulibonya kumaninide kuli ndiswe, sisidwe. Mbubonya lino!

<sup>236</sup> Mpawo cindi Leza, mu luse Lwakwe, kazapula cisitilizyo, Wa kaletwa mu kulibonya kwaantangalala. Pele, ba kali vungidwe maningi mu tunsiyansiya twabo, Wa kacili sisidwe kuli mbabo.

Mbubonya lino! Boonse Bulemu obo, bulisisidwe, bulisisidwe nkambo ka ndiswe muli Kristo, Ijwi, Lili ndi Tempele yesu.

<sup>237</sup> Oh, lino, Ndiyo elela kulingula cakusakana muli ceeći aniini. Mundi jatile ku kunyanyamukwa kwangu kuseeni kuno, pele, oh, Nda—Nda kali kuyanda kupa ceeći kwa ciindi cilamfu, Ndi... cili mukwaanga biyo muli ndime. Mwabona?

<sup>238</sup> Amubone, boonse Bulemu buliko muli Leza buli mu Ijwi. Zilongezyo zyonse zili muli Leza zili mu Ijwi. Zili sisidwe, kuli sikutasyoma, kwiinda ku tunsiyansiya. Sa mwabona Nce wamba? Pele boonse Buli muli Kristo. Koonse obo Leza mbwakabede, Wa kali *sukumuna* Mwini, “kenosi,” a kunjila muli Kristo; elyo aswebo, muli Kristo, tuli kunze lyä cisitilizyo.

<sup>239</sup> “Ee, Ndili muli Kristo,” yebo waamba. Elyo mpawo kusyoma kuti kuli Baleza botatwe? Kubbizya mu zina lyä “Taata, Mwana, a Muuya Uusalala”? Kusyoma mu tunsiyansiya oto toonse a zintu nzo musyoma, aya baalu? Peepe, ucili kunze lyä cisitilizyo. Wabona? Njila mu cisitilizyo. Walo, Kristo, ndi Ijwi.

<sup>240</sup> “Buti? Nse syomi mu kuponesegwa kwa Buleza. Nse syomi mu maleele aya a zintu mbuli zeezyo.”

<sup>241</sup> Ee, yebo wabona, toli—tolu mumo, mukati ka cisitilizyo. To zyi cintu kujatikizya Ncico. Mwabona? Kristo ndi Ijwi! Elyo cindi twa noli mu Ijwi, tuli muli Kristo. Elyo mbobuti Mbwe konzya kuba muli Kristo, elyo ndikake Kristo? Wa kali Nguwe wa kati, “Taakwe ijwi liyo yungizigwa na kugusigwa.” Mbobuti mbo konzya kugusya a kuyungizya, kai? Wabona, citondezya cisitilizyo eco caka kuvumbilila do. Wabona?

<sup>242</sup> Tuli muli Nguwe! Mpawo swobo, mukuba muli Nguwe, tu civumbilidwe kuli basibukombi a bamaiyi bapati iba inyika. Mwabona, Bulemu bwesu mbo tu jisi a kubotelwa, tu civumbilidwe kuli baanze. Ba yeeya kuti tuli “nyongene, bagambya,” alubo. Mwabona? Mwabona? Mbo mbubo. Pele swobo notuli mukati omu, muli Kristo, kabbizigwa muli Nguwe, (Bakorinto Bataanzi 12), muli Nguwe, tuli basicaabilo ca Bulemu obu. Mwabona? Pele kutali aanze pe; mu cilangalanga mukati, ku Li kaka. Mwabona?

<sup>243</sup> Aboobo lino tu tambilidwe muli Nguwe, kuba basicaabilo ca koonse obo Mbwa bede. Tu tambilidwe muli Nguwe, oko kusisidwe kuli basikutasyoma, kwiinda ku cisitilizyo ca mubili wabuntunsi. Mwabona? Ba lizi kuti Bulemu, bala Bu bala, Buli

mu Ijwi awa, “Bulemu bwa Leza” a zintu mbuli ezyo, ndi ijwi buyo kuli mbabo. Kuli ndiswe, nku yubululwa! Mwabona? Tali cili ijwi; kalo nkasisimpe! Amen!

<sup>244</sup> Leza wa kati, “Akube mumuni,” eelyo lyakali ijwi. Pele lino kuli mumuni. Ta lili ijwi; lyalo mumuni. Mwabona Nce wamba na?

<sup>245</sup> Lino talili biyo Ijwi lyakalembwa kuli ndiswe, kalo nkasisimpe. Tuli muli Nguwe. Lino tuli mukubotelwa. Lino twa Mu bonesya. Lino twa Mu bona, Ijwi, kuliyubulula Mwini. Lili sisidwe, okuya, nkaambo (nzi?) Lili vumbidwe mu mubili wabuntunsi. Mwabona?

<sup>246</sup> Oh, ba lati, “Eyo nkamu yabantu, nku cikolo nzi nkoba kaunka? Ino—ino ndwiiyo nzi ndo bajisi? Nku, nko—nko kuli nkoba kazwida? Ino—ino ni inkamunzi nkoba zulilwa?” Mwabona? Huh! Mwabona, taba Ci mvwisy.

<sup>247</sup> I muntu wa kati ku muntu umbi, buzuba bumwi, kati, “We elede kuzulilwa ku kabungwe kuba Munakristo.”

<sup>248</sup> Wa kati, “Ndili Munakristo; Ta ndizulilwi kuli kamwi kabo.” Uh huh. Kati, “Leza wakagusya kkulenge eli kuli ndime,” kati, “lino uyeeya nzi kujatikizya ceeco?” Wa kali dokotela. Wa kati, “Ndito ndeezye kabungwe kacicita.” Mwabona? Yaa. Mwabona? Ci civumbidwe.

<sup>249</sup> Tuli mukati ka Kristo. Lino, mbuli kaindi, basyomi beni boonse bala Mu bona, Ijwi lyaka syomezegwa lya buzuba buno, kuyubululwa antangalala. Eelyo ndi bbala pati ikuti na mula konzya kulimvwisya. Mwabona? Mwabona? Basyomi boonse beni, abo bali mu Ijwi, babona Leza antangalala. I cisitilizyo cazapulwa, nkabela Leza waima antangalala kumbele lyanu, kayubulwidwe. Mwabona? Leza, kayubulwidwe, cantangalala.

<sup>250</sup> Kutegwa kucitwe ceeci, cisitilizyo cesu cakale catunsiyansiya atubungwe ceelede kuzapulwa alubo. Kutegwa tu bone kasimpe obo Mbo cibede, mweelede kuzwa akati ka zintu ezyo. Mwabona? Tamu kacicit pe; bayo zumanana kuvwapika cisitilizyo eco kumbele lyanu, ziindi zyoonse, “Oh, takukwe cintu kuli Ncico.” Pele Nceeci cili lemedewe, alimwi Nceeci cayubululwa, nywebo mwabona. Mwabona?

<sup>251</sup> Lino, ino kuti mulombwana wakaka kubona zuba, waamba, “Oh, okuya, Ndi lizi Leza wa kati, ‘Akube mumuni,’ pele kwiina cintu cili boobo. Nda selemukila mu kaanda kakaindi. Nda—Nda kaka buya kuubona”? I mulombwana uli nyongene. Kuli cintucimwi cilubide kuli nguwe.

<sup>252</sup> Kuli cintucimwi cilubide ku mwaalumi na mwanakazi, ukonzya kubona cisyomezyo ca Leza a, ku Ci bona kaciyubululwa, elyo mpawo kukaka ku Ci syoma nkaambo ka kukwelelwa ansi kwa cisitilizyo cakabungwe. Mwabona, ulivumbidwe!

<sup>253</sup> Kutegwā kucitwe ceeći, zisitilizyo zyesu zyatunsiyansiya zyatubungwe zyeedele kumwaigwa, kwiinda ku Muuya wa Mulilo iwa Leza a Pangā, lili ndi Ijwi Lyakwe. Lyoonse Ijwi Lyakwe ndi Pangā Lyakwe. Mwabona? Elyo Wa kabweza Pangā Lyakwe buzuba obo, lizwide Mulilo, a kukwapula cisitilizyo eco kuzwa aatala kuyaansi. Ula cita cintu nciconya kubelesya Pangā ndilyonya sunu! Kutali “kalengwa kangu, bbuku lyangu lya tulengwa, katikizimu kangu—kangu.” Pele Pangā lya Mwami, mwabona, likwapwida ansi cisitilizyo, nkabela mwabona Leza kaimvwi mu kulibonya kwaantangalala, wakayubululwa mu Ijwi Lyakwe. Ino nkubonekela kwabulemu kwa kulanga! Mwabona? Yaa. Muuya Uusalala wa Leza a Mulilo, Pangā Lyakwe, lila cikwapula. I Ijwi likwapula cisitilizyo cakabungwe.

<sup>254</sup> Ee, ikuti na mwaamba buyo kuti, “Ijwi,” alimwi Ijwi tali beleki? Mbubotunzi Pangā nco lyeedele kuba kuno, a kwaamba, “Tali konzyi kukwapula”? Wati, “Uh,” nkabela tali kakwapuli pe?

<sup>255</sup> Pele cindi mwabikka kabotu Pangā eelyo lya Leza atala awo a kulangilila kali kwapula, lila—lila jatwa ku janza lyakasalwa lyaka tuminwa kucita boobō. Mwabona, lila cikwapula kujuka, nkabela Ngooyo we. Mpaawo lya tondeezya Leza mu kulibonya caantangalala, Jehova mupati. Eelyo ndi Ijwi Lyakwe lyayubululwa, caabilo caka syomezegwa ku buzuba. Sena mwa Ci mvwisya? Mwabona? Cindi Pangā, cisyomezyo casunu, mu buzuba buno, eco ceeede kuba, nkabela Leza ulabweza Pangā Lyakwe a kukwapwida ansi cisitilizyo cakabungwe a ku civumbwida kusule, a kulyubulula Mwini a kutondezya kuti Mpali, ucili oyo nguwenya Musumpululu wa Mulilo. Amubone, eelyo ndi Ijwi lyayubululwa ku zisyomezyo zyasunu.

<sup>256</sup> Tu La ubona mbuli mbwakacita Petro cindi na kati, “Mwami, nku ulini nko tunga twaunka, kumane kubona Eci?” Nkokuli nko tunga twa unka? Ni mbungano nzi njo tukonzya kusangana, kakuli twa kazyalilwa muli Yomwe? Mwabona? Ino ukonzya ku... Ino nkabungwe nzi nke tukonzya kusangana kumane kuziba Tusimpe otu, mwabona, kakuli ba (umwi aumwi) Li kaka? Umwi aumwi wabo! Ta ndijisi imwi iyooti na kucita cintu kuli Ndilyo. Yaa. Mbo mbubo.

<sup>257</sup> Nda katalika mu nyendo ezi ku kwapwida ansi awa, oko mambungano ali makumi one abili mu busena bomwe nakali kugwasya; cindi Ne kasika okuya, Nse kajisi yomwe. Oonse awo akati, “Walo usyoma mu bukwabilizi Butamani.” Eco caka gusya basimilao basinizizye. Umwi wa kati, “Walo ubbizya mu Zina lya Jesu.” Eco cigwisya boonse babo, mwabona. Aboobo, imwi yabo yakati, “Walo usyoma mu lunyungu lwa nzoka. I muzoka takwe lunyungu!” Eco cile...

<sup>258</sup> I Bbaibbele lya kati, “Njo bikka nkondo akati ka Lunyungu lwakwe a lunyungu lwa muzoka.” Mwabona? Mwabona awo?

<sup>259</sup> Nci, i—i cisitilizyo, cavumbulwa ku Ijwi. Mwabona? Mbo mbubo. Ca yubununwa ku bana. Ca—ca gwisigwa. Ba Li bona. Alimwi kuyooba, mbuli lumwi mbo kwa kaambwa...Mbo mbubo. Mpawo kuyooba, mbuli lumwi mbo kwa kaambwa, “Cindi mwabona,” cindi cisitilizyo eci cagusigwa ku Ijwi, tunsiyansiya twagusigwa ku Ijwi, mbuli Jesu mbwa kaamba lumwi, “Cindi mwa Ndi bona, mwa bona Taata.” Mwabona? Leza a Ijwi Lyakwe mbamwi. Lino mwamvwisya na? Cindi Ijwi lyayubululwa, ino Nci nzi? Mwabona?

<sup>260</sup> Jesu wa kati, “Amulingule Magwalo, muyeeya kuti mu jisi B... Mwa kasyoma muli Leza, amusyome muli Ndime akwalo. Ikuti na Nsi citi milimo ya Taata Wangu, nkokuti muta Ndi syomi. Pele ikuti na Ndi cita milimo, Mebo a Taata Wangu tuli Bamwi. Cindi mwa Ndi bona, mwa bona Taata.”

<sup>261</sup> Elyo cindi mwabona Ijwi kuyubululwa, mwa bona Taata, Leza, nkaambo Ijwi ngu Taata. I Ijwi ngu Leza. Alimwi Ijwi, lyayubululwa, ngu Leza Mwini kabweza Ijwi Lyakwe Lini a ku Li yubulula akati ka basyomi. Taakwe cintu cikonyza ku Li bamba kuba lyuumi pele basyomi, basyomi buyo. Tali konzyi... Tali ka...

<sup>262</sup> Inga mwabweza whiiti a kwiisyanga mu i—mu i—i musyobo wandeene wa bulongo, tai kameni. Pele, cintu, yeelede kuba a camutunzya umwi muvwu wakibusya whiiti. Elyo ikuti na taatwe—ikuti kuli...ikuti na camutunzya muvwu tau—tau, whiiti tai kamezegwi kuli camutunzya oyo, tauka meni pe. Aboobo takukwe makani awo Ijwi mpolya wida, ikuti na Ta liwidi mu musyobo mubotu wa moyo...

<sup>263</sup> Jesu wakaamba booboo. “Zimwi zya kawida kumbali a nzila, masena ajisi mabwe maningi, nkabela bayuni bakujulu bakasika a kuzilya.” Elyo mpawo Wa kati, “Zimwi zyakawida mu maamvwa a tukoka, elyo zyaka komena a kusyanikizigwa mpoonya biyo,” tunsiyansiya, tubungwe, mapakasyo aa nyika aka Li syanikizya. Pele wa kati, “Zimwi zyakaunka mu bulongo bubotu a kuzyala mbali zya myaanda minji,” kati, “obo mbo Bwami bwa Leza.”

Ncintu nciconya, mwabona, bamwi taba kasyomi pe.

<sup>264</sup> Bamwi bayo syoma kwa kaindi kaniini, mbuli basikwiya. Ba ka Mu tobela, bunji bwabo, makumi ali ciloba baka Mu tobela kwa myaka, ku jana kuti; kutandila mwaka a cisela, na myaka yobile; ku jana buyo kuti, mane baka konzya kujana cintucimwi muli Nguwe, bamwi...mbuli nzila imwi Nja kajisi nguzu zimwi zya kucitya zintu ezi, na mbuli cituta ca sulwe, simabibo wa musyobo umwi, eco Nca kali kukonzya kuleta zintu ezi, obo Mbwa kakonzya kuziba ezyo zyakali mu moyo wa bantu a zeezyo nzo bakali kuyeeya. Elyo kumalekelo baka jana kuteeti Wa kati Wa “kaseluka kuzwa ku Julu,” Wa “kali Ijwi Mwini.” Elyo cindi ni bakacita eco, eco caka bayumina maningi. Ba kati, “Taakwe

muntu uukonzya kumvwisya Ceeci.” Elyo baka Mu futatila. Balo nzeezyo zyakawida akati ka maamvwa.

<sup>265</sup> Ci josya ku cintu nciconya, mu mbunga yoonse, muli jisi basikuli kozyanisa, basikutasyoma, a basyomi. Mbo cakabede mu mbunga zyoonse. Mula bajana ciindi coonse. Bamwi babo balakonzya kuba mbuli basyomi, oyo ngo musyobo mubyabi loko. Elyo mpawo bali jisi aba basikutasyoma ncobeni; ta kaku penzyi pe, uyo zwa buyo a kuzungaanya mutwe wakwe. Pele abo basikuli kozyanisa, baamba kuti mbasyomi, oyo ngo musyobo, oyo ngo musyobo wakulangisisya, mbaabo basikuli kozyanisa. Alimwi mpawo kuli basyomi benibeni. Mwababona botatwe okuya?

<sup>266</sup> Kwakali basikutasyoma. Mpoonya buyo Mbwa kati, “Amulye Mubili wa Mwana wa muntu,” oh, muntu, cakali ncico!

<sup>267</sup> I bamwi bakali basikuli kozyanisa. Ba kakkala mane, mbubonya mbuli Judasi mbwakacita, nkoonya kusikila kumamanino.

<sup>268</sup> Pele mpawo basyomi ncobeni, teeба konzya ku Ci pandulula, pele baka Ci syoma, nekubaboobo. Ba kazwidilila.

<sup>269</sup> I cisitilizyo, kansiyansiya ka basikutasyoma, kagusigwa, mwa bona Leza. Cindi cisitilizyo ca tunsiyansiya casomonwa, inga mwabona kuti Leza ucili Leza wa Ijwi Lyakwe. Walo kacizilizya Ijwi Lyakwe. Walo i—Ngu Leza, Mulembi wa Ijwi Lyakwe.

Eci cili sisidwe kunze lya zisitilizyo zya zikutu, kuli bambi. Iiyi, mbo mbubo. Kuli baabo batakonyi kuunka kunze lya cisitilizyo, Walo ucili kunze lya zisitilizyo zya zikutu.

<sup>270</sup> Amubone. Mpawo, swebo, mpawo tuba cibela Cakwe, mbo muli cisitilizyo eco ci Mu vumbilila. Muli cibela Cakwe, kufumbwa kuti Kristo uli muli ndinywe, mbuli Kristo mbwakali wa Leza. Nkaambo Leza waali muli Nguwe, ka Mu bamba kuba Leza. Alimwi mbuli Kristo mbwali muli ndinywe, bulangizi bwa Bulemu, muba cibela ca Kristo. “Oyo usyoma Ndime, milimo Nje cita uyo icita awalo.” Mwabona? Muba cibela ca Kristo kufumbwa kuti Kristo kasisidwe muli ndinywe. Mpawo cili vumbidwe kuli sikutasyoma, pele mulizi Uli muli ndinywe. Mu yakilide Kristo kunze lya cisitilizyo, cikutu. Mpawo swebo, nkaam—... Kunze, nkaambo ka cisitilizyo eci, cisitilizyo alubo mu mibili wabuntunsi, mwasisa Leza (Ijwi) kuzwa kuli sikutasyoma.

<sup>271</sup> Mbili mbo kulembedwe, mwabona, “Kulembedwe, muli imagwalo aalembedwe,” Bbaibbele lya kaamba. Lino, *ilugwalo niinzi?* Ndi “ijwi lilembedwe.” Elyo muli “aalembedwe.” Mukwaamba kumwi, inga mwa Li bala mbuli boobu, “Muli,” Lya kati, “muli imagwalo aalembedwe,” na, “muli Ijwi, eelyo lyakalembwa, lyaka yubululwa,” taakwe cikonzya kuyungizingwa kuli Ndilyo. To konzyi kwaamba kuti, “Ndili

ilugwalo lulembedwe,” a kupona musyobo umbi wa cintucimwi cita Eco nci cakalemba kale, [Mukwesu Branham waumauma Bbaibbele lyakwe—Mul.] nkaambo taakwe cinga cayungizigwa na kugusigwa.

<sup>272</sup> Mbali Mwiiyi Lee Vayle mbwali mukulemba bbuku eli lizizilwe, Ndi yanda kuti mukalibone kwaakwinda kaindi kasyoonto. Mukwesu Vayle mpali, ulaa busena bumwi. Ndali mubwene aanze. Nse syomi kuti inga wanjila. Pele uli mukulemba bbuku okuya, alimwi—alimwi lila kankamanisya maningi, lya Bukkalo bwa Laodikeya. Elyo Ndi yanda kuti mu... Liyo zwa ku mincina iisimba calino. Aboobo, tu bweza kubala kwamamanino kuli ndilyo lino. Elyo wakali kulemba, nkabela twa ka Li kuli bandika omuno, mwabona, kujatikizya...

<sup>273</sup> Bantubonse lyoonse bakasika kuli ndime, kati, “Mukwesu Branham, yalo mizuzumo ili ciloba eyo jwi njolyakazuzuma, alimwi Wa kati, ‘Ta Ci lembi, mwabona, pele ko Ci jala,’” kati, “eyo iyooba mizuzumo ili ciloba iyo yubununwa mu mazuba aakumamanino, mwabona, mizuzumo ili ciloba iyo twaambila?” Lino, sa eco tacili mvwisyi kabotu loko? Mwabona? Pele amulangilile eco nco mwaambaula cindi mwaamba ceeco.

Wa kati, “Bona kuti uta Ci lembi.” Mwabona? Eyi mizumo ili ciloba ilaamba majwi ayo, mwabona, alimwi Wa kati, “Uta lembi eco, mwabona, pele Ce elede kunamatikwa mu Bbuku kusikila ku mazuba aamamanino.”

<sup>274</sup> Lino muntuumwi waka, banji bakali kwaamba kuli ndime, a basilwiyo lwabukombi kati, “Mukwesu Branham, ikuti na Mwami Leza...” Kati, “Ikuti—ikuti... A luzibo lwako, olo Mwami ndwa kakupa ku bantu Bakwe,” cabubombe kwaamba eci, kati, “inga weelela kulemba i—i Bbaibbele lwako, Ijwi lyako, ikuti na Leza wayubulula.”

<sup>275</sup> Nda kati “Obo inga bwaba bwini.” Mwabona, wa kali kusola ku ndica. Mwabona? Nda kati, “Pele, yebo wabona, inga Nse cita ceeco.”

Wa kati, “Nkaambonzi to konzyi? Uli jisi zyeelelo zyoonse.”

<sup>276</sup> Nda kati, “Pele, ko langa, ijwi lyomwe tali konzyi kuyungizigwa na kugusigwa.” Wabona?

<sup>277</sup> Elyo wa kati, “Ee, mpawo, yalo mizuzumo ili ciloba, yebo wabona,” kati, “sa yalo mizuzumo ili ciloba taika zuzumi, sena tacikabi Ciyubunuzyo ciyo pegwa ku muntu umwi?”

<sup>278</sup> Nda kati, “Peepe, munene, inga kuyooba kuyungizya cintucimwi kuli Ndilyo na kugwisya Cintucimwi kuli Ndilyo.”

<sup>279</sup> Ya kayubununwa yoonse Omuya, alimwi Zinamatizyo zili Ciloba zyakajula ciyubunuzyo ca eyo Mbo yakabede. Obo mbwa kabede. Mwabona, cicili mu Ijwi. Nywebo mwabona, tamu konzyi kugwisya ku Ijwi eelyo. Ta cikasiyi Ijwi. Elyo Muuya wa

Leza tau kasiyi Ijwi eelyo. Uyo kkala ncobeni a Ijwi; kofwaazya bamwi, a kujula meso aa bamwi. Lyoonse liyo cita eco.

<sup>280</sup> “Muli magwalo aalembedwe, abalwa a bantu boonse.” Na, muli... Nda sandulula Eco, kunyonena ku nzila eyi, mwabona, ku Li nyona buyo, “Muli magwalo aalembedwe,” nkaambo tamu konzyi kuyungizya cintu kuli Ndilyo, “ayo aabalwa a bantu boonse; Ijwi lya Leza lya kayubululwa,” mu kwaamba kumwi.

Elyo Petro a Johane, ku citondezya, cindi niba kainka kutala kuya, ba kaziba kuti bakali bantu buyo a batayiide, teeba kajisi lwiyyo, pele baka zibisya kuti bakali kweenda antoomwe a Jesu. Mwabona? Ba kali bantu buyo a batayiide, pele ba kali magwalo akalembedwe, mwabona, akabalwa kuti bakali kweenda antoomwe a Jesu. Nkaambo, Jesu wakali kuliyubulula Mwini kwiinda muli mbabo, Kristo kavumbidwe mu mibili yabo; kayubululwa, kabambwa baumi.

<sup>281</sup> Mboli Mbwa kali muli Musa. Cindi Ijwi nilyakali muli Musa, wa kali Leza mu mibili. Cindi ni Lya kali muli Jesu, Wa kali Leza mu mibili. Mwabona? Cintu buyo Nca kacita wakacinca masikki Yakwe, kutali Ijwi Lyakwe, kutali bulenge Bwakwe. Ngu mbobuca nguwenya, sunu, amuya myaaka. Wa kacinka buyo ciimo Cakwe. Wa kacinka kuzwa kuli Nowa kuya kuli Musa; Wa kacinka kuzwa kuli Musa kuya kuli Davida; kuzwa kuli Davida, Josefa; kuyabuya muciindi cakatobela mane Wa kasika mu buzule bwa Buleza camubili. Mwabona?

<sup>282</sup> Ucili Leza nguwenya! Ameni. Ameni. Nda syoma eco cazwidilila. Mwabona? Ngu Leza nguwenya, pele Walo ubweza buyo cisitilizyo cimbi. Mwabona, Walo usama cisitilizyo cimbi.

<sup>283</sup> Wa kacita muli basilubambululo, kasama cisitilizyo, kasama cisitilizyo. Kusikila, kumalekelo, Lya kaboola muciindi cakatobela kwiinda mu bukkalo bwa Luther, muciindi cakatobela kwiinda mu bukkalo bumbi, mpawo kumalekelo Lya kayutukila mu Kumaninina. Ka Li tana boola buyo, musinsimi ulabuka alubo. Neoli cita, lipa cimvule cakumbele ica Ijwi, kutondeezya alimwi awa, kuyubununa eco cakacitwa, eco cakasiigwa, kuteeti Mbungano tai kabi... kutaba a kumvwisyra. Mpawo kwalo eci cayabaala, mpawo, mboli Johane mbwa kati, “Nde elede kucesegwa, Walo weelede kukomezegwa,” mpawo tumpangaliko toonse twa boola muli Nguwe. Wa yubululwa cabuzule, kwiinda mu bukkalo bwa Luther, Wesley, a bukkalo bwa Pentekoste, kuyabuya muciindi cakatobela, muciindi cakatobela, Wa yubululwa cabuzule, nywebo mwabona, kuselemuka muciindi cakatobela, luyubunuko buyo, Leza kalivungulula: Mwa Mu bona (Lino, amubone.) kazulizigwa mu zisyomezyo Zyakwe ku buzuba *buno*, mboli mbo *ba* kajisi.

<sup>284</sup> Lino Musa wakali Ijwi ku buzuba obo, nkaambo Ijwi lya kapegwaa kuli nguwe ku buzuba obo; Musa. Josefa wakali Ijwi

mu mazuba akwe, katondezya Kristo ncobeni. Mwabona, umwi aumwi wabo wakali Ijwi.

<sup>285</sup> Elyo cindi Jesu nakasika, Wa kali Ijwi mu buzule bwa Ndilyo, nkaambo bukanze boonse bwa lununuko bwakalede muli Nguwe. I bukanze boonse bwa lununuko tebwa kalede muli Musa, tebwa kalede muli Josefa, tebwa kalede muli Eliya. Mwabona, ba kali buyo cibela ca Ijwi, kabatondeka kuli Ndilyo. Mwabona? Lino amubone, amu sitikizye tuyeyeo wanu; mpaawa Lya boola, mbuli Mbwe amba. Mwabona, bukanze boonse tebwa kali muli mbabo. Ba kali kutondeka kuli Ndilyo.

<sup>286</sup> Nkaako, kuzwa Nguwe, Buzule, ta tukonzyi kutondeka ku cintucimwi cimbi. Ci tondeka kujokela kuli Nguwe, Ijwi. [Mukwesu Branham wabweza Bbaibbele lyakwe—Mul.] *Eci Nciyubunuzyo cimaninide; taakwe cikonzya kuyungizigwa na kugusigwa kuli Ndilyo. Nceeci Ciybunuzyo cimaninide. Coonse eco, cimvule Cakwe ceelede kusika; pele cindi Na kasika, Wa kali Bulondosi.* Bahebrayo 1, “Leza mu ziindi zyandeeene wakakanana ku matata kwiinda mu basinsimi,” Leza wakakanana kwiinda mu zisitilizyo, basinsimi, “pele mu mazuba aya akumamanino kwiinda mu Mwana Wakwe, Jesu Kristo.” Nceeco we. Katondezegwa aalya a Kalivari, Mwana wa Leza, katondezegwa.

<sup>287</sup> Amubone, “kabambwa baumi.” Alimwi, sunu, cindi Ijwi neli yubululwa mu zilongo zyabuntunsi, zisitilizyo, ndi Ijwi ncobeni kali zulizigwa mu buzuba obo, eelyo lijokela kuli Leza. Mukuba bakabbizigwa muli Nguwe, kweendelana ku Bakorinto Bataanzi 12, tuba balizibya a Nguwe. Ameni.

<sup>288</sup> Nda amba kuti cisela ca oora, pele sena inga Nda indilizya aniini? [Mbunga yaamba, “Ameni.”—Mul.] Mwabona? Amulange, Nse konzyi kusotoka eci moonya omu. Amubone, balizibya a Nguwe!

<sup>289</sup> Lino amubone. Mbangaye basicisi ba America baliko? Amu tambike maanza anu. Yaa, uli sicisi cina America, nkokuti ula lizibya a cisi eci. Kufumbwa ciimo cisi eci mbocibede, weelete kuba. Sa mbo mbubo? Uli bulemu bwaco boonse alimwi uli mause aco oonse. Ula lizibya a ncico. Uli muna America, aboobo weelete kusama America. Aleluya!

<sup>290</sup> Nda kali a George Washington cindi na kazabuka Delaware. Nda lizibya a nguwe. Mbo mbubo. Nda kali a Abraham Lincoln ku Bukanazi bwa bbunga iku Gettysburg. Nda kaliimvwii okuya. Nda kali a basilumamba ku Guam, nywebo nobasankwa, cindi nimwaka simpika ndembela eyo. Nda kaliko. Ndili muna America; Nda lizibya ancico. Ameni. Lino, kuba muna America, kufumbwa mause ayo mbwabede mu Lucinco lupati, Nda ayumuna, nkaambo Ndili muna America. Mbo mbubo.

<sup>291</sup> Elyo mbuli Munakristo, Nda lizibya a Nguwe. Ameni! Nda kali a Nowa cindi na kanjila mu bwaato. Nda kali a Musa cindi

na kazwa mu Egepita. Ameni! Nda kali a Eliya aa D Dundu lya Karimeri. Iiyi, munene! Bulemu kuli Leza! Nda kali a nguwe cindi na kacita eco. Nda kali a Nguwe ncobeni, Nda kalizibya lwangu mu lufu Lwakwe aalya aa Kalivari cindi Ne kafwa ku zintu zya inyika, kuli lwangu a tunsiyansiya toonse. Nda kalizibya a Nguwe. Nda kalizibya a Nguwe aa cifumo ca Pasika cindi Na kabuka kuzwa ku bafu. Nda kalizibya a Nguwe aa Buzuba bwa Pentekoste, cindi Muuya Uusalala niwa kaseluka mbuli guwo lyuungisya lyanguzu. Nda kali zibya a Nguwe. Koonse oko Mbwa kabede Mbwe bede, koonse oko Mbwe bede Mbwa kabede; ameni, mukuba bafwide muli Nguwe tula lizibya a Nguwe. Obo Mbwa bede Mbwe bede. Ameni!

<sup>292</sup> Obo cisi eci mbocibede Mbwe bede. Nda botelwa kuba boobo. Ndili libambilide kuyumuna mause. Ndili libambilide kuyumuna masampu kuba muna America. Mbo mbubo. Elyo Ndili kubili boobo kuli Jesu Kristo! Koonse oko Mbwa kabede Mbwe bede. Nda botelwa kulizibya a Nguwe.

<sup>293</sup> Balo baapostolo, cindi niba kajoka, ba kayeeya...ba kafubaazigwa, a kwiitwa zintuzyonse zimbi, ba kalanganya kuti lwakali lulemeko kuyumuna masampu aa Zina Lyakwe.

<sup>294</sup> Ndili kkomene kuba umwi wabo, mu kulizibya a Ijwi, lili ngu Kristo. Kulizibya a Nguwe! Ku bbizigwa muli Nguwe, tuba balizibya; balizibya mu cinkozya Cakwe, balizibya a Ijwi Lyakwe, lili Nguwe. Ikuti na Ndili muli Kristo, Ndili Ijwi Lyakwe; nkambo Walo ndi Ijwi, alimwi obo Mbwa bede Mbwe bede. Ameni! Sena mwa Ci mvwisy? [Mbunga yaamba, "Ameni."—Mul.] Yaa.

<sup>295</sup> I Ijwi lyakayubululwa, na kuyubununwa mu Ci yubunuzyo eco omuya, mpawo eco cindi bikka buti? Ikuti na Walo Mbulemu obo bwa Shekina, Ndili cibeela Cabo. Ameni! Oh! Ameni! Mbo mbubo. I Ijwi Lini lyakayubununwa, lilaliyubununa Lini.

Amuyeeye! I maseseke aa Leza ayubununwa kuli ndiswe mu buzuba buno, kwiinda ku Mutumwa nguonya Wakujulu oyo wakayubununwa kuli mbabo mu mazuba ayo; amubone, nguwenya Musumpululu wa Mulilo waka tuma Musa; nguwenya Musumpululu wa Mulilo wakali ali Musa waka lemba Bbaibbele; nguwenya Musumpululu wa Mulilo waka swaana Paulo mu lweendo lwakwe kuselemukila ku Damasiko.

<sup>296</sup> Elyo Paulo wakalemba Cizuminano Cipy. Amwiibaluke, Matayo, Marko, Luka, a Johane, ba kalemba buyo ncoba kabona; pele Paulo waka jisi Ci yubunuzyo. Wa ka Ci somona, nkambo wa kaswaana Musumpululu wa Mulilo, mwini. Elyo amuyeeye, nguwenya...

<sup>297</sup> Okuya, Josefa, boonse babo bakalemba cakacitika, bantubonse bakalemba kaindi mu buzuba obo. Pele cindi Musa nakasika aa cilao, wa kajisi Ci yubunuzyo. Wa kaswaana Musumpululu wa Mulilo, elyo Wa kayubunwida Musa Matalikilo

mbwakabede. Wa kalemba mabbuku one mataanziaa Bbaibbele, Musa wakacita. Sa mbombubo? Nkambo wa kaswaana Leza mu ciimo ca Musumpululu wa Mulilo, wakavumbilidwe mu Musumpululu wa Mulilo.

<sup>298</sup> Cindi Paulo naka Mu swaana mu lweendo... I basikwiyya bakalemba buyo eco ncoba ka Mu bona kacita, pele Musa waka jisi Ciyubunuzyo; wakaunka kumusanza mu Egepita kwa myaka yotatwe a kwiiya, a kubona Leza oyo iwa Cizuminano Cakale kuteeti wakali Jesu wa Cipyia, Ciayubunuzyo! “Nse kakazy cilengano Cakujuju.” Mbo mbubo. Yaa!

<sup>299</sup> Elyo amu Ci yeeye! I Musumpululu wa Mulilo nguwenya waka selukila bantu abo bakalemba Bbaibbele, nguwenya Musumpululu wa Mulilo uliko, sunu, kuupandulula Bbaibbele. Ameni! Obo mbo tu Mu lumba kuli ceco! Nguwenya! Ino nkumbulizigwa! Ino nkulizibya! Ndili kkomeni loko kulizibya muli ceco, Nse zyi cakucita! Inga ndasala kulizibya muli Ceecokwiinda boonse ba Baptisti, Methodisti, Presbyteria, Lutharani, a boonse babo bamwi. Kulizibya mu Ijwi eelyo oko Bulemu obo bwa Shekina a Ciayubunuzyo nko zibede!

<sup>300</sup> I Musumpululu wa Mulilo kaulibonya antangalala akati kesu, kuzibya kuti Mulumbe uli lusi, mbuli Mbwa kacita ku Dundu lya Sinai. Amwiibaluke, mulumbe wabwini kuutana yutuka, Musa wakakambauka nkabela wa kabasololela kuzwa mu Egepita; pele okuya, milazyo iini kiitana kubambwa kabotu (Zinamatizyo zyakaletwa mukati), Leza wakaseluka kumbele lya bantu a kutondezya kuti Musa wakatumwa kuzwa kuli Nguwe, (embo na?) mu Musumpululu wa Mulilo kuti Musa wa kaamba nca kabona mu citeo a kwaambaula kuli nguwe.

<sup>301</sup> Oh, mu mazuba aya aakumamanino, kubona oyo nguwenya Musumpululu wa Mulilo mpoonya akati kesu, kuukanana Ijwi ndyoonya; kutali buyo obo, pele ku Li pandulula kwiinda muku Li yubulula, a ku Li tondezya, kuti Ndyia Bwini.

Aboobo, bantu taba jisi nzila yomwe ya kuunduluzya, citakuti bayanda buyo acaaali. Elyo, mpawo, “Oyo ubisya acaaali amana kuba a luzibo lwa Bwini, takucikwe cituuzyo cimbi ca cibi.”

<sup>302</sup> Amubone, nguwenya Musumpululu wa Mulilo wakatuminwa Musa a Paulo, oyo wakalemba Bbaibbele, lino wakatumwa ku Li yubununa. I luzyalo lwa Leza, Leza uutasanduki, kazulizya zisyomezyo zya Matayo 28, “Amulange, Ndili a nywebo lyoonse;” kuzulizya Musalali Johane 14:12, “I milimo Nje cita, akwalo a nywebo;” kuzulizya Musalali Luka 17:28-29, “Ku mazuba aakumamanino Mwana wa muntu uyo yubununwa,” mwabona, mwabona; Malaki 4, “Amubone, Nda mutumina Eliya musinsimi, uyo boozezya Lusyomo lwa bantu kupilukila ku Ijwi taanzi.” Mwabona? Obo eci... Mwabona? Oh, ma!

<sup>303</sup> Wa kafwa, kuti aliyubunune Mwini kuli ndiswe. Lino atufwe kuli lwesu, kuti Ayu bununwe kuli bamwi. Atufwe ku tunsiyansiya a zintu, kuti Ayu bununwe kuli umwi. Kufwa ku tubungwe, kuti Ayu bununwe kuli bamwi.

<sup>304</sup> Amubone, tempele lyakale muli ndilyo lyaka jisi Bulemu bwa Shekina, a Mumuni wa Shekina aatala lya Ijwi. I Ijwi ni Mbuto; Ya kapanga cinkwa camabonwabonwa ku basyomi luzutu. I bulowa abwalo bwakali aa cipangano; alimwi Bulowa alo maanzi, maanzi ayo apa buumi ku nseke, whiiti, mbuto, ili ndi Ijwi.

<sup>305</sup> Mbuli Jesu mbwa kati, "Mbuli Musa wakasumpula muzoka wa mukuba," elyo mpawo alubo Wa kati, "Leza wakayandisyia inyika cakuti Wa kapa Mwana Wakwe simuzyalwa alikke; kuteeti kufumbwa usyoma Nguwe ata kanyonyooki." Musa wakauma mwaala mu nkanda, kuti avune bantu bakali kufwa, na kuleta maanzi. Leza wakauma Jesu, kuti alete Muuya kuzwa muli Nguwe, ku bantu bakali kunyonyooka. I Bulowa bwakazwa kuli Nguwe, buli, "I maanzi akusanza kwiinda ku Ijwi." Kwalo, Maanzi aleta Buumi ku Mbuto. Elyo lyakaleta Bulemu bwa Shekina; bwaka munikila Ijwi, lya kaleta cinkwa camabonwabonwa. Alimwi cinkwa camabonwabomwa cakali buyo ca bantu basalidwe. Uh huh. Embo na? [Mbunga yaamba, "Ameni."—Mul.]

<sup>306</sup> Lino kudonkola mu cisitilizyo, kwiinda mu cisitilizyo, mu Busyu Bwakwe, oko Ijwi nku (kutali kalengwa), Ijwi; mukati myua kubona Bulemu bwa Shekina, Shekina, Nguzu, Muuya Uusalala kaumwekela aa Ijwi, kuzwidilizya cisyomezyo, tondezya kuti muli kunze lya cisitilizyo. Ameni!

Nda zabuka zisitilizyo oko Bulemu nko  
butamani, (Uh!)  
Aleluya, aleluya; Ndili mukupona mu Busyu  
bwa Mwaami.  
Nda zabuka zisitilizyo oko Bulemu nko  
butamani,  
Ndili mukupona mu Busyu bwa Mwaami.

<sup>307</sup> I cikutu cakale camugutu, tubungwe, cazapwidwa ansi. Nda donkweda muli ceeco, mu Bulemu bwa Shekina, elyo Ndali bona Ijwi. Nda bona Musumpululu wa Mulilo kaweenda. Nda bona Ijwi lyayubululwa. Eco Nea kaamba kuti Uyo cita mu mazuba aya aakumamanino, Nda cibona kacikomena. Nda bona bana kabalya Cinkwa eco ca Shekina kacizwa ku kubizwa kwa Ijwi eelyo, abo ba Li syoma. Ameni! Ino ndi oora bbotu loko ndo tupona mo! Mwabona, Shekina yakali aatala lya Ijwi; elyo kunsi okuya kwakali Cinkwa. Alimwi kwakali Bulowa, bwakasansailwa, obo Bupa maanzi. I Muuya upa Buumi ku Ijwi. Elyo i . . .

Mbangaye bakabala, kamvwa teepu ya *I Kubetekwa?* Iiyi. Bunji bwanu mwakacita. Mwa bona awo, citola . . .

Eelyo Ijwi lyeelede kukomena. Kutegwa likomene, Lye elede kuba mu musyobo muboto wa bulongo. Mwabona? Elyo Leza ulapanga cisymezyo, nkabela cilauma moyo oyo, ta cikonzyi kukacilwa.

<sup>308</sup> Nowa wakalindila kwa myaka ili mwaanda a makumi obilo. Abrahamu wakalindila kwa myaka ili makumi obile ayosanwe, ku mwana. Leza wakaamba booboo, nkabela eci cakacisitikizya. Mwabona? Ino ncinzi? I Ijwi lya kaliko kali tilailwa ku lusyomo, ku Li syoma, lya kazyala micelo. Lya kazyala mwana; lya kaleta mvula; lya kaleta zambangulwe; lya kazyala nakalindu oyo wakamita.

<sup>309</sup> I musinsimi wa kati, “I nakalindu uyo mita.” Taakwe kuzumbauzya pele oonse musimbi muniini wakaunka akubweza zisani zya muvwanda mukuli bambila. Ee, musinsimi oyu Isaya wakali musinsimi wakazibidwe, wakasimpikizigwa aa Leza. Elyo Mwami wa kati, “I nakalindu uyo mita. Ndiyo bapa citondezyo ciindakugambya, citondezyo cipati; nakalindu uyo mita.”

<sup>310</sup> Okuya, balo bantu boonse, balo basyomi, mbuli ndinywe nyoonse. Elyo ba kamvwa musinsimi oyo kaamba ceeco, musimbi oonse muniini . . . Mwaalumi oonse wa kati, “Oyo uyakuba mwana wangu musimbi. Iiyi, munene.” Bantubonse ba kaunka a kuyoula tusokesi a tutambo a zintuzyonse, mu kulibambil, nkaambo ba kayeeya kuti uyo mutambula. Eyo nzyalani yakainda, elyo ba kayeeya, “Oyo musinsimi wakazibidwe, wakasimpikizigwa aa Leza, mbobuti mbwa kali kukonzya kuziba cintu cili coonse kuteeti cakali lubide? Ce elede kuba booboo!”

<sup>311</sup> Yakali myaka ya myaanda ili lusele niya kamana kwiinda, pele waa kazyala muvwanda. “Majulu a nyika ziyo loba, pele Ijwi Lyagu tali kalobi.”

<sup>312</sup> “Elyo ciyo boola kucitika ku mazuba aakumamanino,” mbwaamba Leza. Mwabona, mpaawa mpotubede, i—i Mumuni aatala a Ijwi. Mbuli mumuni wa zuba mbou cinca mbuto kuzwaku bulemu kuyaku bulemu, aswebo tuba—tuba maningi mbuli Nguwe mbuli mbo tupona mu Busyu Bwakwe; mbuli Nguwe, mu kukozyanisiga ku cinkozya Cakwe cilelekedwe mbuli mbo tweenda a Nguwe.

<sup>313</sup> Amulangilile obo zuba mbo licita. Na wasyanga mbuto, ncinzi cicitika? Mbuto eyo ilabola. Mukati ka mbuto muli buumi. I buumi bula yutuka a kuleta cikuba. Lino, eco ta ciboneki mbuli citaanzi.

Ngooyo Luther. Cakali cikuba. Yaa.

I cikuba cakazumanana nkabela, cintu citaanzi nywebo mulizi, cileta ngalala. Mwabona, olo lwakali lubukulusyo lwabana Wesleyani; telwakali mbuli lumwi.

Mpawo ambele kwakasika lubukulusyo lwa Pentekoste, mwabona, lwakaleta lubbizyo lwa Muuya Uusalala. Yaa.

Ncinzi cakacitika? Tu jisi fangasi ku kutwi. Lwa katalika kuboneka kulubila. *Eci* cintu, cintu *eco*, ta ciboneki mbuli Ijwi. Ta cili mbuli cimwi Caco. Ta cili mbuli Museke mutaanzi mbo wakanjila.

<sup>314</sup> Pele Leza nkwacili kabamba *eco—eco* mbubonya buyo. Amubone, ino cicita nzi? Kumalekelo cibweedela ku Mbuto ntaanzi alubo. Cindi Na kanjila mu ciimo ca Martin Luther; cindi Na kanjila mu ciimo ca John Wesley; cindi Na kanjila mu ciimo ca Pentekoste; We elede kuliybununa Mwini alubo mbuli Mbuto njionya yakanjila, Mwana wa muntu. Wa kaliybununa Mwini mbuli Mwana wa Leza, kwiinda mu bukkalo bwa cikuba a zimwi zimbi, pele mu bukkalo obu bwamamanino. We elede kuliybununa Mwini mbuli Mwana wa muntu alubo. Mwa cimvwa? [Mbunga yaamba, “Ameni.”—Mul.] Yaa, mbuli kumatalikilo, kabumbwa!

<sup>315</sup> Elyo muunzi cikuba mocikomena? Cila komena ciindi coonse. Eco cikuba ciniini cila komena, nekubaboobo tacili mbuli museke mutaanzi. Awalo mulumbe wa Luther teewakali boobo; peepe, ambele kwakasika i—i milumbe imbi, Finney, Sankey, Knox, Calvin, mucindi cakatobela, taakwe wabo. Ba kacili mulumbe pele, mbo cakabede, teeба kajana Ciyubunuzyo cimaninide pe ca Ndilyo nkaambo tee cakali ciindi. Tamu konzyi kubyalya musonge wamaila ciindi kacitana kusika. Mwabona? Elyo mpawo, kumalekelo, mpaawo kwajokela Mbuto alubo ntaanzi eyo yakanjila mu bulongo.

<sup>316</sup> Mwabona, Leza utobelwa bulenge mbubonya ncobeni. Mwabona, Wa kazyalwa kali kabelele, aka nkekaambo Nca kazyalilwa mu cilido cabanyama. Tubelele tatu zyalilwi mu malo pe. Mwabona, Wa *kasololelw*a kuyaku Kalivari. Kabelele, mbelele zila sololelw. Mbo mbubo. Impongo zila zisololela kuya kukujaigwa, nywebo mulizi obo, ng’anda yakujailwa. I mpongo ila zisololela, pele zyeelede kusololelw. Huh! Mbo mbubo. Aboobo Wa *kasololelw*a kuya kukujaigwa, mwabona, nkaambo Wa kali Kabelele.

<sup>317</sup> Zintuzyonse zyaka Mu zibya mu bulenge. Ako nkekaambo Nca kazyalilwa mu Miyoba na Mukubwekangala, kutali muli Nalupale; Na takakonzya pe, kuli caanda cibibilwa tukokola tuli makumi obile kutala mu ciindi eco ca mwaka. Kutali kaleza-kazuba, pele Wa kali Mwana wa Leza. Mwabona? Kaleza-kazuba kabana Romani aa buzuba bwa makumi obile aosanwe bwa Nalupale, cindi zyazuba noziinda masena ayo omuya alimwi ba kajisi masena amisobanino abana Roma, a kwiita buzuba

bwakuzyalwa ibwa kaleza-kazuba, alimwi bakabamba kuba Mwana wa Leza. Peepe, peepe. Wa kali Mwana wa Leza. Buzuba Bwakwe bwakuzyalwa bwakali antoomwe a bulenge bumwi. Mbubonya.

Lino amubone alubo lino mbuli mbo tuzumanana, tu jisi ciindi ciniini casyaala.

<sup>318</sup> Lino ku bulondosi. Cikuba camana kubumbwa; ngalala yamana kubumbwa; museke wamana kuba aa ciseenketi; mpawo waboola ku bulondosi, kujokela ku museke walyoonse alubo.

Elyo, amwibaluke, museke weelede kumezegwa. Mwabona? Ikuti na tauciti, ta ukaponi. Mwabona? Taakwe wabaabo bakali aanze lyu milumbe uyo sola kuboola ku Buumi. Yeelede kumezegwa kuli Mbubo. Pele, amwiibaluke, Buumi mbubonya bwakali mu cikuba buli mu museke. Uli mukulibamba kusima kwini kujokela nkoonya, mwabona. Wa kalyubununa Mwini, (inzi?) Mwana wa muntu, museke oyo wakanjila mu bulongo. Mwaumvwa Mulumbe? [Mbunga yaamba, “Ameni.”—Mul.]

Iba Griki bakati kuli Nguwe, “Tu yanda kubona Jesu.”

<sup>319</sup> Wa kati, “Citakuti museke wa maila wawida mu bulongo.” Mwabona? Yaa.

<sup>320</sup> Lino Wa kalyubunwida nzi Mwini lutobela? Mu ciimo caandeene; cikuba a ngalala, a zimwi zimbi, a matu oonse a zintuzyonse. Wa kalyubununa Mwini mpawo, (inzi?) Muuya nguonya, pele mu ciimo caandeene. Mwabona? Pele ncinzi camamanino ca maila ayo? Ala jokela ku museke mutaanzi. Sa mbombubo? [Mbunga yaamba, “Ameni.”—Mul.]

<sup>321</sup> Elyo mulimo Wakwe ulasika, kuzwa kuli basilubambululo, kujokela ku Ijwi taanzi alubo. I Ijwi lisika ku musinsimi. Elyo Wa ka cisomezya, muli Malaki 4, “Elyo kuboozezya Lusyomo lwa bantu kujoka ku museke mutaanzi.” Eco cakanjila mu bulongo nceeci mbubonya. I museke wayutuka kwiinda omu. Ula yutuka mbuli Mwana wa Leza, lino Ula liyubununa Mwini awa mbuli Mwana wa muntu, alimwi mpawo Ula Li yubununa mbuli Mwana wa Davida aa Cuuno cabwami. Mwabona, balo Mbana botatwe, mbubonya biyo. Oh, ma, alubo mbuli mutaanzi!

<sup>322</sup> Lino ku mulimo uulondokede Wakwe; kutali muntu umwi, kutali kabungwe kamwi, mbuli mbo bakabeleka muciindi cakatobela kwiinda mu bukkalo obo okuya, mwabona; pele Mwini wakaliyubulula, ulaliyubulula Mwini ku cisomezyo, kupanga Musalali Luka 17:28, Malaki 4, a zimwi zimbi, Bahebrayo 13:8, mbubonya kululama ncobeni. Ku ciindi eco, cinooli ciindi nzi? Cindi Mbuto yabwami ya Abrahamu yano langila Mwana wakasyomezegwa. Elyo zikozyanyo zyoonse zyeelede kuzulizigwa. Elyo Leza Mwini wakalibonya mu ciimo ca muntunsi, ku mbuto ya Abrahamu yakunyama, kakutanaba lunyonyooko, nkabela Jesu wa kati ciyooba cintu nciconya ku Mbuto eyi yabwami Mwana wakasyomezegwa katana bweeda.

<sup>323</sup> Amubone cisitilizyo cakale eco cakasisa Bulemu. I zikutu zyakale zyabagutu, kwakanyina bubotu bwakali kuyandwa kuli ncico; naanka mubili Wakwe. Ako nkekaambo bantu ba kati, “I Mulombwana muniini udiimene mbuli oyo?” Antela myaka iili makumi otatwe yakukomena, a mvwi, alimwi cilezu Cakwe kajisi mvwi, taakali kukwelelezya kweebela. I Bbaibbele lya kati, “Kwakanyina bubotu mbo twa keelede ku Mu yandila.” Ta kali kuboneka mbuli Mwaami, cikutu cakale camugutu, pele, oh, eco cakali mukati!

<sup>324</sup> Elyo nkamu niini ya “babumbulusi basalala” kaikkede antoomwe mu buyake bupya mbuli boobu, mbo babaita, kwiina bubotu bunji bwa kuyandilwa, pele eco cakali mukati! Ndili masimpe cili vumbilidwe kuzwa ku myoyo minji, nywebo mwabona. Nywebo mwabona? Yaa.

<sup>325</sup> Caanze Tii cakali cintu, pele koonse kwakali mukati. Lumwi kuba mukati ka Ncico, mpawo wa Ci bona. Mbobuti mbo munjila muli Ncico; kusukana maanza, kusangana? Peepe. Kuzyalwa muli Ncico. Kufwa, kugusya cikutu cako cakale camugutu, wabona, yebo lwako wakale, kunjila muli umwi mupya. Mwabona? Kusiya cikutu cakale camugutu.

<sup>326</sup> I Mumuni wa Shekina tau... Amuswiilile, no bakutausi! No bakutausi, Ndi yanda kuti mu swilile Eci. Cindi comwe kuba mukati... Lino Ndiyo bweza eci cabuteteete maningi, kutegwa mube masimpe ku Ci mvwa. Lomwe kuba mukati ka cisitilizyo, kensi lya Bulemu bwa Shekina, Mumuni wa Shekina tau bwezi Ijwi lya Leza a kuyubununa Jesu kuba “musondi,” peepe, mbuli tubungwe mbo tucita sunu, “kukwabana kwamizeezo, mubumbulusi uusalala, Beezebule.” I Bulemu bwa Shekina tabu Mu yubununi kuba obo.

<sup>327</sup> Pele Bulemu bwa Shekina bubamba Mbuto eyo kubizwa yakasyomezegwa ku oora eelyo, lya Ijwi, ku Mu tondezya kuti ucili Mpana yaku Kkuti. Yalo izyala Mbuto eyo, Mpana yaku Kkuti, Cinkwa ca Buumi, Alufa a Omega, mbobuca nguwenya, sunu, amuya myaaka. Walo ncaabilo ca basyomi. I Bulemu bwa Shekina bula yubununwa, ku musyomi, Ngu mbobuca nguwenya, sunu, amuya myaaka.

<sup>328</sup> Katali, “I mazuba, Wa kamana, alimwi Wa kafwa nkabela kwa kamana.” Aboobo mweenzuma, ikuti na usyoma booboo, ikuti na usyoma booboo, tona uma Bulemu bwa Shekina pe. Mbobuti Bulemu bwa Shekina mbo bukonzya kusola ku Mu yubununa kuba mu bantu botatwe? Mwabona? Mbobuti Bulemu bwa Shekina mbo bukonzya kusola ku Mu yubununa mbuli mu kubbizya, bantu, mu zina lya “Taata, Mwana, a Muuya Uusalala,” kakuli taakwe muntu mu Bbaibbele wakabbizigwa munzila eyo? Mbobuti Bulemu bwa Shekina mbo bukonzya ku Mu cesya kuba muapostolo, kakuli Ngu mbobuca nguwenya, sunu, amuya myaaka? Mwabona?

<sup>329</sup> I Bulemu bwa Shekina bula Mu yubulula. Bu zyala Ijwi ly a cis yomezyo, nkoonya kuzwa muli ndinywe. Ako nkekaambo Nca kavumba busu bwa Musa, nkaambo muli nguwe mwakali Ijwi. Wa kavumba Jesu, mbuli Muntu mubombe muniini, kuba kasya kubona Jehova. Elyo Ulali vumba Mwini sunu, mu zilongo zyaansi, kubelesya Shekina. I caanze ciboneka mbuli nkamu ya babumbulusi basalala, zikutu zyakale zyabagutu, pele mukati kusisa Bulemu bwa Shekina.

Elyo Ku bamba Zinkwa zyamabonwabomwa kubizwa ezyo nzo tupobola kulya, a kweenzya kulanduka cisi kwa, myaanda ya mamaile, mwabona. Ncilyo ca basyomi. Nca musyomi biyo. Amwiibaluke, Cinkwa camabonwabonwa cakali buyo ca musyomi buyo, mwabona, Mbuto ya Cinkwa camabonwabonwa. Amubone. Ino cicita nzi? Obo Bulemu bwa Shekina, aatala ly a Cinkwa camabonwabonwa, ku Ci lesya kubola.

<sup>330</sup> Amwiibaluke, mana ayo aakazwa ku Julu, akali kubikkwa mu Bulemu bwa Shekina, kuzwaku nzyalani kusika kuli iimbi. Aanze, caka njilwa bamvunyungulwa, nikwakainda busiku, aka sofwaala. Sa mbo mbubo? [Mbunga yaamba, “Ameni.”—Mul.]

<sup>331</sup> Caanze ica Bulemu bwa Shekina, “I mazuba aa maleele akamana. Mwabona, coonse ciimo cakwiindilizya.” Pele mukati . . .

<sup>332</sup> Amulange, ba kagusya nseke zya malangazuba mu butala mu Egepita zyaka bikkidwe omuya mu mazuba aa Josefa, myaka ili zyuulu zyone, kutandila, yakainda. Josefa wakazibikka mu butala. Ba kazisyanga. Zya kapona. Nkaambonzi? Zya kajisi buumi.

<sup>333</sup> Ino Bulemu bwa Shekina sunu niinzi? Kudonkola kwiindilila cisitilizyo, kubona Leza obo Mbwa bede kaimvwi kumbele lyanu, kubona Leza obo Mbwa bede kaimvwi awa kumbele lyesu, i—i Musumpululu wa Mulilo. Uli vumbilidwe mu mubili wabuntunsi. Pele ino Shekina icitaanzi, ya kacita nzi? I Mbuto ya Cinkwa camabonwabonwa, Ijwi ndyo tweede kuponena mu buzuba buno, kwiinda ku zisyomezyo ezi, Bulemu bwa Shekina bupa Cinkwa camabonwabonwa kubizwa, bula Ci zulizya, Bu panga Cinkwa ku musyomi; eco cakabikkidwe mu mapeegi aa Bbaibbele, mwaka a mwaka, Ijwi ly a bukkalo obuno.

<sup>334</sup> Ku tubungwe, Lyalo ncilebyo. Ku tubungwe, bala lebwa kuli Ndilyo. Muciindi cakatobela ca myaka, Luther, Wesley, Martin Luther, a boonse, Sankey, Finney, John Smith, Knox, boonse bakalebwa kuli Ndiyo.

<sup>335</sup> Pele ncinzi ceelede kucitwa mu mazuba aakumamanino? Caambanzi “*ku yubununa*”? “Kuleta!” Ncinzi Malaki 4 nceelede kucita? Kusandula bantu kuzwa ku cilebyo eco, ku mwailansi tunsiyansiya, a ku yubununa Cinkwa antoomwe a Bulemu bwa Shekina. Amulangilile ka Ci bizwa a kuleta nciconya buya eco Nci ca Kaamba kuyo cita, oh, ma, Cinkwa

camabonwabonwa ca bukkalo buno. Ku kabungwe, ncilebyo, “nkamu ya basikwiindilizya.” Pele, swebo no tusyoma!

<sup>336</sup> Pele eno mbuli Ciybunuzyo 10 mbo cakasyomezya, “Oonse makani aasisidwe aa Leza, ayo akasiswa mu mapeegi muciindi cakatobela kwiinda mu myaka, ayo obizwa, ayoletwa mu bukkalo bwa Mulumbe wa angelo waciloba.” Sa mbombubo? [Mbunga yaamba, “Ameni.”—Mul.]

Ino Wa kaambanzi, mwaka a myezi ili cisambomwe yainda, nkoonya ku myaka yobilu eno? “Koya ku Tucson; kabe kumusanza wa Tucson, kubbotoka kupati,” a ceeco ciyo citika, “Zinamatizyo ziyo julwa,” Zinamatizyo eyo ziyo yubununa zintu ezi. Kujokela mbubonya Mbwa kaamba.

Ino ncinzi? Ci tondezya kuti Ta konzyi kuba muntu. Ca katonkomeka cakulondoka, cakululama mbubonya mbo eikonzya kuba, ciindi aciindi. Ino ncinzi? Ndi janza lya Leza, mwabona, kumbele lyesu. Elyo nkaambo cili mu kakamu kaniini, kacivumbidwe mu mubili wabuntunsi, cili vumbidwe ku inyika yaanze. Wa cisisa ku inyika yaanze. Uli mukuliyubununa Mwini ku bavwanda bali boobu banga baiya. Mwabona? Mbo mbubo.

<sup>337</sup> Zyoonse, mwabona, zikozyano zyoonse mu Bbaibbele, ziiminizyo zyoonse zyamu Bbaibbele, zilayubululwa mpoonya awa kumbele lyesu. I Leza nguwenya, mu Musumpululu wa Mulilo, oyo wakalemba Bbaibbele, mu Cizuminano Cakale a Cipy, uli mpoonya awa kau Ci yubulula, kutondezya mbubonya buyo mbo cakabede, kupandulula alimwi ncobeni, a kucibamba masimpe kuti mbupanduluzi.

<sup>338</sup> “Tuli jisi bupanduluzi!” Mpawo atu cibone kucitika. Mwabona, nce ncico, atu cibone kuyubululwa.

<sup>339</sup> Kuyubulula! Jesu wa kati, “Ikuti na Nse citi milimo ya Ba Taata, muta Ndi syomi.” Mwabona, ceelede kutondezegwa.

<sup>340</sup> Pele lino—lino, kutali kutondezegwa mbuli Jesu, ba kabikka i—i kasila kuvumbilila mutwe Wakwe aku Mu uma ku mutwe, kati, “Ikuti na Uli Musinsimi, twa ambile oyo Wa kuuma.” “Elyo ikuti na Uli Mwana wa Leza, sandula cinkwa eci.” Mwabona, oyo ngu dyabulosi. “Ikuti na Uli Mwana wa Leza, koseluka oko kukuba—...”

<sup>341</sup> Nda amba, Ciybunuzyo eco Nca elede kucita, obo Mbo cibede. Pele lino, mbuli Ciybunuzyo 10 mbo iyubununwa, makani aasisidwe aa Leza ayubululwa, azibwa, mbuli Bbuku lyaka syomezegwa ilya Zinamatizyo zili Ciloba.

Lino amulekele lusyomo lwanu muli Nguwe Uli ndi Ijwi... Nkaambo, mu Ciybunuzyo 10 lyaamba kuti...

<sup>342</sup> Na, Ciybunuzyo 19, mubwini. Nda kacilemba awa, Ciybunuzyo 10, kuya kuli ncico; pele taili 10, ngu 19. Cindi A boola, Uyo tegwa, “I Ijwi lya Leza,” katantide aa Mbizi iituba, alimwi bamutobela baku Julu bayooba kusule Lyakwe.

<sup>343</sup> Kumwaya cisitilizyo catubungwe ica lwiiyo! Kumwaya cisitilizyo catubungwe ica tunsiyansiya! Kumwaya zisitilizyo ezyo zi Mu siside kuzwa kuli ndinywe! Kumwaya zisitilizyo ezyo zya kulisumpula, nywebo no banakazi. Muli—muli bana basimbi iba Mwaami; amulilemeke mbuli ncico, amupone mbuli ncico. Kumwaya zisitilizyo zyoonse, takukwe makani eco Ph.D. a LL.D. nco yaamba. Ikuti na ciliimpene ku Bbaibbele eelyo, kodonkolka kwiinda mu cisitilizyo eco!

Nkambo, twa zabuka cisitilizyo cizapukide. Tuli ku lubazu lumbi lino, ku lubazu lumbi. Elyo muvo bona, ikuti na muvo cita booboo, kumwaya tunsiyansiya oto twa kale a zintu, a kuboola kuli Nguwe, muvo Mu bona kaimvvi, Muzundi Singuzu, Ijwi lya cisyomezyo lya bukkalo buno, lya yubululwa. Muvo bona Leza Singuzu watondezegwa, ku Mu bona mpoonya akati kesu awa, katondezegwa, Leza Singuzu, uutazundidwe ku tunsiyansiya.

<sup>344</sup> Ba kasola ku Mu sisa kunze okuya; ba kacita, kwa myaka, pele cindi ca cisyomezyo cakaswena. Leza wakabusya Musa ciindi cimwi, alimwi wa kaangulula bana kuzwa ku zintu. Elyo Walo ucili... Ta konzyi kuzundwa. “Majulu a nyika ayo loba, pele Ijwi Lyangu tali kaciti.” Ngu mbobuca nguwenya, sunu, amuya myaaka.

<sup>345</sup> Ba lati, “Ta cikonzyi kucitwa.” Pele ca kacitwa. Mpawo, cindi nicakacitwa, ba kati, “Nca dyabulosi.”

<sup>346</sup> Pele eco tacicinci Ijwi lya Leza, aniini. Calo cicili “Leza,” ku musyomi, “Muzundi Singuzu; mbobuca nguwenya, sunu, amuya myaaka,” ku bupange Bwakwe, ku Ijwi Lyakwe, Bahebrayo 13:8.

<sup>347</sup> Nda jala, mu kwaamba eci, nkaambo maminiti osanwe kuyaku twelufu, kwaamba eci biyo. Ndi jisi mapeegi atandila ku kkumi, asyeede ali kkumi aobile. Ndiyo cimanizya cindi cimbi, ndiza sunumasiku.

<sup>348</sup> Amubone, amubone eci. Kwakali okushini kubuleya ciindi cimwi, nkabela ba kajisi vaolini yakale. Mwa kacimvwa ziindi zinji. Ii vaolini yakale; elyo siokushini kubuleya wa kati, “Ino Ndiyo isambala buti?” Kwayanda nse amba eci kabotu buyo, kweendelana ku kayabilo. Cakali myaka, minji minji, pele cila boola ku mizeezo yangu. Elyo ba kabweza vaolini yakale, tii yakajisi bwheebele; kuboneka kubija maningi, zintuzyonse. Ta kakonzya akuba a kwaambwa kuula kuli njiyo. Kumalekelo, Ndi yeeya kuti wa kajana kwaamba kwa kuula kwadollar lyomwe, na cintucimwi mbuli ceeco.

<sup>349</sup> Elyo kwakali umwi wakaimvvi awo oyo watakali kuyeeya kuti yakeelede kusambalwa booboo, aboobo wa keenda a kwiibweza. Wa kayuuma mu maanza akwe, a kubweza buta a cakunanika, nkabela wa kalizya tyuni. Elyo cindi na kacita, bantubonse bakatalika kulila. Teeba kalina mvwa ciimbo cili booboo mu buumi bwabo.

Mpawo siokushini kubuleya wa kati, “Ino Nda bbadelwa ongaye?”

<sup>350</sup> “Zyuulu zyobile!” “Zyuulu zyosanwe!” “Zyuulu zili kkumi!” Mwabona? Cakali cindi nzi? I janza lya simalela lyakayubununa eco cakavumbidwe mu cibelesyo cakale.

<sup>351</sup> Mbubonya lino! I Bbuku lyakale, Lili galankene, Lyakasekwa, kuumpwa, ku fubaazigwa. Pele ciindi casika noba jisi busambazi bwatubungwe kubuleya, Nkamu Yanyika iya Mambungano. Bali muku Li sambala mbuli mpindu itayandwi kubanji. Kuli busambazi bwatubungwe buboola.

<sup>352</sup> Pele, amwiibaluke, kuli cintucimwi mu Bbuku lyakale lya kasyomezya kuti kuyooba janza lyakakanza, lyakasalwa liboola buzuba bumwi, liyo Li bweza a kubamba Ijwi lya Bbuku eli, kwiinda ku moyo wakakanza, ku ncito eyo ngo Lyakabambilwa, kuyubununa zisyomezyo zili muli Ndilyo. Inga lyalanga, oh, mbuli nkamu yakaindi iya babumbulusi basalala, na cintucimwi cimbi; pele citola biyo janza lya Simalela, Ijwi aali Ndilyo, kuyubununa Ijwi eelyo, nkabela lyaindila kuba mubumbulusi uusalala. Lyaba booboo kuli umwi aumwi wesu, embo na, beenzuma? Taili nkamu ya ciimo cakwiindilizya. Ciya buyo Oyo ula janza buta mobubede.

Atu kombe.

<sup>353</sup> Taata wesu Wakujuju, ku lusyomo, eci sunu, Nda bona Simalela wa Bbuku lyakale, eelyo nde baka sintanya tunsiyansiya. Ba ka Li sintanya tubungwe. Ba kasola ku Li sambala kuti lizwe. Lino ba Li sambala ku i—i Nkamu Yanyika iya bantu, ya mambungano, ba kkomunisti, batasyomi kuti leza nkwalii. I okushini kubuleya ili mukucitika, Mwami.

<sup>354</sup> Leza, kotaamukila kumbele! Nkwakasimpe, Uyo cita. Ko tutumina musinsimi oyo, Mwami, oyo ubweza buta obo, oyo ubweza Ijwi eelyo a kutondezya kuti Jesu Kristo ngu mbobuca nguwenya, sunu, amuya myaaka. Banji, Mwami, bayo sambala maumi abo, bayo sowa tunsiyansiya twakale, bayo mwaya cisitilizyo. Bala Li yanda, Mwami. Ba yoopa cintu cili coonse, cili coonse, bape buyo Jesu.

<sup>355</sup> Mwami, Ndi yeeya kuti Wa Li tondezya kuli mbabo eno. Ba kumasena oonse. Ba belesya mali abo. Bala cita zintuzyonse, kusola kusika ku miswaangano, kucita koonse nko bakonzya, nkaambo ba jana Ngale eyo ya muulo mupati. Zintu zimwi nziniini maningi. Ba longezye, Taata.

<sup>356</sup> Kubikkidwe aa cikambaukilo eci, kuseeni oku, Mwami, kubikkidwe tutambala. Ndiza bamwi babo bayo elela kuunka sunu, kakutanaba mulimo wakuponesegwa sunumasiku. O Leza Uutamani, kolanga ansi. Ndi lizi Yebo nkoli, Uli vumbidwe. Elyo Nda tuma zisitilizyo ezi ziniini, Mwami, zitegwa “tutambala,” a “tusila,” tuniini a “tugowani” tuniini twa bavwanda baniini. Elyo Nda tuma mbuli zizibyo ziniini zya zisitilizyo, kuti Ijwi

Lyako lyakambaukwa kuli ncico kuseeni oku, alimwi, mbuli musyomi, Nda bikka maanza angu ali ntuto, mibili wangu, kuzibya kuti Nda Ci syoma. Elyo, ku lusyomo, umwi aumwi mu buyake obu uli mukucita nciconya, Mwami. Akube kuti balwazi baponesegwe.

<sup>357</sup> Inga wabuwabuwa i—i Ijwi kuzwa awa, Mwami, mbuli sikulizya vaolini mudaala mbwa kacita ku vaolini, kocicita obo, Mwami. Koibamba kulila tyuni iluleme, buta mu janza lya Simalela, mpawo twa Mu bona kaimvwi mu kulibonya kumaninide.

<sup>358</sup> Obo bantu abo mboba keelede kuyeyya buzuba obo, cindi niba takapa cintu, cindi nibata kapa cintu ku vaolini yakale. Tee bakali kwiiyanda pe. Niba taka izumizya mu ng'anda yabo. Pele cindi lomwe yabwezegwa kuli umwi wakali kukonzya kuyiya akumvwisywa kabotu, mpawo ba kasambala zintuzyonse nzo baka jisi, kuti bayuule. Ba kali kukwankwana a kwiiwanina. Ciindi cakali manide kale kai.

<sup>359</sup> Mbubonya mbo ciyakuba ciindi cimwi elyo Mweembo wa Mwami wakulizigwa, ciindi tacicikabi limbi. Abo bakalangwa a kusekwa, ba kaima awo kumbele lya cisitilizyo cijukide a kubona Ijwi lya Leza kali yubululwa (*bamwi* bayo Li kwiiilila, pele, mbuli Mbo kaamba, “Ciindi cino manide kale kai”), ba kanjila mu Cisusulo ca Mucado; elyo *ba* kasiigwa anze awo ali koomoka, kukwemba, a kuluma ntwino.

<sup>360</sup> Kogwasya muntu oonse kuti asyome, kuseeni oku, Taata; kudonkola cisitilizyo coonse ca kulyanda, cisitilizyo coonse ca kutasyoma, a kubona Muzundi Singuzu katondezegwa kumbele lya basyomi. Nkambo, “Amubone, Ndili a nywebo lyoonse, akwalo kumamanino aa inyika. Ii kaindi kaniini mpawo inyika tika Ndi boni limbi, nekubaboobo moyo Ndi bona.” Litondezye Omwini akati kesu, Mwami, mbuli Mbo kali kucita lubbe. Uli mbobede lyoonse munzila eyo kusikila twa libonya kumbele Lyako, cindi *en morphe* niya cincwa nkabela Wa ba Mwana wa muntu alubo, a Mwana wa Davida. Kocipa, Mwami, kwiinda mu Zina lya Jesu Kristo.

Kuciindi notu kotamikide mitwe yesu, boonse mu nkombyo.

<sup>361</sup> Ndalibuzya sunu na kuli bamwi awa abo...mukati na aanze. Kwiina nzila yakuleta lwiito lwaku cipaililo awa, nkaambo taakwe busena. Pele Ndali buzya, cakusinizya, sa mula syoma obu kuba Bwini? Sa mula syoma kuti buzuba buno mbo tu pona, a bukkalo obu boonse bupilingene a bwasayaansi mbuli mbo kwakabede mu mazuba akwa Nowa, mu mazuba akwa Musa, mazuba akwa Kristo, kuti Leza, Taata mupati wa toonse no twa kazyalwa muli Nguwe, uliimvwi akati kesu sunu?

<sup>362</sup> Oyu Musumpululu wa Mulilo uulibonya waka tondezegwa munzila yasayaansi, myaka minji yakainda, mbuli musankwa muniini, kaambaula kuli ndime okuya a ku ndaambila

kuti Ndiyo kkalila awa mpoonya, eco cakali kuyo citika. Kumwaambila kujatikizya nguwo, alimwi mpawo Ngu... Buzuba bumwi kunselelo lya mulonga, mulimo kuutana talika, lubukulusyo lutaanzi, Wa kabonekela mu milengalenga, kalizibya Mwini a kupa kutumwa. Myaka eyi yoonse Nda kacisia mu moyo wangu, kuvumba Kristo, nguonya Musumpululu wa Mulilo kaupandulula Ijwi, mbuli mbo kwakasyomezegwa. Tuli mu buzuba bwamamanino, Kuboola biyo kwa Mwami. Elyo ikuti na walijana anze lya cisitilizyo eco, luli ndufu kutaba mukati, sena ulacita ku lusyomo, kuseeni oku, kwaamba, “Ku lugwasyo lwa Leza. Alimwi a lugwasyo Lwako, Mwami, Ndi yanda kudonkola mu cisitilizyo eco. Ndi yanda kunjila omo Mobede, kubona Ijwi lya Leza lizwide”?

<sup>363</sup> Uta soli kuba Musa. Uta soli kuba Aaroni. Uta citi. Koba buyo mbobede, pele koba Munakristo.

<sup>364</sup> Sena inga mwacita, a mitwe yanu kiikoteme, amu tambike maanza anu kuli Leza, a kwaamba, “Mwami Leza, kondi gwasya mukati ka cisitilizyo”? Leza aku longezye. Leza aku longezye. Ehe, amulange buyo ku maanza!

<sup>365</sup> Aanze, amwiibaluke, antela Nse konzya kubona janza lyako. Ta ce—ce eleli maningi kuli ndime kulibona, nekuba; ngu, Leza. Cili buyo, kuli ndime, ci ndibamba buyo kubona kuti i—i Mbuto yawida aabusena bumwi, alimwi, pele Leza ulabona moyo wini.

<sup>366</sup> Ikuti na bamwi bambi tiiba tambika maanza abo, banga bayanda kuti atambikwe lino, amu tambike maanza anu a kukwiibalukwa mu nkombyo. Amu tambike maanza anu. Leza amu longezye. Eco ncibotu. Leza amu longezye.

<sup>367</sup> Taata, twa lomba sunu kuti aba, Mwami, abo batana kudonkola mu cisitilizyo eco. Ba liimvwi okuya mbuli Israyeli; bala langilila. Bala syoma, pele tabana donkola muli Ceeci pe, kubona Mumuni oyo mupati wa Shekina, kumuuya a kunyama, cakuti liso lya muncina ilya kkamera lila zumanana kufotola cifoto; mvwiki buyo zyobile zyainda, lyaka Ci kwaba alubo. Uli Mu kuliyubununa, Mwami, Leza Singuzu watondezegwa ku musyomi; ucivumbidwe kuli sikutasyoma, pele watondezegwa ku musyomi.

Akube kuti badonkole, sunu, Mwami, kubona bweebesi Bwakwe bupati a Bulemu. Akube kuti myoyo yabo icinewe katutana akwalo kupilukila ku cikombelo eci sunumasiku. Akube kuti boonse bazuzigwe Muuya Wako, Busyu Bwako. Akube kuti Simalela anontole lusyomo olo ndo bajisi, kuluvumbya emyeengo aa Ijwi; akube kuti tyuni ijokele, “Wa kasalwa, kuzwa ku malengelo aa inyika, kusyoma Eci. Kosyoma, mwana Wangu, a kufutulwa.”

<sup>368</sup> Taata, Leza, twa batuula mu maanza Ako eno, mukumvwisya kuti kwiina cimbi nco tukonzya kucita. Coonse

cili kuli Nduwe eno, Taata. Nda bapa kuli Nduwe. Mu Zina lya Jesu Kristo, Mwana Wako. Ameni.

Nda Mu yanda, Nda . . .  
 Nkaambo . . . kasaanguna kundi yanda  
 A kuula lufutuko lwangu  
 Aa cisamu ca Kalivari.

<sup>369</sup> Sa mula Mu yanda? [Mbunga yaamba, “Ameni.”—Mul.]

Mubotu, mubotu, Jesu kuli ndime,  
 I Sinkuta, Mweenedezi wa Luumuno, Leza  
 Singuzu Mbwa bede;  
 Uli mu kundi vuna, kundi tantamuna ku zibi a  
 mause oonse,  
 Mubotu Munununi wangu, lilumbaizigwe Zina  
 Lyakwe!  
 Nda kali sweekede ciindi cimwi, lino Nda  
 janwa, kwaanguluka ku mulandu,  
 Jesu ulapa bulubusi a lufutuko luzwide;  
 Kundi vuna, kundi tantamuna ku zibi a mause  
 oonse,  
 Mubotu Munununi wangu, lilumbaizigwe Zina  
 Lyakwe!  
 Oh, mubotu, mubotu, Jesu kuli ndime,  
 I Sinkuta, Mweenedezi wa Luumuno, Leza  
 Singuzu Mbwa bede;  
 Oh, kundi vuna, kundi tantamuna ku zibi a  
 mause oonse,  
 Mubotu Munununi wangu, lilumbaizigwe Zina  
 Lyakwe!

<sup>370</sup> Mbangaye ba Mu bwene kaimvwi, Muzundi Singuzu, Ijwi lyaba mu mibili wabuntu, kutondezegwa kumbele lyesu; Alufa, Omega; Oyo Wa kaliko, Walo Uliko, a Uyo Boola; Muyanda a Cisyuukila ca Davida; wakali Mwana wa muntu, Mwana wa Leza, Mwana wa muntu, alimwi uyooba Mwana wa Davida? Mula Ci syoma a moyo wanu oonse? [Mbunga yaamba, “Ameni.”—Mul.] Kalitondezya Mwini mu bukkalo abukkalo, kaletwa ku musyomi, kalivumba Mwini mu mibili wabuntunsi kuli sikutasyoma. Uli sisidwe kunze lya cisitilizyo. Akube kuti Leza amwaye cisitilizyo coonse, nkabela tula Mu bona Mbwa bede!

Jesu ulamwaya zisinkila zyoonse,  
 Jesu ulamwaya zisinkila zyoonse,  
 Oh, Jesu ulamwaya zisinkila zyoonse,  
 Cindi Walo akwaangulula!  
 Ku lubazu lumbi lwa Jordano,  
 Mu myuunda minono ya Edeni  
 Oko Musamu wa Buumi nkuusonsa,  
 Kuli kulyookezya kwangu.

Jesu ulamwaya . . .

Sena mula yanda kuzabuka Jordano eno? Sa takuli kulamfu  
loko mu lukula? Atu zabukile mu zisyomezyo!

Jesu ulamwaya zisinkila zyoonse,  
Jesu ulamwaya zisinkila zyoonse,  
Oh, cindi Walo akwaangulula!

<sup>371</sup> Atu tambike janza lyesu eno.

Ndiyo Mu, lumbaizya lyonse lyonse,  
Ndiyo Mu, lumbaizya lyonse lyonse,  
Ndiyo Mu, lumbaizya lyonse lyonse,  
Nkambo Ula ndaangulula!

<sup>372</sup> Amen! Sena eyo taimu bambi kulimvwa kabotu? [Mbunga yaamba, “Ameni.”—Mul.] Oh, Mbwali mubotu! Mbwali mubotu,  
Tali obo na, kai? Atu sukane maanza umwi aumwi eno,  
kwaamba:

Jesu ulamwaya . . . -sinkila zyoonse,  
Jesu ulamwaya zisinkila zyoonse,  
Oh, Jesu ulamwaya zisinkila zyoonse, (Leza  
aku longezye, mukwesu.)  
Oh, nkabela Ula kwaangulula!

Ndiyo Mu, lumbaizya lyonse lyonse, (Leza  
Singuzu)  
Ndi . . . (“Mbobuca nguwenya, sunu, amuya  
myaaka,” kacincea buyo ciimo Cakwe.) . . . Mu  
lumbaizya,  
Ndiyo Mu, lumbaizya lyonse lyonse,  
Nkambo Wa (kagusya tunsiyansiya toonse kuli  
ndime) ku ndi . . . (ku syoma Ijwi Lyakwe).

<sup>373</sup> Oh, sa tamu konzyi kumvwa Vaolini ya Simalela kiikwela  
koonse, buta koonse ku Ijwi eli? Ngu mbobuca nguwenya, sunu!

Ndiyo Mu, lumbaizya lyonse lyonse,  
Ndiyo Mu, lumbaizya lyonse lyonse,  
Ndi . . . (Nguwe, Ijwi!) . . . Mu, lumbaizya lyonse  
lyonse, (Ino Wa kacitanzi?)  
Nkambo Ula nda (kunze lya cisitilila)  
angulula!

<sup>374</sup> Kulumbaizya kube kuli Leza! Nda Mu yanda. Sena ta Mu  
muyandi? [Mbunga yaamba, “Ameni.”—Mul.] Sa eci tacili Cibotu  
kapat? [“Ameni.”] Nda buyanda obo bube bwa Ijwi, mwabona,  
buyo Muuya Uusalala munzila eyo, mbotu ibombede. Nda—Nda  
ibotelwa buyo Eyo. Oh, amuyeeye biyo!

Ku lubazu lumbi lwa Jordano, (Nja buswena  
okuya eno)  
Mu minono . . . (iitafwiki) ya Edeni, . . . (Ncinzi  
Nce ndiyo jana okuya?)  
Oko Musamu wa . . . (oyo wakali mu muunda  
wa Edeni) nkuusonsa,  
Kuli kulyookezya kwangu.

<sup>375</sup> Mu yanda kwiinka? Walo ulamwaya zisinkila zyoonse.

Jesu ulamwaya (tunsiyansiya toonse) zisinkila  
zyoonse,  
Jesu ulamwaya zisinkila zyoonse (tubungwe  
toonse, tulengwa toonse),  
. . . ulamwaya zisinkila zyoonse,  
Nkabela Ula kwaangulula!

<sup>376</sup> Kulumbaizya kube kuli Leza! Nda Mu yanda ncobeni.  
Ta cigambyi Isaya wa kati, “Ngu Sinkuta, Mweendelezi wa  
Luumuno, Leza Singuzu, Taata Uteeli, Mubotu!”

Mubotu, mubotu, Jesu kuli ndime,  
Sinkuta, Mweendelezi wa Luumuno, Leza  
Singuzu Mbwa bede;  
Oh, ku ndivuna, kundi tantamuna ku zibi a  
mause oonse,  
Mubotu, Munununi wangu, lilumbaizigwe  
Zina Lyakwe!

<sup>377</sup> Oh, ma! Eco cizungaanya moyo wangu. Obo Mbwali mubotu!  
Nda mwaambila, kwiina magolelo kuli Ceeci. Calo, Nda kanjila  
muli Ceeci kwa myaka ya makumi otatwe yakainda, kulimvwa  
boobu. Elyo ikuti na Wa lindila, buzuba bumwi Ndiyo jala meso  
angu, Ndiyo unka munzila njionya. Amen!

Mubotu, mubotu, Jesu kuli ndime,  
Ngu Sinkuta, Mweendelezi wangu wa  
Luumuno, Leza Singuzu Mbwa bede;  
Uli mu kundi vuna, Uli mu kundi tantamuna  
ku zibi a mause oonse,  
Mubotu, Munununi wangu, lilumbaizigwe  
Zina Lyakwe!

<sup>378</sup> Nda konzya kukkanawa koonse kwa buzuba, muli Ceeco.  
Paulo wa kati, “Ikuti na Nda imba, Ndiyo imba mu Muuya.”  
Uh huh. “Ikuti na Nda kambauka, Ndiyo kambauka mu Muuya.  
Ikuti na Nde enda, Ndiyo enda mu Muuya. Ikuti na Nda ambaula,  
Ndiyo ambaula mu Muuya.” Azicitwe zyoonse ku Ijwi a Muuya.  
Iiyi, munene. Amen! Boonse Mbwini bwa Leza.

<sup>379</sup> Nda Mu bona, Leza Singuzu, watondezegwa. Nda Mu bona  
kavumbula tunsiyansiya, tubungwe; kuvumbula i—i badonaika,  
mabambe alwiyo, a zintuzyonse; kweenda kuya kunembo,  
kwiima alya. Mu yeeya kuti tubungwe inga twa Mu zunda? Mu  
yeeya kuti tubungwe inga twa Mu zunda? Mu yeeya kuti Nkamu

Yanyika inga ya Mu zunda? Wa kazunda zintuzyonse, kamwaya zisinkila zyoonse, kadelula gehena cakujuka; kazapaula cinamatizyo, kanjila mu Busena busalalisy; wakalitondezya Mwini kuli ndiswe, mukuba Ijwi, mbobuca nguwenya, sunu, amuya myaaka. Ameni. Nda Mu yanda.

<sup>380</sup> Lino, kusikila tu swaangane isikati sunu, tu yanda kucita cintu comwe, ncakuti:

Ko tolelela Zina lya Jesu,  
 Mwana wa buusu a wa mapenzi;  
 Liyo kupa lutangalo a kuumbulizigwa,  
 Oh, ko Li tola koonse nkoya.  
 Zina liyandisi, O mbolili bbotu!  
 Bulangizi bwa nyika a lutangalo lwaku Julu;  
 Zina liyandisi... (Inzya, Nda ajisi, kale.)... O  
 mbolili bbotu!  
 Bulangizi bwa nyika a... (....?)...

<sup>381</sup> Ikuti na Saatani wasola kukusunka, cakuti toli mukulanga ku cintu ciluleme, komu tondekela ku Ijwi mbuli Jesu mbwa kacita. Mwabona? Mwabona? Ameni!

Iku Zina lya Jesu nkukotama,  
 Kufugama ansi ku matende Akwe,  
 Mwaami wa bami ku Julu tuyu Mu samika  
 musyini,  
 Cindi lweendo lwesu lwaakumana.  
 Zina liyandisi, Zina liyandisi!  
 Bulangizi bwa nyika a lutangalo lwaku Julu;  
 Zina liyandisi, O mbolili bbotu!  
 Bulangizi bwa nyika a lutangalo lwaku Julu.

<sup>382</sup> Billy unoliko, kutandila sikisi okuloko, kuvozya makkadi aa mipailo kuli baabo bayanda kunjila mu mundando wa mipailo. Ndi yeeya kuti ncibotu twa cicita. Ni twa tacicita, pele, mukuba bbunga, ncibotu twa cicita, nywebo mwabona.

<sup>383</sup> Lino amu Mu yeeye! Amu Mu bikke mu miyeeyo yanu lyoonse, mu moyo wanu. Kufumbwa nko muya, mwabona, amubikke Jesu mu miyeeyo yanu.

Ko tolelela Zina lya Jesu (eno amuswiilile),  
 Mboli ntobo itabulula tooze toonse; (ncinzi  
 cicitika?)  
 Cindi masunko aku bungilila, (ncinzi neo elede  
 kucita?)  
 Koamba buyo Zina eelyo lisalala mu mupailo.  
 Zina liyandisi, Zina liyandisi, O mbolili bbotu!  
 Bulangizi bwa nyika a lutangalo lwaku Julu;  
 Zina liyandisi, O mbolili bbotu!  
 Bulangizi bwa nyika a lutangalo lwaku Julu.

<sup>384</sup> Atu kotamike mitwe yesu eno. Ndiyo lomba mweembezi kutegwa aboole a kumwaisya nkamu yabantu. Mukwesu Neville, Leza aku longezye, Mukwesu Neville.



*IKUTONDEZEGWA KWA LEZA* TNG64-0614M  
(The Unveiling Of God)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa mu Nsondo kuseeni, Gandapati 14, 1964, ku Branham Tabernacle mu Jeffersonville, Indiana, U.S.A., wakagusigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obu busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2018 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kuzibya Kwa Nguzu Zyakkopi

Nguzu zyoonse zilitamininidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyabolwa mu ciyanza cakujokolosya, kusandululwa mu misyobo iimbi, na kubelesegwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)